

NSUNGI YA DIBUUNDU

YA PERGAME



Mbote mingi. Ntangu yayi, samu na munu, ya ke vwanda mbote ti ba kufwa yawu. Mbote mingi.

² Beto kele dyaka na kyese na kuvwanda awa na nkokila yayi na lukutakanu ya Mfumu. Mpe mazono na nkokila mu talaka kieleka mutindu Millenium me kwiza. Mpe na yawu ntangu yayi beto kele na mwa, mu banza mwa bakyuvu awa, mpe mu ke tula yawu na posi ya munu samu . . . mu—mu banza ti yayi kele samu na kisambu . . . samu ba sambila. Mpe beto kele . . . Mpe mu ke meka na kupesa bamvutu na mutindu ya mbote yina mu—yina mu lenda.

³ Nge lenda tuba, kana nge zola na Doc kana yandi “lenda kufwa yawu,” ti . . . ya ke na kungenga kaka na yisi awa na zulu ya munu, na yawu, mu kele ve na yisi ya projecteur. Beno zaba, mu—mu kele ve mosi ya milongi yayi yina ke zolaka projecteur. Na yawu ya ke vwanda kaka mbote kukondwa yawu, mu banza. Nsuka . . .

⁴ Mu me lomba yawu, Doc. Mulemvo, mu—mu mulemvo, nge me mona. Oh, oh, yinki nge ke sala . . . ? Nge fwana balula yawu kuna mpe kuningisa yawu? [Mpangi Branham ke na kusololaka na mpangi ya yandi ya bakala, Doc—Mu.] Oh, mbote, bika kaka yawu. Yinga. Mbote, bika kaka yawu. Oh, ve! Ntangu yayi, kufwa yawu ve. Yinga. Ntangu yayi mu me zola mingi mutindu yina. Ntangu yankaka . . . Mpe mu ke zolaka ve mwinda kulezima kaka mbala mosi na kizizi ya munu, beno zaba. Mpe—mpe ya ke na kulezima na yisi ya yayi kisika mu lenda mona mbote. Matondo na nge, tata. Ya ke vutukila yandi.

⁵ Beno zaba, beno lenda manisa ve na bansungi ya dibuundu yayi. Mpe bubu yayi ntangu mu vwandaka tanga na zulu ya yayi, mu tubaka na kento ya munu, mu tubaka, “Oh, la la! Mu—mu me kuzwa masonuku mingi samu na kulonga malongi makumi tanu na yandi yayi.” Beno me mona? Mpe yawu kaka . . . ya kele ve na nzila ya kusala yawu kasi kubaka kaka mambu ya ngudi, mpe ya lendaka vwanda ntangu beto ke sonika buku kuna beto ke meka na kubaka mingi ya yawu.

⁶ Mu monaka nge ve awa, mpangi ya bakala. Wapi faso, Mpangi ya bakala West? Mu vwanda me kuwa kaka bansangu ya mbote, ti ya nsuka ya dibuta ya Mpangi ya bakala Daulton me kwiza, mwana ya bakala yankaka yina . . . mwana ya kento yankaka. Ya kele kumi, mutindu yina? Yivwa. Beno ke bambuka moyo ya vwandaka na yisi ya ministele ya malu-malu ntangu

Mfumu tubaka na yandi kuna ti . . . dibuta ya yandi ke kuzwa mpulusu. Mu vwanda sambila samu na bawu, na kutelamaka kuna kuzabaka ve yinki mu zolaka tuba, Mpeve-Santu tubaka, “Mu me pesa nge dibuta ya nge.” Beno me mona? Uh-huh. Mpe yawu yayi, bawu nyonso. Beno me mona mutindu Mfumu ke salaka? Beno me mona, bandinga ya Yandi kele ya kulunga, ya ke kubwaka ata mbala mosi ve, ata mbala mosi ve. Mbote, beto zola ve kukota na lweka ya kubeluka ya Kinzambi, beto ke meka na kuvwanda ntangu nyonso. . . na lweka yayi, na lweka ya buprofesi.

⁷ Ntangu yayi, na nkokila yayi mu ke meka kaka na kuzonza, mpe kana mu lenda, mpe beto ke baka balweka yina ke tala masolo ya nsungi ya dibuundu ya nene yayi, ya zole . . . to beto kele na nsungi ya dibuundu ya tatu na nkokila yayi. Beno ke na kusepelaka na yawu? Ya kele kaka mbote. Mu ke banza kieleka kaka ti ya kele mbote mutindu Mfumu Yesu me sakumuna beto mpe me pesa beto bima yayi, mpe beto ke zola yawu na ntima ya beto nyonso, na kubika beto kuzaba na ntuala ya ntangu yinki ke salama na bilumbu na ntuala. Yandi zaba nsuka na mbandukulu, mpe na yawu beto kele na kyese mingi samu na yawu. Na yawu beto ke sala kivuvu na Mfumu na kusakumuna beto.

⁸ Mpe beno talaka, mazono na nkokila, Mpeve-Santu pesaka beto (na manima lukutakanu me manisa) bansangu tatu mpe myoyo tatu. Kaka kieleka. Mpe ntangu Mpeve vwandaka zonza, kuna ya vutukaka na ntendulu ya nsuka, vutukilaka, na kutubaka, “Yina Mpeve ke tuba na mabuundu. . .” Oh, “Yandi yina kele na dikutu, ti yandi kuwa yina Mpeve ke tuba na mabuundu.” Kaka . . . Mpe Mpeve na kutubaka na nzila ya makabu ya dibuundu. Oh, ti dibuundu kusimba yawu na buzitu ntangu yayi, beno me mona, beno buma kaka yawu na buzitu. Beno sala keba; Satana ke kwiza, ke meka na kukotisa beno na bankadulu ya beno nyonso na yawu. Beno vwanda ya kukwikama ti ya kele Mpeve-Santu ntangu nyonso. Mpe kana ya kele Mpeve-Santu, Yandi ke zonza mbala mosi na kima yina ke na kusalamaka. Ya kele samu na kusungika dibuundu. Beno me mona? Mpe na yina kana beno vwanda na buzitu na yawu, Nzambi kuna ke pesa beno ya kulutila. Beno me mona, ke landila kaka na kubwela mingi mpe mingi. Mpe mutindu . . .

⁹ Ntangu yayi, muntu mosi vwandaka me bokila mpe vwandaka lomba. . . bantu vwanda bokila bubu yayi mpe vwandaka yufula wapi kilumbu ke vwanda balukutakanu ya kubeluka. Ntangu yayi, ntangu kaka balukutakanu yayi ke manisa, Lumingu na nkokila yina ke landa, mu ke kwenda bilumbu ntama fyoti ntama, mutindu samu na kupemisa mwa fyoti laka ya munu, mpe Lumingu yina ke landa, kana Mfumu zola, beto ke kuzwa lukutakanu ya kubeluka, Lumingu na suka yina ke landa. Ya ke vwanda . . . mu zaba kaka ve wapi kilumbu

ya ke vwanda, kasi ya ke vwanda sabala . . . Kilumbu ya kumi na nana, na Lumingu na su- . . . Ya kele kieleka, Mpangi Neville? Uhm? [Mpangi Neville me pesa mvutu, “Yinga, tata.”—Mu.] Lumingu na suka, ya kilumbu ya kumi na nana, beto ke sambila samu na bambevo.

¹⁰ Mpe na yayi, pasteur ya beto awa, mu me kuzwaka ve siansi ya kutuba mingi na zulu ya yandi, kasi mu zola beno nyonso, kumeka na kuzaba pasteur ya beto. Yandi kele kieleka mpangi ya bakala ya kieleka na Klisto. Beto kele na kyese na kuzwa mpangi ya bakala yina . . . yina me kula na balufulu ya ba-Methodiste na kati ya kusantisama. Mpe beto nyonso zaba Orman Neville, muntu nyonso na kizunga awa zaba. Ya kele ve na muntu na kulakisa musapi na luzingu ya yandi. Mu . . . Yandi ke zolaka ve ti mu kutuba yawu, kasi dyaka mu ke zola mingi kupesa yandi mwa bouton ya fyoti ya bafololo ya rose ntangu yayi, na kisika ya yimpu ya muvimba na manima yandi me kufwa. Beno me mona? Mpe ntangu yayi kele ntangu.

¹¹ Kilumbu mosi mu vwanda basika na dibuundu mpe muntu mosi tubaka, “Oh, Mpangi Branham, kieleka mu me zola mingi dilongi yina.”

Mpe mu tubaka, “Matondo na nge.”

¹² Mpe na yawu muntu mosi ya kutelama na mwelo, (ya me salama bamvula mingi me luta awa na tabernacle) mulongi mosi, me tuba, “Mbote, sakumuna Nzambi, mu ke zola ve muntu kutuba yawu na munu.” Beno me mona? Yandi tubaka, “Mu zola nkembo nyonso kukwenda na Nzambi.”

Mu tubaka, “Mbote, ya ke kwenda na Yandi.” Beno me mona? Mpe mu tubaka, “Mbote, munu mosi, mu ke zolaka yawu.” Mu tubaka, “Kieleka mu zola yawu.” Mpe mu tubaka, “Mu fwana vwanda kieleka.”

Mpe yandi tubaka, yandi tubaka, “Mbote, mu zola ve bantu kutuba yawu na zulu ya munu, lusakumunu na Nzambi!”

Mu tubaka, “Ya kele kaka na kima mosi ya kuswaswana na kati-kati ya munu mpe nge: Mu kele kieleka samu na yawu, mpe nge kele ve.”

¹³ Muntu nyonso ke zolaka . . . Kana beno baka mwana ya fyoti, beno siika yandi fyoti, yandi ke sala kosalu ya mbote. Beno me mona? Ya kele kieleka. Beno me mona? Mpe Nzambi, ntangu nyonso, Yandi ke zolaka kutubila na bana ya Yandi ntangu bawu ke salaka mbote. Beno zola kutubila bawu ntangu bawu ke salaka yimbi, na yawu samu na yinki ve kutubila bawu ntangu bawu ke salaka mbote? Beno me mona?

¹⁴ Na yawu kieleka mu ke tonda Nzambi samu na Mpangi Neville na kuvwandaka pasteur ya mameme yayi awa na tabernacle. Mpe na kumonaka muntu yango, ya lufulu ya ba-Methodiste, malembe . . . Mbote, kaka mutindu kuzola kudya

na stand ya yimbi. Na yawu . . . kasi na kubakulaka na nzila ya Mpeve-Santu ya nene, mpe ntangu yayi ke kwiza na makabu yango; mpe mutindu pete-pete Mpeve-Santu ke sadila yandi ntangu yandi ke sadila ve dibanza ya yandi mosi. Beno tala mbote ntendulu na rythme mosi, mpe bakumata mpe bakukulumuka mosi, mutindu bankumbu mpe biyingulu, mpe nyonso, mpe kuvutukila dyaka na kupesa yawu mvutu.

¹⁵ Mpe mpangi ya bakala ya ntwenya yayi, mu banza ve ya kele . . . Junior Jackson. Mbote, mu ke vwanda swi, Junie. Mu ke tonda Nzambi samu na Junie Jackson, kieleka mpangi ya bakala kele na dikabu ya nene ya Mfumu.

¹⁶ Mpe ntangu nyonso kaka ya kulemvuka. Ntangu yayi, muntu nyonso na kati ya dibuundu kele na kima ya kusala; kasi kutula yawu ve na lweka samu na kima yankaka, ti ya vwanda na kiwisa na nyonso yankaka ya dibuundu. Ya kele samu na Nzambi, bima nyonso. Beno me mona? Beno me mona? Ti muntu nyonso ve kuzola kuzonza na bandinga, ti muntu nyonso kutendula.

¹⁷ Beno meka na kusala kima ya mbote mpe beno landila kaka na kuvwanda mbote; beno vwanda na ata nsoki, ata kimbeni, beno pesa ata muswa na ndudi. Ata mutindu yimbi muntu kele mpe mutindu yimbi bawu ke zonzila na zulu ya beno, beno banza ata mbala mosi ve yimbi na ntima ya beno na zulu ya bawu; samu ti kaka kuna dyabulu ke baka kaka kisika na kati, ke kubika kima kaka kuna. Beno fuka kaka yawu nyonso na luzolo ya kinzambi, kufunguna masumu, mpe kusungika, mpe kusala mbote na bayina ke sala beno yimbi. “Kana beno ke sala kaka mbote na bayina ke sala mbote na beno, mbote,” Yesu tubaka, “ba-publicain ke salaka ve mutindu mosi?” Beno me mona? Misumuki, muntu nyonso lenda vwanda mbote na bayina kele mbote na bawu. Kasi beno vwanda mbote na bayina kele ve mbote na beno, beno sala kima samu na bayina ke sala ve kima mosi samu na beno. Beno zonzila dyambu ya mbote samu na muntu yina ke zonga yimbi samu na beno, mpe mutindu yina beno ke bika ndudi nyonso na ngaanda ya ntima ya beno; mpe beno kele ntangu nyonso na zola na muntu nyonso kuna, ntangu nyonso beno ke vwanda na zola.

¹⁸ Ntangu yayi beno ke tuba, “Mbote, bawu salaka . . .” Beto kele ve zuzi, Nzambi kele Zuzi. Mpe beno ke zola ve ti muntu ya mawa yina ba losa yandi, beno ke zola yawu? Kieleka ve, ata yina bawu kele. Beno ke zola yawu ve, na yawu beno meka na kuvwanda mbote na bawu. “Mpe zola ke bumbisaka lutangu ya nene ya disumu.” Uh-huh. Yinga, tata. Zola, kaka mbote mutindu yina, Muklisto, Zola ya kinzambi.

¹⁹ Kana muntu kwiza mpe bokila beno “exalté” mpe mitindu nyonso ya bankumbu, ntangu yayi—ntangu yayi kusala ve mutindu yandi, beno me mona, kana beno lenda sala ve mutindu yandi, beno kwenda kaka. Kasi na ntima ya beno, beno ke kuma

na kisika beno ke tuba, “Mbote, ya . . . ntangu yayi, mu banza, mpangi, kana nge bakula, na mutindu mu ke sala, nge ke tala mutindu mu ke salaka samu na yawu.” Beno me mona? Mpe beno vwanda kaka kieleka mbote na yandi, mpe beno bika yawu kulandila mutindu yina. Mpe ata ti beto lendaka vwanda ya kuswaswana mutindu ntama esete kele na wesete, yina ke sala ata luswaswanu mosi ve.

²⁰ Mutindu mu tubaka nkokila yankaka yina, mu kele na mpangi ya bakala yina kele . . . yandi kele muntu ya nene, Melvin; yandi kele yinda, na bansuki ya mbwaki. Ntangu yayi, beto ke talanaka ve mingi mutindu mosi ti beto ke talana ata fyoti ve ti beto kele dibuta mosi. Mpe banzala ya beto—ya beto ya kudya kele ya kuswaswana, mpe bansatu ya beto kele ya kuswaswana; kasi dyaka mama ya yandi kele mama ya munu, tata ya yandi kele tata ya munu, yandi kele mpangi ya munu ya bakala. Beno me mona? Samu beto kele ya kubutama na dibuta mosi.

²¹ Ntangu yayi, beto kele ya kuswaswana. Melvin kele ve Muklisto, mpe yandi ke zolaka baseball, nsaka ya bambangu ya mpunda, mpe bima mutindu yina. Mpe mu—mu banza yandi ke zolaka tarte ya chocolat, na yawu mu ke kwikila ti beto kele ya kuswaswana kuna. Na yawu mu—mu ke zolaka ve nsaka ya bambangu ya mpunda, mu zola kuloba mpe kuzomba. Beno me mona? Mpe yandi ke zola ve kubalula diboko ya yandi samu na yawu, mpe mu ke zola ve kubalula diboko ya munu samu na kima yankaka. Na yawu kuna, beno me mona, kasi yandi ke zolaka tarte ya chocolat mpe mu ke zolaka ya cerise. Na yawu kuna . . .

²² Ntangu yayi, mu ke zonza ve na kubakaka nzila yankaka, beno me mona. Kasi mu tubaka yawu kilumbu mosi na lukutakanu kisika mosi, ti mu ke zolaka tarte ya chocolat, mpe nkokila yina vwandaka landa mu kuzwaka pene ya ba-chocolat tanu . . . to tarte ya cerise, mpe mu kuzwaka ba-tarte ya cerise yiya to tanu yina bampangi ya bakento lambaka mpe natilaka munu. Oh! Beto kuzwaka jubiléé kuna na kivinga ya munu! Kasi, mu—mu ke zola ve kutuba yawu mutindu yina. Beno me mona?

²³ Na yawu mu me zola kaka kutalisa beno luswaswanu, beno me mona. Kasi ata nyonso yina yandi kele, mu zola yandi, yandi kele mpangi ya munu ya bakala. Mpe na yawu yandi kele ve Muklisto samu ti yandi ke monaka bima landila nsemo yankaka, mu ke monaka bima landila Nsemo Klisto; kasi dyaka mu lenda tuba ve ti yandi kele ve mpangi ya munu ya bakala, samu ti beto kele bampangi ya bakala yina butamaka na dibuta mosi.

²⁴ Ntangu yayi, mazono na nkokila, mu salaka nsamunu mosi na nsuka. Mpe beno bambuka moyo ntangu yayi, nsangu ya ntere kwizaka na dibuundu na manima ya yina beno zaba, ya kulutila na yina kuna ya Kentucky, ya vwandaka ti ya ke vwanda na bima ya mansweki na lukutakanu yayi yina ke kwamisa bantu mingi. Beno ke bambuka moyo na yawu? Ya kele na bande, ntangu yayi.

Beno me mona? Mazono na nkokila mosi ya yawu vwandaka me monikisa. Na yawu ya salaka mutindu kukangama sekonde mosi, kasi mu kele ya kundima ti beno simbaka yawu; samu ti Mpeve-Santu me nata, yina zolaka vwanda: “difelo ya Seko, ya kele ve na kima ya mutindu na kati ya Biblia.”

²⁵ Ya kele ve na difelo ya Seko. Kana beno vwandaka na Seko. . . Kana beno ke nyenga na difelo ya Seko, na yina beno fwana vwanda na Luzingu ya Kukonda nsuka na kuvwanda kuna, kana beno kele moyo. Mpe ya kele kaka na mutindu mosi ya Luzingu ya Kukonda nsuka, ya kele Nzambi! Beno me mona? Na yawu, mpe kuna Biblia ke longa ve difelo ya *Kukonda nsuka*, ya ke longa difelo ya “mvula na mvula”. Ya lendaka vwanda mafuku ya kumi ya mafunda ya bamvula, mu zaba ve, kasi ya fwana suka.

²⁶ Samu ti mu zolaka nata Yawu na kati kuna. Mu ke bika Yawu ntama na mabuundu mpe nyonso tii mu. . . ya me tala munu na kutuba Yawu. Mpe na manima ya kele na bima mingi na kati awa ya ke vwanda landila munu samu na kutuba Yawu, mpe na yawu kuna konso nkokila beto ke tala yawu.

²⁷ Kasi ntangu yayi, kubanda nkokila yayi, beno banda na kulwata mbanzulu ya beno ya kimpeve, beno me mona, beno bika kaka Mpeve-Santu ke kotisa Yawu na kati. Mpe na manima kana beno kuwa mpe ndima ve na Yawu, beno landila kaka kukwenda mpe beno tuba, “Kyadi Mpangi Branham, kieleka yandi—yandi zaba ve. Mu ke sambila samu na yandi.” Mpe beno sala yawu, mpe na manima mu ke. . . Mfumu ke sala munu kuzaba yina kele Kieleka kuna, kasi beno vwanda kaka mbote na munu, mpe beno manga munu ve—ve. Na yawu kuna ya lendaka vwanda kieleka, mpe, kasi, oh, mu ke na kuzwaka ntangu mosi ya mbote na kubanzaka na yawu mutindu yayi. Na yawu ya ke vukisa kaka nsuka nyonso. Mpe mu, oh, mu—mu lendaka vwanda na foti; kasi ya lendaka vwanda na nkondolo kuna kisika ti mu zaba kima mosi ve, na yawu ya lendaka vwanda ti beno zaba, mpe beno sambila Mfumu ke talisa yawu na munu.

²⁸ Mpe ntangu yayi, mpe na zulu ya nyonso, beno landila na kusambila na mosi na yankaka mpe beno bika ve dyabulu kutalisa ndudi mosi kisika mosi. Beno me mona? Beno bumba moyo ya beno ya kuvedila na ngunga yayi, samu ti beto kele na bangunga ya nsuka ya disolo ya yinza yayi. Beno me mona? Beto kele na nsuka, bankundi, kukondwa kivudi mosi ya ntembe.

²⁹ Na yina beto ke na kutalaka bansungi ya dibuundu yayi, beto ke bakula ntama mingi ve, mpe ya lendaka vwanda mingi ya yawu na nkokila yayi. Beto na kutala ke na kuvutukaka manima mpe samu na kuzwa lufulu kisika beto ke nata yawu, mpe awa na nkokila yayi beto ke monikisa bima ya kieleka ya kimpeve. Beno bambuka moyo ntangu yayi, mu vwandaka me tuba yawu, beno fwana lwata mbanzulu ya beno ya kimpeve. Kasi beno

tala mbote Masonuku, ya fwana vwanda *na kati* ya Masonuku, mpe ya fwana vwanda *na nzila* ya Masonuku. Beno me mona? Ntangu yayi beno bambuka moyo. . . Kaka luzabu ya Ndinga, na kutubaka, “Mbote, mu salaka lukolo ya bambuta. Mu salaka lukolo ya Biblia. Mu salaka lukolo ya nene.” Yina ke tuba kima ve. Ba-Pharisien mpe ba-Sadducéen salaka kima mutindu mosi, mpe kondwaka na kuzaba Yesu na mafuku ya bakilometele. Beno me mona?

³⁰ Masonuku, luzayikisu ya Masonuku, “ya kele ya kubumbama na meso ya bantu ya ndwenga mpe ya mayela, mpe me monana na bana yina zola kulongoka.” Na yawu ti beno mpe mpe munu kuvwanda bana mpe beto fungula kaka bantima ya beto, mpe kutuba, “Mfumu, Nge—Nge tuba na beto, mpe beto—beto ke na kuwa.” Mpe kuna simba nsalulu ya kimpeve. Ntangu yayi beno bambuka moyo ti, bampova yina ke tubama na nkokila yayi, beno simba nsalulu ya kimpeve, samu ti beto ke kota na nsungi ya dibuundu ya mansweki ya nene.

³¹ Ntangu yayi, mu banza ya vwandaka kaka yina. Awa beno bambuka moyo mbasi na nkokila, beto konso nkokila ke bakaka nsungi mosi ya dibuundu yankaka. Mpe mu ke kwikila ti beto lendaka kuzwa ntangu mingi mbasi samu na kutala kilumbu ya muvimba yayi, mpe dyaka mbasi na nkokila mpe. Kasi, beno me mona, mingi ya bawu ke sala mpe mu ke meka kaka na kubaka mambu ya ngudi ya nsangu yayi, kubaka mambu yina ba me zonzila awa, yina beno lendaka baka mosi ya yawu mpe kulandila kaka, kubaka yawu tii ya kele ve kaka na kutuba kisika ya ke kwenda. Beno me mona? Kasi. . . Mpe na manima beno longoka yawu na yinzo, mpe mu ke sambila samu na beno, mpe beno vwanda na kusambila samu na munu, mpe Nzambi sakumuna beto nyonso mutindu bana ya Yandi yina ke kwikama.

³² Ntangu yayi ntete beto banda, mu ke kumiyufula kana ya ke vwanda ve mpasi mingi na beno kana beno lenda telama.

Mpe beno zaba samu na yinki mu ke zolaka kutelama mpe kusambila? Yesu tubaka, “Ntangu beno ke telama, na kusambila, beno sambila, ‘Tata ya beto Yina kele na Mazulu.’ Na yina lemvokele mosi na mosi.” Beno me mona? Mpe dyaka Gédéon solaka basoda ya yandi kilumbu mosi na kati ya bayina kondamaka mpe fukamaka mpe vwandaka kunwa maza na ludima, to bayina vwandaka ya kutelama mpe vwandaka baka maza. Beno me mona? Na yawu bayina vwanda kubwa, bayina vwanda—vwanda fukama na ntwala ya biteki, mpe yandi zabaka ti bawu vwandaka ve bantu ya kukwenda. Na yawu, bayina vwanda ya kutelama na meso ya bawu na kutalaka mbote ntangu nyonso. Ya kele mutindu beto ke salaka, kutelama mpe kusambila. Ntangu yayi, mu ke kwikilaka na kufukama mpe kusambila, mpe; kasi, kutelama mpe kusambila, mu banza ya zola kaka kutuba kima mosi samu na beto, na mutindu nyonso.

Beto kulumusa bayintu ya beto ntangu yayi, mpe konso ntima kuvwanda ya kukulumusa:

³³ Tata ya Mazulu ya kufuluka na lemvo, na yina ntangu yayi beto ke na kubelama na buzitu na Kiti ya Nge ya ludedomo. Mpe beto ke na kukwizaka ve samu na kulomba Nge na kupesa beto ludedomo, samu ti beto nyonso ke kufwa, kasi beto ke na kukwiza, na kulombaka “Kyadi, O Mfumu!” Tsyamuna na zulu ya beto, na nkokila yayi, ya Nge Mpeve-Santu; ve samu ti beto kele ya kulunga, kasi samu ti beto kele ya kulunga ve, mpe me bakula yawu mpe zaba yawu, mpe ke na kwizaka ve na nkumbu ya beto mosi, samu ti ya kele ve ya kulunga. Beto kele na ata ludedomo, to—to kima mosi ve, nkadulu ya beto ya kulutila mbote ke vwanda bitende ya yimbi na meso ya Nge. Na yawu beto ke kwiza ya kulemvuka na Nkumbu ya Mfumu Yesu, na kunataka Yandi na ntuala ya beto, Menga ya ngwisani ya Yandi, na kunataka Yawu na zulu ya ntima ya beto, mpe na kutubaka, “Nzambi, vwanda na kyadi na beto misumuki bayina ke na kulombaka kyadi na ngunga ya mpasi yayi.” Ti, ntangu kilumbu dilongi ya nsuka ke longama, beto zaba ve na wapi ntangu ya ke vwanda; na kilumbu ya nsuka ya ke vwanda na kuboka ke wakana na zulu; Biblia ke vwanda ya kukangama na zulu ya chaire; minduki ke vwanda ya kukutika; mpe makelele ya extinction ya tiya ke wakana; mwini ke kota. O Nzambi! Kuna bumba munu, O Ditadi Ya Bansungi, na ngunga yina.

³⁴ Mpe beto ke mona ti ya kele ve na nzila ya kukimina ntangu yayi, kima ve kasi na Nge. Beto ke na kumona bayinsi ke na kupanzana. Beto ke na kumona Biblia ngunga. Beto ke na kumona Israël kuvumbuka. Beto ke na kumona Nsangu na Dibundu. Mpe ngunga me belama na kusuka, na ntangu bima ya nene ke monana, mpe Bidimbu Sambwadi ke zibuka.

³⁵ Nzambi, Nzambi, O Nzambi, tala beto kyadi, beto ke lomba kyadi. Mpe mutindu kisadi ya Nge, mu ke lomba kyadi samu na mosi na mosi na Mvwandulu ya Kinzambi na nkokila yayi. Nzambi, ti ya vwanda ve na muntu mosi na kati ya beto yina kele na disumu na moyo ya bawu, kasi ti ya vwanda ya kuvedisa kaka ntangu yayi na nzila ya Menga ya Mfumu Yesu, samu ti beto nyonso kukutana na kisika yango ya mbote kuna na zulu.

³⁶ Mpe na yina mu ke na kubelama na Masonuku yayi na nkokila yayi, Tata, oh, mu kele ve ya kulunga. Nzambi, ya kele na ata mosi ya beto ya kulunga. Beto me ndima beto zaba kima mosi ve, Tata, kasi beto ke na kutalaka kaka na Mpeve-Santu ti Yandi lendaka monikisa beto. Na yina beto ke tuba landila luzabu ya beto—ya beto ya yintu yina Nge pesaka beto, disolo, ti Mpeve-Santu pesa nsalulu ya kimpeve na bantima ya beto. Pesa yawu, Tata, samu beto ke vingila na Nge na Nkumbu ya Yesu Mwana ya Nge. Amen. Beno lenda vwanda.

³⁷ Na kapu ya 2 ya Buku ya Apocalypse, mpe dibuundu ya zole, nsungi ya dibuundu ya tatu. Kubanda . . . [Mpangi mosi ya kento ke na kuzonzaka na ndinga—Mu.] beno lemvokila munu.

³⁸ Tata ya beto yina kele na Mazulu, bika Nkumbu ya Nge kuvwanda ya santu. Kimfumu ya Nge kukwiza, luzolo ya Nge kuvwanda, na ntoto mutindu ya kele na Mazulu. Beto ke lomba Nge na kuvwanda na beto, Tata, mpe sakumuna beto, mpe sadisa beto na kuvwanda bamfumu-bisadi ya ndwenga na kati ya ngunga yayi ya nene ya mpasi na kati ya bantu. Na yina potopoto mpe nyonso ke na kulandila, sadisa beto na kuvwanda ya beto ya mbote ya kulutula, Mfumu, samu na kuvwanda bisadi ya Nge na nzila ya Nkumbu ya Klisto. Amen.

³⁹ Ntangu yayi, mu vwandaka me tuba yawu ntete, samu ti beno zaba. Beno me tala ntendulu me kwiza ve na Ndinga? Mpangi ya kento vwandaka ya kupakulama na Mpeve-Santu, kukondwa ntembe, kasi yandi vwandaka me pesa nsangu na manima Ndinga me kota, beno me mona. Ya kele kaka mwa fyoti na kusungama ya kima mosi. Ntangu yayi, yina vwandaka kaka nyonso ya kulunga, mpangi ya kento ya luzolo, muntu nyonso yina ya kele. Mpeve-Santu na zulu ya beno, oh, ya kele mpasi mingi na kukanga yawu, mu zaba. Ya kele kaka mutindu . . . To ntangu beno ke vwanda na kutuba kima mosi yankaka mpe . . . Beno me mona, kasi ya vwandaka nyonso ya kulunga; kasi nge kukondwa ntembe vwanda kuwa yawu ntete ti beto banda, beno me mona. Mpe ya kele samu na yina, beno me mona, ya me vutuka ntangu Mpeve ke na kusalaka. Bampeve ya baprofete kele ya kutumama na baprofete, beno me mona. Mutindu beno.

⁴⁰ Ntangu yayi, ya lendaka vwanda ti Mpeve-Santu kupakula dyaka beno, kaka . . . Mu banza ti Yandi ke sala, kaka na manima lukutakanu me manisa. Mpe beno tala mbote ntendulu kukwiza, beno me mona, samu ti ya ke vwanda kaka ya kusungama kuna, beno me mona; kasi beto ke na kubelama kaka na Ndinga, beno me mona, na kati awa. Na yawu, ntangu yayi, yina vwandaka kieleka ya Nzambi, kieleka ya me vwanda; mu ke kwikila yawu mpe ke kuwa yawu na ntima ya munu nyonso, samu ti mu ke kuwa kuvutuka ya yawu, beno me mona. Kasi Mpeve-Santu . . . ya vwandaka ve ntangu. Yandi kele na nsangu samu na mpangi ya kento samu na dibundu, kasi *awa kele* kisika Yandi ke na kupesaka Nsangu ya yandi ntangu yayi. Beno me mona, Yandi ke sala ve muvusu na Yandi mosi, Yandi ke tula bima nyonso na kisika. Mu ke kwikila muntu nyonso me bakula, beno me mona, ya kele kaka ya kulunga.

⁴¹ Ntangu yayi na—na kapu ya 2 ya Buku ya Apocalypse. Mpe ti . . . Beto ke banda na nkokila yayi na—na Nsungi ya Pergame, na kapu ya 12. Ntangu yayi, mazono na nkokila beto sukisaka na nzila ya 11:

Yandi yina kele na dikutu, ti yandi kuwa yina Mpeve ke tuba na mabuundu; Yandi yina ke nunga ke tala ve mpasi na nzila ya lufwa ya zole.

⁴² Ntangu yayi, na nsungi ya dibuundu ya ntete, beto talaka ti ba-Nicolaïte bandaka kuna. Nzambi monanaka Yandi mosi mutindu. . . Yesu kumonana Yandi mosi mutindu Nzambi ya Ngolo nyonso: ve yankaka, bandambu ve, bitini ya Nzambi ve, Yandi vwandaka Nzambi mosi.

⁴³ Ntangu yayi, na nsungi ya dibuundu ya mazono na nkokila, beto talaka ti Yandi telamaka na mwelo mpe Yandi sonikaka bima yayi na dibuundu, mpe tubaka na bawu na bumputu ya bawu. Kasi Yandi tubaka ti bawu vwandaka na. . . ba-Nicolaïte yayi, mpe nyonso yankaka, ti Yandi vwandaka yina yawu.

⁴⁴ Mazono na nkokila bawu vwandaka. . . lwataka yimpu ya martyr. Yandi tubaka na bawu na kuvwanda ve na boma, ya lufwa, ti Yandi ke—Yandi ke vwanda na bawu. Mpe na manima na nsuka Yandi tubaka, “Yandi yina ke nunga! Yandi yina ke nunga ke tala ve mpasi ya lufwa ya zole.”

⁴⁵ Ntangu yayi, kana ya kele na lufwa mosi, mpe beto zaba yawu, na yina ya fwana vwanda na lufwa yankaka kisika mosi; samu ti lufwa mosi beto ke kufwa na yawu awa na nsuni, lufwa ya zole beto ke kufwa na yawu na kimpeve, moyo. Ya kele, “Mpe moyo yina ke sumuka kieleka yawu ke kufwa.” *Kufwa* kele kaka, “kieleka kubasika na nyonso;” beno me mona, beno kele—beno kele. . . *Lufwa* zola kutuba, “yina ba me katula, ya kele—ya kele—ya kele yina ba me natama ntama, yina ba me bumba ntama.” Na yina ntangu baya beto ya luzolo ke kufwaka, bawu kele na ngaanda ya luzingu na yinza landila mutindu beto zabila. Beto ke bokilaka yawu lufwa.

⁴⁶ Kasi Muklisto ke kufwaka ve. Ya kele ve na Masonuku ti Muklisto ke kufwaka, samu ti yandi kele na Luzingu ya Kukonda nsuka. Ntangu musumuki ke kufwaka, ya yandi yimeni, mpe na nsuka moyo ya yandi ke kufwa. Kasi ntangu Muklisto ke kufwaka, yandi ke vingila kaka na Yesu na kuvutuka dyaka. Oh, mu banza ti mu kele na ntangu na kukuma na yawu na nsuka ya vision yayi na nkokila yayi, na yina kisika beto ke vutuka; mpe beno ke mona yawu, mutindu yawu ke kotisa kima mosi yango ya lufwa ya zole. Kapu mosi yayi beto kele na yawu na nkokila yayi ke kotisa kima mutindu mosi, mpe mutindu mosi ya kitoko ya nsalulu awa.

⁴⁷ Ntangu yayi—ntangu yayi, na nkokila yayi, beto ke tanga mukanda yayi na nswalu kaka, samu ti mu kele na mwa—mwa nsangu landila masolo yina beto ke zola kubaka na ntete, mpe kumeka kubumba beno ve ntangu ya yinda. Ntangu yayi, na. . . na manima balukutakanu yayi me manisa, ntangu nyonso yina mu me tanga yayi mbangu mingi, kana beno zola kuzwa nsalulu ya yawu; Mpangi ya bakala Mercier awa kele na yawu nyonso,

mu ke pesa kaka banoti na yandi; mpe yandi lenda samu ti yandi ke na kusonikaka buku, yandi ke pesa beno kima nyonso beno zaba . . . beno—beno ke zola na zulu ya yawu. Ya ke vwanda mbote, Mpangi bakala Mercier.

⁴⁸ Nzila ya 12:

Na wanzio ya dibuundu ya Pergame sonika; Bima yayi me tuba yandi yina kele na mbele ya meno na balweka zole;

Mu zaba bisalu ya nge, mpe kisika nge ke zingaka, mpe . . . kiti ya Satana kele . . . mpe nge me kangama mingi na nkumbu ya munu, mpe me manga ve lukwikilu ya munu, mpe na bilumbu yango kisika Antipas vwandaka martyr ya munu ya kukwikama, yina ba kufwaka na kati-kati ya nge, kisika Satana ke zingaka.

Kasi mu ke na bima fyoti ya kutelemina nge, samu ti nge ke yinaka kuna bawu yina ke kangamaka na malongi ya Balaam, yandi longaka Balak na kutula ditadi ya kubwisa na ntuala ya bana ya Israël, samu na kudya bima ba pesaka na munkayulu na biteki, mpe samu na kusala kindumba.

Na yawu nge mpe kele na bawu yina ke kangamaka na malongi . . . (ya kele bisalu kuna na Ephèse, awa ya me kuma “malongi”) . . . malongi ya ba-Nicolaïte, . . . (Beno ke bambuka moyo na nkokila yankaka yina mu vwandaka tubila beno yawu, mutindu ya belamaka na yawu? Mavanga na Ephèse, awa ya kele “malongi”) . . . malongi ya ba-Nicolaïte, bima yina mu yina. (Uhm!)

Beno balula ntima; to ve mu ke kwiza na nswalu na nge, mpe mu ke nwana na kuteleminaka bawu . . . (ve Dibuundu ya kieleka) . . . bawu na mbele ya yinwa ya munu.

Yandi yina kele na dikutu, ti yandi kuwa yina Mpeve ke tuba na mabuundu; Na yandi yina ke nunga mu ke pesa ya kudya mani ya kubumbama, mpe ke pesa yandi (yandi) ditadi ya mpembe, mpe na ditadi nkumbu ya malu-malu kele ya kusonama, yina muntu ve zaba kana kaka yandi yina me kuzwa yawu.

Ntangu yayi ti Mfumu kubwela ya Yandi balusakumunu na Yayi, mpe sadisa beto ntangu yayi na yina beto ke meka.

⁴⁹ Ntangu yayi samu na lufulu ya dibuundu yayi. Ya kele nsungi ya dibuundu ya tatu, yina ba ke bokila Pergame. Mpe kilumbu dibuundu yayi zingaka vwandaka kubanda mvula 312, mvula 312 ya ntangu ya beto tii mvula 606.

⁵⁰ Nsungi vwandaka: malongi ya luvunu, luvunu ya Satana, lufulu ya kuyala ya bupaapa, mpe kuvukana ya dibuundu mpe luyalu.

51 Musendo vwandaka: mani ya kubumbama, ditadi ya mpembe.

52 Mpe mbwetete, wanzio ya dibuundu yayi, na nzila ya nyonso yina Mpeve-Santu ke bika munu kusala, mu me sola Santu Martin. Ya vwandaka luzayikisu yina pesamaka na munu na yawu, na kutangaka na basantu yankaka na ntangu yina. Mu me sola Santu Martin samu ti yandi vwandaka muntu ya kinzambi, landila dibanza ya munu yandi vwandaka bambala kumi kulutila ntumwa na yina vwandaka Santu Patrick.

53 Ntangu yayi, Santu Patrick vwandaka mwana-nkazi ya Santu Martin; mpangi-kento ya Santu Martin vwandaka mama ya Santu Patrick. Mpe Santu Martin vwandaka . . . ya kieleka, ya vwandaka ngwa-nkazi ya Santu Patrick.

54 Ntangu yayi, luzingu ya yandi vwandaka na mvula 315 ya ntangu ya beto tii mvula 399. Ntangu yayi awa kele samu na yina mu me sola yandi kulutila na bansantu yankaka ya kilumbu yina, ya kele samu na mutindu yina yandi vwandaka yandi mosi. Mpe na yisi ya lutwadusu ya Nzambi, mu ke kwikila ve ti . . .

55 Ntangu yayi, dibuundu ya Katolika sonikaka ve nkumbu ya yandi mutindu santu, ba ndimaka yandi ve, mpe ya kele samu na yina dyaka mu me sola yandi. Uh-huh, uh-huh. Mpe nyonso bayayi yina beto ke na kumonaka, yina kele na ministele ya kimpeve, dibuundu yango ya ntete kumangaka. Dibuundu ya ba-Nicolaïte kumangaka yawu samu na bima yayi: ba vwandaka ya kimpeve. Mpe mutindu mu fikulaka awa, ba basisaka Dibuundu mpe malongi ya ba-Nicolaïte vwandaka ya—vwandaka lutangu ya kulutila; mpe Dibuundu ya kieleka vwandaka ndambu, ya ke vwandaka ntangu nyonso.

56 Mpe mutindu mu tubaka na ntonono, ya vwandaka Yesu yina tubaka, “Beno vwanda na boma ve, mwa nkonga ya mameme, ya kele Tata ya beno yina me tala mbote na kupesa beno Kimfumu.” Ya kele samu na yina mu ke tulaka Kimfumu na Kimfumu ya kimpeve. Mpe beto kele . . . kele na Kimfumu ya kimpeve, mpe beto kele na kyese mingi samu na yawu, mpe Ntinu na Kimfumu yayi. Beno bambuka moyo, Yandi kele Ntinu ya basantu (*ya bayina kele santu*), Yandi kele Ntinu yina ke twadisaka bawu.

57 Luzingu ya Santu Martin vwandaka . . . kele mosi ya baluzingu ya kufuluka na bimangu ya nene na muntu nyonso na bansungi ya dibuundu. Kubanda nzila nyonso na Santu Paul, yandi vwandaka mosi ya muntu ya kulutila kimpeve. Yandi vwandaka . . .

58 Mosi ya bimangu ya yandi ya ntete vwandaka . . . Yandi vwandaka soda, na kubanda, mu banza. Mpe kuna kilumbu mosi yandi vwandaka kwiza mpe kuna vwandaka na muntu . . . Muntu mosi—mosi vwandaka ya kulala, na madidi mpe vwandaka tekita, mpe bantu nyonso yina vwandaka zola . . . to, vwanda zola ve, kasi vwandaka na lenda ya kusadisa muntu yango,

bawu vwandaka luta kaka yandi mutindu nganga-Nzambi mpe ba-Levite salaka na *Samaritain ya Mbote*. Kasi ntangu Santu Martin lutaka, bakulaka kisalu ya yandi mutindu mukwikidi ya Muklisto, yandi vwandaka na kazaka mosi, cape mosi na zulu ya mapeka ya yandi, yandi me zenga yawu na zole na mbele ya yandi mpe me pesa ndambu ya yawu na mulombi, yandi me baka ndambu yankaka. Mpe nkokila yina bandaka kisalu ya yandi, samu, Yesu Klisto monanaka na yandi, na vision, ya kufuka kazaka mosi yina yandi zengaka ndambu na zole; yina lungisaka Masonuku, “Ntangu nyonso yina beno ke sala na bayayi, beno me sala yawu na Munu.”

⁵⁹ Na yawu beno baka yawu mutindu leso. Nyonso yina beno ke sala na muntu, beno ke na kusalaka yawu na Klisto. Beno bambuka kaka moyo. Ntangu yayi beno. . . Beto tuba yawu kintwadi [Mpangi Branham mpe dibuundu ke zonga na kintwadi—Mu.]: “Yina beno ke sala na bayankaka, beno me sala na Klisto.” Na yawu ata yina yandi ke banza na beno, ya kele yina beno ke banza na yandi, beno me mona, yina ke nataka lusakumunu.

⁶⁰ Yina vwandaka kimangu ya yandi ya ntete mpe ntonono ya ministele ya yandi. Ya kele na mingi na yawu, mu—mu ke kuzwa ve ntangu. Samu ti mu zola beno kuvutuka mbasi na nkokila mpe konso nkokila, na yawu mu zola ve kubumba beno ntangu ya yinda.

⁶¹ Mbote mingi, kimangu yankaka yina mu me sola na kuzonzila na nkokila yayi.

⁶² Yandi vwandaka bebisa kieleka bumpani, mpe yandi vwandaka kieleka ya kutelemina dibuundu ya Rome. Kieleka yandi vwandaka wisana ve na ba-évêque nyonso ya dibuundu ya ntete ya Rome, yandi. . . bawu vwandaka kuma mutindu yinza mpe nyonso mutindu yina, mpe yandi teleminaka bawu. Kieleka yandi vwandaka ya kutelemina bawu. Ya kele kimangu ti yandi zingaka na mutindu ya bawu ya bilumbu. Ntangu yayi. . .

⁶³ Kasi yandi vwandaka bebisa kisanga ya mimpani kilumbu mosi, mpe vwandaka tsyamuna autel ya mimpani, mpe ya vwandaka na yinti mosi ya santu ya kutelama na lweka ya autel ya mimpani. Mpe yandi vwandaka zenga yinti yayi, mpe bantu mingi ya kutelama na lweka vwandaka zolaka yawu ve. Yandi tubaka, “Kana mu kele muntu ya Nzambi. . . Beno kanga munu na lweka yinti yango kele ya kutengama mpe beno bika yinti yango kubwa na zulu ya munu. Kana mu kele muntu ya Nzambi. . . Kana mu kele ve muntu ya Nzambi, yinti ke kufwa munu. Kana mu kele muntu ya Nzambi, Nzambi ya munu lenda balula yinti yango kisika yankaka.” Wapi mutindu ya kutelemina! Na yawu bawu bandaka na kuzenga yinti; mpe na yina yinti bandaka na kubwa, ya balukaka mpe kufwaka nkonga ya bitadi. Nzambi balulaka yawu na mongo. Kimangu! Oh,

ntangu nyonso bimangu vwandaka vwanda na balukutakanu ya yandi.

⁶⁴ Kimangu yankaka yina mu me banza na kuzonzila, ya vwandaka bébé ya kufwa yina yandi lalisaka nzutu ya yandi na zulu. Mpe yandi vumbukaka dyaka na luzingu, na manima yandi me sambila mwa ntangu samu na bébé yayi.

⁶⁵ Mosi yankaka yina kele ngitukulu samu na munu, vwandaka ya ntinu. Mpe yandi vwanda kwenda kufwa bantu ya Nzambi ya kufuluka na Mpeve-Santu. Mpe kieleka yandi vwandaka diboko ya kibakala ya—ya évêque ya dibuundu ya ntete ya Rome, na ntangu yina, mpe yandi kieleka vwandaka pape ya ntete yandi vwanda ya kubokila pape. Nkumbu ya yandi vwandaka D-a-m-a-s-s-e, mpe yandi vwandaka tula Baklisto nyonso na lufwa yina yandi zolaka kuzwa na kutula na kufwa. Mpe—mpe kento ya ntinu yayi, mumpani, mpe ntima ya yandi vwandaka ya kufuluka na mpimpa.

⁶⁶ Mpe ntangu Santu Martin ya santu yayi kwizaka samu na kulombila, kento ya yandi tubaka yawu na yandi ti yandi ke zola kulombila samu na Baklisto yayi samu ba kufwa bawu ve. Kieleka, ntangu yandi na nsuka kumaka na yandi, yandi salaka ve kima ya mbote, samu ti yandi vwandaka kaka muntu ya diboko ya kibakala na pape yayi; na yawu yandi kufwaka na mutindu Baklisto yango ya kufuluka na Mpeve-Santu.

⁶⁷ Kasi Santu Martin zolaka kusolola na yandi, mpe mikengi sutopeke yandi na nkotolo. Mbote, Santu Martin kubwaka na kizizi ya yandi mpe lalaka kuna mpe sambilaka tii Nzambi talisaka yandi kukwenda na kati. Ntangu yandi telamaka kuna, yandi belamaka na myelo yango ya kukangama mpe ya fungukaka na yawu mosi, yandi landilaka na kutambula.

⁶⁸ Ntangu yayi, yayi kele disolo, yayi kele kaka ve muntu me sonika na yandi, mpe kaka mutindu mosi ya fyoti. . . Kana kima mosi, bawu zolaka kuzwa yimbi, kana ya vwandaka dibuundu mosi vwandaka zonzila; to, mu ke tuba, na nyonso, kulutila dibuundu ya pape, bawu zolaka tanguna ve bima yango. Kasi, beno me mona, disolo ke tubila na kieleka. Beno me mona?

⁶⁹ Mpe muntu yayi mataka kaka, Santu Martin, mpe kaka na lweka ya konso mukengi, mpe nyonso yankaka, mbala mosi na ntwala ya ntinu. Mpe ntinu zolaka ve kuzitisa kisadi ya Nzambi. Beno zaba, yina—yina kele ve—yina kele ve mutindu ya mbote. Na yawu yandi balukaka kaka yintu ya yandi mpe zolaka mpe ve kuzitisa yandi. Beno zaba yinki Nzambi salaka? Yandi mekaka na kuzonza na yandi kasi yandi bika kaka yintu ya yandi ya kubaluka, mpe Nzambi zolaka sala mumpani yayi kupesa buzitu na kisadi ya Yandi. Na yawu Yandi tulaka kaka kivangu yango tiya, mpe ya nyengisaka yandi na kubasikaka yandi na kiti, telemisaka yandi, salaka yandi kutelama.

⁷⁰ Ntangu yayi yina—ntangu yayi yina kele disolo ya Biblia, *Lukutakanu ya Nicée*. Yandi zolaka zitisa kisadi ya Nzambi; Yandi salaka yandi kutelama. Ya nyengisaka mpe kiti kisika yandi vwandaka ya kuvwanda; tiya lutaka na nzutu ya yandi mpe nyengisaka yisi ya kiti, mpe yandi zolaka dumuka kuna. Nzambi kele na mutindu ya kusala mambu, beno zaba. Uh-hum. “Nzambi kele na kiyeka ya kubasisa bana samu na Abraham na matadi yayi.” Mpe beno bambuka moyo, Nzambi yango mosi yina ke na kuzingaka na kati-kati ya beto na nkokila yayi. Ya kele Nzambi mosi. Mbote mingi.

⁷¹ Mpe dyaka yankaka yina mu ke zolaka, mpe na manima mu ke sutope. Mu kele na mosi awa, kasi mu. . . Ntangu yayi yayi kele mosi yina mu ke zolaka mingi, na yina yandi vwandaka vingila kilumbu mosi na bantu ya yandi, na kati ya kivinga ya yandi ya kutanga.

⁷² Mpe yandi—yandi vwandaka muntu mosi ya nene, mpe yandi vwandaka twadisa Dibuundu yayi ya kifuluka na Mpeve-Santu, mpe beto nyonso. . . Oh, yandi vwandaka. . . vwandaka na bawu nyonso ya kifuluka na Mpeve, dibuundu ya yandi nyonso. Mpe bisika nyonso na ngaanda na yinsi nyonso, Baklisto vwandaka sala bimangu mpe bidimbu mpe mambu ya ngitukulu.

⁷³ Beno me mona, Nzambi ke zonzaka na munati-nsangu ya Yandi, munati-nsangu ke zonzaka na misambidi. Mpe kuna ya kele yina ke salamaka, beno me mona, Yandi—Yandi ke sala ti misambidi mpe yandi kuvwanda mutindu mosi na Nzambi; beno me mona, Mpeve-Santu vwanda luta na nkonga ya bawu.

⁷⁴ Bambala mingi ntangu bawu vwanda kufwa mutindu barmartyr, bawu vwanda telemisa mulongi kaka na kati-kati ya bawu (mutindu *yina*) mpe vwanda kufwa bawu nyonso na mbala mosi. Mpe mutindu ya yimbi bawu vwandaka sala bantu yango! Bawu vwandaka nyengisa bawu. Bawu vwandaka baka babakala mpe vwandaka koma bawu na. . . na yisi ya nzutu ya yinti, mpe vwandaka zibula bayimbwa ya mfinda, to. . . mpe kubika bawu kudya na mukongo ya muntu, na kubasisaka misopo ya bawu ntete muntu mosi kufwa ntete. Bawu vwandaka baka bakento, ke zenga mabene ya bawu ya kibakala, mpe ke bika bawu ya kutelama kuna na yina ntima ya bawu ke na kubulaka, mpe ke bula kaka tii bawu ke kubwa, ya kubwa, mutindu yina. Bawu vwandaka baka bana na bamama ya bivumu mpe vwandaka dikisa bangulu ya bawu mpe nyonso, kubika bamama kutelama mpe kumona yawu. Mpe mitindu nyonso!

⁷⁵ Ntangu yayi, beno lenda banza ve ti bantu yina ke tubaka kele Baklisto lenda sala yawu. Kasi beno kuwa, Biblia ke tuba, Yesu tubaka, “Ya ke salama ti ba ke kufwa beno, na kubanzaka ti bawu ke na kusalaka kosalu ya Nzambi.” Beno ke bambuka moyo, Yesu mosi yina tubaka yawu, na nzila ya Mpeve mosi,

samunaka dyaka yawu na ntangu ya nsuka. Ya fwana salama. Kana bayayi yankaka salamaka kaka na mutindu ya kulunga na Masonuku, beno tala mbote mpe beno mona kana ya ke salama ve kaka landila Masonuku mpe landila disolo. Nzambi tubaka ya ke salama, beno tala disolo kutuba ya me salama; Nzambi tubaka ya salamaka awa, mpe beno tala kisika ya salamaka. Beno me mona, kaka kieleka. Na yina yinki beto ke sala ntangu beto ke kota na Nsungu ya Dibuundu ya Laodicée (beno me mona, kisika beto kele ntangu yayi) mpe mawa mpe nyonso yina ba tubaka na yawu?

⁷⁶ Na yawu, awa, na yina yayi, yandi vwandaka na kati kuna vwandaka sambila na yina dibuundu ya yandi vwandaka vingila. Mpe kuna vwandaka na mulombi kwizaka na mwelo mpe konkotaka na mwelo ya yandi, mpe yandi zibulaka mwelo (mpe yandi vwandaka na bisalu mingi), mpe yandi tubaka na yandi ti yandi vwandaka na nsatu ya kilele. Yandi vwandaka kinkonga mpe vwandaka na kima ve, ya vwandaka na madidi, mpe yandi tubaka . . . Yandi me fidisa yandi na kwenda mona mfumu ya badiakre. Mpe mfumu ya badiakre dasukilaka yandi mpe basisaka yandi na ngaanda. Mpe na yina yandi salaka, yandi tambulaka na ziunga, yandi vutukaka dyaka mpe tubaka na Santu Martin ti—ti diakre vwandaka me basisa yandi na ngaanda.

⁷⁷ Mpe na yawu kuna, na ntangu yango, mfumu yayi ya badiakre me vutuka mpe me tuba na yandi na mwa mutindu ya ngolo, ti, “Dibuundu ya nge ke na kuingila na nge! Nge ke na kusalaka bawu kuingila!” Kasi yandi vwandaka sambila. Ya vwandaka mbote ti yandi kuvwanda na kati ya kisambu tii yandi kuwaka luntwadusu ya Nzambi na kubasika.

⁷⁸ Mpe mulombi yayi vutukaka na mwelo. Mpe Santu Martin katulaka kilele ya yandi mosi ya mbote mpe pesaka yawu na mulombi, mpe yandi salaka mfumu ya badiakre kukwenda mpe kuzwa mosi yankaka mpe kunatila yandi yawu. Na yawu yandi zolaka kuzwa kilele, na mutindu nyonso, mpe samu na kulwatisa yawu Santu Martin. Mpe yandi lwataka kilele ya mbote mingi ve na ntwala ya bantu na kisika ya kilele ya mbote ya yandi.

⁷⁹ Beno me mona ya ke talisa kaka: beno pesa yina kele na beno ya kulutila, beno pesa luzingu ya beno, beno pesa ntangu ya beno, beno pesa nyonso na Klisto. Mpe Mpeve mosi yina zingaka na kati ya Klisto, ke zingaka na kati ya beno, mpe—mpe lutumu ya beno na mfinangani ya beno mpe na zulu ya bantu yina ke salaka na beno, ke vwanda mingi mutindu Klisto tii ya ke sala kima mosi Klisto salaka.

⁸⁰ Na nsuka ya salamaka ti bantu vwandaka lala na bivudi mpe vwanda beluka. Ya—ya kele kieleka, kaka ngolo mingi ya luzolo na ziunga ya bawu. Mpe ba tubaka ti “Ntangu Santu Martin vwandaka longa, na manima yandi me basika ya kulwata kazaka yayi ya mbote mingi ve, ti dibuundu ya muvimba talaka Nsemo

kuzunga yandi.” Uh-huh. Beno me mona? Beno me mona, samu ti yandi salaka kima ya mbote.

⁸¹ Beno sala mbote ntangu nyonso, ya kele kisalu ya beno na Nzambi; beno banza mbote, ya kele kisalu ya beno na beno mosi; mpe beno ke suka mbote. Ya kele kaka, beno fwana kaka.

⁸² Ntangu yayi, beto ke zola kubanda ntangu yayi na kumekaka na kubaka yayi na canon ya bantendulu, na nkokila, samu ti Yawu ke na kusadila awa na ngolo nyonso.

Ntangu yayi, *na wanzio ya dibuundu ya Pergame sonika; Bima yayi yina me tuba yandi yina kele ya meno zole . . . mbele . . . na mbele ya meno na balweka zole;*

⁸³ Ntangu yayi mu zola beno kutala ti Yandi ke na kukotisaka dyaka Yandi mosi na nkokila yayi na Bunzambi. Konso dibuundu vwandaka mosi ya Yandi ya kitezo ya nkembo: Mosi yina vwandaka bambwetete kumi na zole . . . to “bambwetete sambwadi na kati ya diboko ya Yandi, Yandi yina kele na mbele ya meno na balweka zole,” beno me mona, kima yankaka, “Yandi yina kele na makulu ya kisengo, meso yina kele mutindu na . . . mulaka ya tiya.” Yandi ke na kukotisaka dyaka Yandi mosi na Bunzambi ya Yandi.

⁸⁴ Ntangu yayi beno ke tuba, “Wapi kisika Bunzambi kele na yayi, ‘Yandi na mbele ya meno na balweka zole na ngaanda ya yinwa ya Yandi?’”

⁸⁵ Mbote, *mbele* kele “Ndinga.” Hébreux 4, beto bakaka yawu na ntonono ntangu beto talaka Bunzambi yango ya Yandi. Mbele, beto talaka na Hébreux 4:12, ya vwandaka, “Ndinga ya Nzambi vwandaka mbele ya meno na balweka zole.” Ya kele kieleka? Ya vwandaka Ndinga ya Nzambi. Mutindu yina . . . ? Ntangu yayi beno tala mbote, beno ku- . . . beno tala bantendulu yayi. Ntangu yayi beto tala Ndinga yango, Santu Jean 1, “Na mbandukulu” (ntama na manima) “vwandaka Ndinga yina vangaka mazulu mpe ntoto.” Ya kele kieleka? “Mpe Ndinga vwandaka na Nzambi, mpe Ndinga vwandaka Bunzambi. Mpe Bunzambi kumaka nsuni mpe zingaka na kati-kati ya beto.” Ya kele kieleka? “Ndinga kumaka nsuni mpe zingaka na kati-kati ya beto.”

⁸⁶ Mpe beno tala Yandi kele ya kutelama awa, Yandi ya mbandukulu, “Kutuba yayi na wanzio ya dibuundu ya—ya Perga- . . . Pergame. Kutuba yayi na yandi, ‘Mu kele Ndinga ya Nzambi.’” Oh, beto ke mona Yandi ntama na Apocalypse, na kukwizaka na bilele ya kupola na menga, na yimpu na zulu ya yintu ya Yandi, na kunataka mpunda ya mpembe, mpe na dibunda ya Yandi vwandaka ya kusonika, “Ndinga ya Nzambi.” Oh, mu zola yawu. Yandi kele Ndinga, Ndinga ya Nzambi. Na yawu beto monaka Bunzambi yayi kuna na ntonono, samu na kukotisaka Yandi mosi, Yandi kele Ndinga.

⁸⁷ Ntangu yayi, kana Yandi kele Ndinga ya moyo, na yina Yayi ya kusonama na Biblia kele ndambu ya Yandi; na yina kana beno

lenda yamba Yayi, na kati ya Yandi (yina kele Ndinga), Ndinga yayi ke kwizaka na beno na nzila ya lukwikilu, ke kumisaka Yawu moyo, samu. . . Oh! Beno simba Yawu! Ndinga ke kwiza na kati ya beno, kana Mpeve-Santu kele na kati ya kuna, Ya kele moyo ntangu nyonso yina Yawu ke kota, mpe nsilulu nyonso kele kieleka. Kima ve. . . “Na yawu, kana beno tuba na mongo yayi ‘Katuka,’ mpe beno sala ve ntembe na ntima ya beno.” Samu (yinki?) beno kele Bunzambi ke na zonzaka. Beno ke kwikila yawu? Biblia me tuba yawu. Mpe nyonso yina beno ke tuba ke salama kana beno sala ve ntembe, kana beno lenda basisa nyonso ya yinza na beno, kubika Mpeve-Santu kusala beno mwana ya bakala to mwana ya kento ya Nzambi ya kufuluka: kukondwa yinza, kukondwa kubedisa, kukondwa ntembe. Yinki ya kele, kuna? Ya kele dyaka ve beno, ya kele Nzambi na kati ya beno. Na yina beno baka Ndinga ya Yandi, Yawu kele nsilulu, mpe beno tuba, “Tata, ya kele nsilulu ya Nge.” “Satana, . . .” Kima mosi fwana salama. Beno me mona? Beno me mona?

⁸⁸ Ntangu yayi, beno lenda sala yawu ve tii ntangu Nzambi ke monikisa na beno kuna wapi mutindu dyambu yango ke vwanda. Beno me mona? Na yina ntangu beno ke zaba mutindu dyambu yango ke vwanda, kuna beno lenda tuba, mutindu Yesu. Yandi *vwandaka* Ndinga. Ya kele kieleka? Mpe dyaka Yesu, muntu, tabernacle, tubaka, “Mu ke salaka kima mosi ve kana ti Tata talisa Munu ntete.”

⁸⁹ Na yina ya kele ve Ndinga kuna tii ntangu yawu ke talana na beno. Beno me bakula yawu? Ata ti bantu ke tuba, “bilumbu ya bimangu me luta,” Ndinga me monisama ve na bawu. Kukondwa ntembe ti bawu lenda ve kukwikila na Mpeve-Santu, Ndinga me monisama ve na bawu. Kukondwa ntembe bawu lenda mona ve luzayikisu ya mbotika na Nkumbu ya Yesu Klisto, Ndinga me monisama ntete ve na bawu; mpe dyaka bawu kele ve na Masonuku mosi na kubanda, ya kele na kisika ve kisika muntu kubotamaka na mutindu yankaka.

⁹⁰ Na yina me tala Mpeve-Santu, Biblia ke tubaka ti “Muntu ve lenda bokila Yesu Klisto, kaka na nzila ya Mpeve-Santu,” mpe bantu kuna ke tubaka ti bawu ke kwikila ve ti Mpeve-Santu kele kieleka. Beno me mona? Beno me mona, ya kele ve ya kusala samu na bawu. Yesu tubaka, “Muntu mosi ve lenda kwisa na Munu kana Tata ya Munu me bokila yandi ntete ve. Mpe nyonso Tata me” (na ntangu me luta) “pesa Munu ke kwiza na munu.” Oh, ya kele kitoko ve! “Nyonso yina Tata me pesa Munu, ke kwiza na Munu. Ata mosi ya bawu ke zimbana kana mwana yina ke zimbana, mpe Mu ke. . . (yandi kubutamaka samu na lukano yina), mpe mu ke vumbula dyaka yandi na kilumbu ya nsuka.”

⁹¹ Oh, la la! Ya kele kisika bankumbu ya beto kele ya kutula na Buku ya Luzingu ya Mwana- dimeme: kubanda mbandukulu ya yinza. Ya kele ve kitoko! Wapi mutindu beto lenda sala ntembe?

⁹² O Nzambi, katula ntembe na kati-kati ya beto, zenga kaka bantima ya beto ya mawa tii ya ke vwanda dyaka na ntembe na kati-kati ya beto. Ya kele kisambu ya munu. Nata kaka ntama ntembe nyonso, Mfumu. Ti mu zinga na mutindu ya mbote, ya kulemvuka, mpe kutambula mutindu—mutindu mwana-dimeme ya Nzambi na zulu ya ntoto. Ti—ti mu tambula mutindu Yandi tambulaka. Ti mu zonza mutindu Yandi ke zonzaka. Ti bamatofi ya munu kuvwanda mutindu bamatofi ya Yandi. Ti—ti munu. . . Ti bayankaka kutala Yesu na kati ya munu. Ti mu zimbisa munu mosi mpe mu tala yawu, Mfumu, na kati ya Nge. Kaka yawu, ti mu zimbisa kaka munu mosi mpe kutala yawu na kati ya Nge; kaka ya kuzikama nyonso na kati ya Klisto tii ya kele dyaka ve na kivinga samu ntembe ve, kaka yina Yandi ke tuba.

⁹³ Ntangu yayi, beno basika ve awa mpe kutuba, “Nkembo na Nzambi! Alleluia! Lukumu na Nzambi! Beno me mona yina mu lenda sala? Nkembo na Nzambi!” Beno me kuzwa Yawu ntete ve. Ya kele ve mutindu Yandi salaka yawu, ve, Yandi bulaka ntulu ve mpe tubaka, “Beno me mona yina Mu lenda sala? Yinga, tata. Mu kele kin- . . .” Ve. Yandi ata mbala mosi ve me bakaka lukumu samu na kima mosi ve, Yandi pesaka yawu na Nzambi mpe tambulaka na mutindu ya kulemvuka mpe mutindu ya mbote, na mutindu mosi ya mupepe na ziunga ya Yandi tii bantu vwandaka zola kaka na kuvwanda pene ya Yandi. Kaka bambeni ya Yandi. . . Mpe Yandi zolaka mingi bawu ti mpe Yandi vwandaka sambila samu na bawu bambala mingi, ntangu nyonso. Mpe yina vwandaka mutindu samu na beno, mutindu samu na munu, samu na kusala na bayankaka mutindu Yandi salaka samu na beto.

⁹⁴ Awa, beto ke zola kutala awa dyaka ntangu yayi, na nzila ya zole, yina ke vwanda na 13:

Mu zaba bisalu ya nge, mpe—mpe kisika nge ke zingaka, mpe. . . kiti ya Satana kele. . . mpe nge me kangama mingi na nkumbu ya munu, mpe me manga ve lukwikilu ya munu, . . .

⁹⁵ Beno me mona, bawu ke na kuzingaka kisika Satana kele ya kuvwanda, mpe dyaka bawu ke na kubumbaka Nkumbu ya Yesu. Beno me mona, “Mpe me manga ve lukwikilu ya Munu.” Wapi mutindu ya lukwikilu Yandi pesaka bawu? Lukwikilu ya Pantekote, na ntonono. Ba vwandaka na lukwikilu ya ba-Nicolaite kuna, kubongisa ya dibuundu, mpe nyonso yankaka, yina ba vwandaka tunga, dibuundu na kubandaka na yisi ya kubongisa; kasi Yandi tubaka, “Beno me kwenda ntama na yawu, beno me yina yawu, mpe Munu mpe. Mpe beno me manga ve Nkumbu ya Munu; beno me landa ve mutindu ya bawu ya ntama ya balusambulu mpe nyonso, beno me vwanda kaka mbala mosi na Nkumbu ya Munu. Mpe beno kele dyaka na lukwikilu ya Munu mutindu ya vwandaka na ntonono.” Oh, Mu zola yawu!

. . . *me manga ve lukwikilu ya munu, mpe mutindu na bilumbu yango kisika* (Mu banza beno ke tanguna yawu A-n-t-i-p-s) *Antipas vwandaka mbangi ya munu ya kukwikama, yina ba kufwaka na kati-kati ya nge, kisika Satana ke zingaka.*

⁹⁶ Mu ke telama kuna kaka minuti. “Kiti ya Satana.” Beto ke zola mutindu kukisadila na bima bima yayi, mu zola beno kusimba Yawu. Beno vwanda kieleka na kusala, ntangu yayi. “Satana, kiti.” Ntangu yayi, Nzambi ke tuba na Genèse kisika kiti ya Satana vwandaka, mpe ya vwandaka na Babylone. Ya ke vwandaka ntangu nyonso kiti ya Satana, mpe na Apocalypse ya vwandaka kima mosi. Kasi, kana beno tala, Babylone sobaka yawu mosi na *bumpani* na “bupaapa.”

⁹⁷ Mpe ntangu yayi na bamvula ya ntete, to kaka ntete yayi kusalama (bamvula fyoti), Kiti ya Satana ya kutunga na ya nene. . . mu banza beno ke bokila yandi nganga-Nza- . . . ntinu nganga-Nzambi ya ba-Chaldéen. Bukimfumu ya Babylone sobaka kiti ya yandi ntangu ba-Perse vwandaka landa yandi, mpe yandi bikaka Babylone. Nkumbu ya yandi vwandaka A-t-t-a-l-e, Attale, ntinu nganga-Nzambi ya nene ya Babylone. Ntangu ba-Perse kotaka mpe bakaka Babylone, kimisaka ba-Chaldéen; Attale, ntinu nganga-Nzambi ya bawu, kimaka mpe nataka kiti ya yandi na Pergame. “*Kiti ya Satana* kele kisika beno ke na kuzingaka.” Beno me bakula yawu?

⁹⁸ Ntangu yayi, ya kele samu na yina mu me vutuka na kubaka disolo yayi na disolo ya dibuundu, na kutalaka kisika. . . samu na yina salamaka ntangu Yandi tubaka, “Beno ke na kuzingaka kisika kiti ya Satana kele.”

⁹⁹ Mu vwandaka banza, “Mbote, wapi kisika ya lendaka vwanda, kima yango, ‘kiti ya Satana?’” Kuna mu talaka ti ntinu ya nene yayi, na manima yandi vwandaka kima minungi ya ba-Perse yina nungaka (landila vision ya Daniel), yandi kwizaka na mbanza yayi ya Pergame, na Rome, mpe kuna salaka quartier général ya yandi. Satana lutisaka quartier général ya yandi katuka Babylone na Pergame, kisika (na bilumbu na ntuala) yandi zolaka banda Babylone ya malu-malu. Oh, la la! Ntangu yayi beno me kuzwa lufulu kisika beto kele. Mbote mingi.

¹⁰⁰ Ntangu yayi, mpe kuna yandi kufwaka mpangi-bakala ya mbangi ya mbote yayi, yandi kufwaka mbangi kuna, Antipas.

¹⁰¹ Kune me soba mutindu ya yandi ya kusala. Na ntete yandi vwandaka muzombi ya Baklisto. Oh, mutindu yandi yinaka Buklisto! Mpe yandi vwandaka ntinu nganga-Nzambi yandi mosi, mumpuni na nkadulu mpe kieleka. Na yina yandi sobaka nkadulu ya yandi mpe vukanaka na Constantin.

¹⁰² Ba vwandaka zola Constantin ntangu nyonso (mpe kele dyaka bubu yayi na bapaapa) kubanda ya ba-Chevalier ya Colomb, awa, bayina zengaka ndefi yango ya menga. Kasi

Constantin (mu ke tuba yayi na buzitu mpe buzitu nyonso), na mutindu ya munu ya kutanga yawu na disolo, ata mbala mosi ve vwandaka ya kundima.

¹⁰³ Ntangu yayi, yandi lotaka ndosi mpimpa mosi, ti kana yandi . . .yandi monaka kulunsi mosi, mpe tubaka ti na nzila ya yayi yandi ke nunga mvita; mpe . . .samu na yina yandi silaka kimpwanza na Baklisto, ti yandi ke vwanda Muklisto, kana bawu sambila samu na yandi na kununga mvita yina. Mpe mu telamaka pene ya kyamvu kuna, ti kisika yandi . . . na lweka yankaka ya kyamvu ya bawu, kisika yandi lalaka, lotaka ndosi yayi; mpe yandi vumbukaka, mpe fikulaka kulunsi ya mpembe na kisengo ya nkebolo ya nzutu ya yandi mpe ya binwani nyonso ya yandi. Mpe ya kele kisika ba yidikaka ba-Chevalier ya Colomb yina kele na yisi ya kuyala ya Katolika ya Rome. Kasi yandi ata mbala mosi ve salaka kima mosi ya lukwkilu; kima kaka yina yandi salaka kieleka yina kele na disolo, mutindu mu me mona kieleka, vwandaka, yandi tulaka kulunsi na zulu ya Dibuundu ya Santu Sophie. (Huh!) Kasi yandi vwandaka muntu ya politiki, mpe ntangu yandi vwandaka ntinu ya Rome na ntangu yina, yandi mpe nganga-Nzambi ya mumpani yayi, kintwadi, kuvukanaka mpe kotisaka dibuundu ya mwa tiya yina ba vwandaka bokila ba-Nicolaïte na kilumbu yina. Buklisto, yina vwandaka yekama na kinganga-Nzambi, mpe vwandaka zola yawu na dibuundu ya bawu, yina beto bakaka na bakulongoka ya beto ya ntwala ya dibuundu ya Ephèse, mpe nyonso, mpe—mpe ya Smyrne; ba-Nicolaïte yango.

¹⁰⁴ Ntangu yayi ba-Nicolaïte kumaka . . .ve “bisalu” mutindu ya vwandaka na ntonono *awa*, kasi *awa* ya kele “malongi.” *Awa* ya vwandaka “bisalu,” ba vwanda meka kaka na kukotisa yawu; kasi na lweka awa na nsungi ya dibuundu ya tatu ya me kuma “malongi,” banganga-Nzambi ya ntete, bantu ya nene. Ba vwanda bokila ntete bawu ve ba-pape, awa; kasi ba vwanda bokila bawu, mutindu, ba-archibishop, bantu ya nene, beno zaba, bantu ya nsangu. Mpe malongi ya bawu vwandaka, vwandaka, ya vwandaka ya kukangama na misiku.

¹⁰⁵ Ba vwanda kwenda ntama ya Mpeve ya kufuluka, ya Dibuundu ya kutwadisa na Mpeve-Santu. Ba bikaka bawu kukwenda lutangu ya fyoti mpe vwandaka bokila bawu “ba-hérétique,” samu bawu vwandaka zola ve kuwisana na bawu samu na kuzwa ba-dénomination yayi ya nene. Kasi Dibuundu vwandaka zola kuvwanda na kimpwanza na yisi ya luyalu, na yisi ya ngolo ya Mpeve-Santu mutindu Klisto silaka bawu; Yandi ke vwanda na bawu, mpe ya vwandaka Ntinu ya bawu. Oh! Ntinu ya Bawu!

¹⁰⁶ Dibuundu ya kieleka ata mbala mosi ve sobaka nkadulu ya yawu, samu na kuvwanda ve ya kuyala na kimvuka mosi ya—ya . . .Mu zaba ve mutindu beno ke bokilaka yawu na ngaanda kuna, ba-cardinale, mpe ba-évêque, mpe ba-pape, bantu yina

lenda kondwa ve. Beto ke kwikila ti ya kele na Muntu mosi yina ke kondwaka ve, Yandi kele Ntinu ya beto, Yandi kele Yesu Klisto na beto ntangu yayi na mutindu ya Mpeve-Santu; Nzambi na kati ya beto, na kuzingaka na kati-kati ya beto, na kunataka beto mpe kutwadisaka beto na bamaza ya Luzingu, na kusalaka Yandi mosi kuzabana; na kutalisaka, mutindu Yandi salaka na kati-kati ya basantu yango ya ntama mpe bambangi, ti Yandi vwandaka Mfumu Nzambi ya ngidikulu, na kubelusaka bantu ya kubela, na kuvumbulaka bantu ya kufwa, na kutalisaka bavisision, na kubasisaka bampeve ya yimbi.

¹⁰⁷ Kieleka ata mbala mosi ve mu ke yonzika kima mosi, na ba-évêque nyonso ya dibuundu ya ba-Nicolaïte bayina salaka bukimfumu ya Rome, pape; ata mbala mosi ve na disolo beto me baka kieleka na mosi ya ba-évêque yango ti vumbulaka muntu ya kufwa, to kima mutindu yina, samu Klisto (mvumbukulu) vwandaka ve na kati ya bantima ya bawu. Bawu vukanaka mpe kwendaka samu na dénomination, tekisaka bukuluntu ya bawu. Kasi Dibundu ya Nzambi ya moyo vwandaka na ngolo ya Klisto, dibuundu yankaka yina vwandaka na bantu ya nene na kati ya yawu; kasi Dibundu ya kieleka vwandaka na Mpeve. Beno ke na kubakulaka? Mbote mingi.

¹⁰⁸ Awa yayi . . . Na yawu Constantin, kangisaka kimfumu ya yandi kintwadi, beno tala yina yandi salaka. Yandi bakaka ba-Nicolaïte yango, mpe kwendaka na bawu (yina vwandaka mutindu ya Buklisto). Beno ke na kubakula yawu mbote? Ba vwandaka Baklisto, ya nkumbu; yina vwandaka tuba ti kele Baklisto, kukondwa Mpeve-Santu. Oh, mu ke zola ya kota mbote na kati samu beno ke bika ata mbala mosi ve ti ya kwenda ntama. Beno me mona? Ya vwandaka Baklisto, Baklisto ya ba-dénomination, kukondwa Mpeve-Santu. Ba vwandaka Baklistona nkumbu, ba vwandaka Baklisto na balukutakana ya bawu ya kintwadi, ba vwanda bakaka kominyo, mpe bawu vwandaka zitisa balutumu; kasi, vwandaka manga lutwadusu ya Mpeve-Santu. Ba vwandaka ve na bidimbu mpe mambu ya ngitukulu na kati-kati ya bawu, bawu vwandaka tuba ti bima yina vwandaka na ntangu ya ntama; ti bawu zolaka sala dibuundu na kimfumu. Beto ke kota na yawu na minuti, wapi mutindu ya kimfumu. Beno me mona?

¹⁰⁹ Ntangu yayi, na yawu kuna Dibundu ya Mpeve-Santu zolaka vwanda Yawu mosi ntama na bima ya mutindu. Kasi, na Pergame, ya vwandaka nyonso ya kutuba na *wanzio* ya dibuundu ya Pergame. Beno me mona? Samu Yawu vwandaka kizitu ya yandi awa na kusala yayi.

¹¹⁰ Kasi Constantin vwandaka zola ve buklisto, yandi vwandaka zola kunata bumpani ya yandi ya bankooko, dibuundu ya yandi ya bumpani. Mpe Laodicée yina kuzwaka misisa mpe . . . to ba-Nicolaïte yina kuzwaka misisa mpe tungamaka na Rome mpe salaka kutalisa ya nene, mpe bantu mingi vwandaka Baklisto

ya mikwikidi (ya nkumbu), ya kukangama na misiku. Mpe Dibuundu ya kieleka vwandaka na lutangu ya fyoti; vwandaka ntangu nyonso mpe ntangu nyonso ke vwandaka! Mu ke vingila kaka minuti, samu na kubika yawu kukota kieleka na mudindu. Benó me mona?

¹¹¹ Benó bambuka moyo, Dibuundu ya kieleka ke vwandaka ntangu nyonso nkonga ya bantu ya fyoti mingi yina mabuundu yankaka ke basisaka. Ata mbala mosi ti ba me bongisaka Dibuundu ya kieleka, samu ti ya kele ve organisme, ya kele Nzutu ya misitiki ya Yesu Klisto yina ke na kuzingaka na ntoto, Mpeve-Santu na kusalaka na kati ya bamambeleyai. Na yawu benó lenda bongisa Klisto ve, benó lenda sala yawu ve. Mu zola benó kuzimba yawu samu na Nsungi ya Laodicée, ntangu yayi. Mpe benó bambuka moyo na yawu mpe benó bumba yawu, samu ti Ndinga nyonso mu ke zonga kele na bande yayi. Mpe ntangu yayi benó bambuka moyo, benó bumba yawu na dibanza: Ata mbala mosi ti Dibuundu ya kieleka ya Nzambi me vwandaka ya kubongisa.

¹¹² Dibuundu ya Katolika kele organisation ya ntete yina me zabana kieleka na yinza, ata mbala mosi ve na ntuala ya vwandaka ntete na organisation, mpe ya—ya kele “dibuundu ya mama” mutindu ba-Katolika ke tubaka ya kele. Ya kele “dibuundu mama.” Mama ya mabuundu ya ba-organisation. Biblia ke tuba ti yandi vwandaka, na yawu benó lenda swana ve na yawu ntangu bawu ke tuba ya kele “dibuundu mama,” ya kele “dibuundu mama.” Yandi ke talana na Apocalypse 17, beto ke kota na yandi na mbala mosi. Mbote mingi.

¹¹³ Ntangu yayi, na yawu Constantin, na yayi na dibanza ya yandi samu na kupesa ngolo na kimfumu ya yandi (mutindu Rome ke salaka ntangu nyonso, samu na kusimba bafungula ya yinza), yandi zolaka nata mabanza ya yandi ya bumpani mpe kukatula mabanza ya Baklisto, mpe na mutindu mosi vukisaka bawu kintwadi, samu na kukangisa yayi kintwadi mpe kusala samu na yandi mosi kimfumu yina zolaka vwaná ya kufwanaka ve. Benó me mona? Samu ti yandi vwandaka . . . Yina zolaka sala dyaka yandi mfumu ya kulutila nene na yinza, Constantin.

¹¹⁴ Mpe na yina me tala kundima: yandi vwandaka—yandi vwandaka muntu ya politiki, kasi santu ya Nzambi ve, mutindu bayankaka ya bawu ke mekaka na kukumisa yandi. Yandi vwandaka ve! Ata kima mosi ve ti yandi salaka ntete yina mpe wakanaka mutindu Buklisto samu na munu. Kana kaka na mosi ya mabuundu ya ba-Nicolaite yandi tulaka kulunsi; mpe kima ve yankaka kieleka yandi salaka yina ke talana Buklisto, ata mbala mosi ve mu monaka yawu; kana kaka yandi. . . mpimpa yina yandi fikulaka yawu na bisengo ya yandi ya nkebolo ya nzutu mutindu *kuna*, samu ti yandi kuzwaka ndosi, Baklisto vwandaka sambila samu na yandi ti yandi nunga mvita.

¹¹⁵ Ntangu yayi, kuna ya zolaka pesa ngolo na kimfumu ya yandi. Mpe kuna na kusalaka yayi, yandi kotisaka bankinzi ya mimpani, kuna na kati ya dibuundu ya Baklisto ya ba-Nicolaïte. Mu ke bokila yawu dibuundu ya ba-dénomination ya misiku yina vwandaka bongisa. Yandi nataka bankinzi ya mimpani kuna na kati ya dibuundu yayi ya ba-Nicolaïte, mpe yina vwandaka kubutuka ya Bukatolika.

¹¹⁶ Ntangu yayi, mpangi, mu ke na kutubaka disolo. Mu kele na mafunda ya bankundi ya Katolika, mpe bawu kele kaka bankundi mutindu ba-Protestant kele. Kasi ba-Protestant lenda boka ve, beno vingila kaka tii nkokila yayi ke suka, beno me mona. Beno me mona? Beno ke mona bawu salaka kima kaka mosi. Nzungu lenda kuzonza ve na kikalungu “mvindu.” Beno me mona, samu ti ya kele—ya kele kaka kima mosi, mpeve mosi kotaka mbala mosi na kati-kati ya bawu. Mpe kuna beno ke mona samu na yinki mu ntangu nyonso ke fundisaka kima yina. Samu ti ya kele yimbi! Mpeve ya kieleka na kati ya munu, kana mu meka, mpe kima na kati ya munu ke boka, mu lenda vwanda kaka swi ve samu na yawu, mu fwana ntangu nyonso. Ba ke bokila . . .

¹¹⁷ Bantu ya nene, bantwadisi ya nene lukwikilu me tubaka na munu, “Nge ke bebisa ministele ya nge. Mpangi Branham, nge ke na kusalaka bima” bawu ke tuba, “yina—yina kele ve dyambu ya nge. Nzambi bokilaka nge samu na kusambila samu bambevo.”

¹¹⁸ Nzambi bokilaka munu samu na kusala ya kulutila kusambila bambevo. Bambevo kele kaka kima mosi yina mu lenda samu na kubenda bukebi ya bantu, mpe kaka yina; bambevo, kusambila samu na bambevo kele kima ya fyoti. Beno me mona? *Nsangu* kele yina beto ke na kuzonzila. Bima yango ke na kuvutukaka; mbevo, muntu, muntu ya kubela lenda kubeluka mpe kufwa dyaka. Kasi muntu yina kele ya kubutama na Mpeve ya Nzambi kele na Luzingu ya Kukonda nsuka. Na yawu Nzambi ke kwenda kaka ve bisika nyonso kubelusa bambevo mutindu yina. Dikabu yina kele kaka na dibuundu samu na nzutu yina kele kuna; na zulu ya mosi, na manima na mosi yankaka, mpe dyaka na mosi yankaka, mpe na mosi yankaka. Beno me mona? Yina, makabu, ke sala kaka na dibuundu. Kasi Yawu kele mingi ya kulutila na yina, mpe mu banza ti beno me simba Yawu. Mbote mingi.

¹¹⁹ Kubutama ya Bukatolika, samu na kusala yayi, kusimba meso ya Baklisto mpe dyaka meso ya mimpani, samu na kukangisa bawu kintwadi mpe kusala dibuundu mosi.

¹²⁰ Oh, mu zolaka ti mu kuzwa kaka yawu ntangu yayi, kitini ya mukanda yina muntu mosi kwizaka bika na zulu awa nkokila yankaka yina. mu zolaka nata yawu, kasi mu me zimbana yawu; bima mingi kele bisika nyonso na kivinga kuna. Ba ke na kusalaka kima kaka mosi kaka ntangu yayi, mpe beno bandaka

yawu ntangu beno soolaka muntu ya nsuka yina beno soolaka. Ba ke na kusalaka ntangu yayi na kutala mpe Biblia yina ke nyongisa ve Katolika, to dyaka ba-Juif, to dyaka ba-Protestant. Bawu ke sala samu na bawu Biblia mosi yina ke lunga na kima mosi ya muvimba. Beno lenda mona ve mayela dyaka ya yimbi ya Constantin? Disolo ke na kuvutukilaka kaka yawu mosi. Ntangu yayi, beno me mona, mpe mu kele. . . Beno kuwaka munu kutanga yawu nkokila yankaka yina, beno kuwaka ve? Mpe mu—mu kele na yawu ya kutula na yinzo, mpe bawu vwanda sala na yawu kubanda ntama.

121 Ntangu yayi bawu ke tuba, “Na mvula 1962 bawu ke. . .” Mpe beno tala yina Pape Jean XXII me. . . me lomba na bana ya fyoti ya mabuundu na kuvutuka na yinzo na dibuundu ya mama. Beno vwanda na boma ve, yandi ke sala. Bawu ke sala! Yandi ke kwenda, bawu me vutuka yimeni. Bawu lunga kuvutuka ve, bawu kele yimeni kuna ntangu yayi.

122 Mutindu mu vwandaka tuba, “Yinsi yayi vwandaka tuba, ‘Mbote, kana Tata Kennedy kusoolama, Bakatolika ke yala.’” Kuyala? Bawu salaka yawu yimeni bilumbu ntama me luta, mpe beno zabaka kima ve samu na yawu. Nani ke futaka milongisi ya bawu? Wapi mutindu bawu ke salaka bima yayi kukwenda na balukolo ya bawu, mpe kulonga Bukatolika kaka na lukolo? Mpe beno mifuti-mpaku ke futaka samu na yawu. Oh, kaka na yisi ya mbombo ya beno, mutindu yina. Oh, la la, mutindu yandi sala! Mpe Biblia ke tuba ti yandi ke baka yawu na luvunu, mpe yandi salaka; beno me mona, ya kele kieleka; beno me mona, kufuta mpaku na kima ve. Na yawu, oh, ya kele na mingi yina lendaka tubama awa. Mu ke zenga kaka na mambu yayi, mpe kuvutuka dyaka na kubaka yawu.

123 Samu na kuzwa kima yayi kusalama, Constantin salaka bansaka mingi ya mutindu ya yinza samu na kubenda bukebi ya bawu nyonso zole mimpani mpe Baklisto na kati ya dibuundu. Beno kele na dibanza ya kimpeve? Beno ke na kubanzaka? Ya kele ve Nsangu ya Ngunga? Dibuundu kele na bansaka ya mbongo, bafeti, ke pesa matoma, mpe kaka samu na kuvukisa bawu kintwadi, ke na kuvutuka na kukangisa kintwadi ngolo yina tii bawu lenda kuzwa kisika ya kubula, kieleka kaka awa.

124 Ntangu yayi, ya kele disolo, muntu ve—ve ke banza na ndandu ya yandi, ba ke na kutubaka kaka yina salamaka. Kasi yandi salaka yawu, kangimisaka dibuundu kintwadi na kuzwaka bansaka ya mutindu ya yinza, samu na kunata kintwadi dibuundu ya ba-Nicolaïte. Ntangu yayi beno bambuka moyo, yandi lenda simba ve Dibuundu ya kubutuka dyaka. Ve, tata, ata mosi ya bawu. Kasi dibuundu ya ba-Nicolaïte ya misiku kubwaka samu na yawu.

125 Mpe yinki kele na beto na mabuundu ya beto ya Protestant? Basupu ya nkokila, bansaka, ba-patinage, (Oh, la la!) ba-vente

ya charité, mpe nyonso yankaka, beno me mona. Ntangu yayi, beno zaba ya kele kieleka. Mbote, ntangu yayi, kana ya—ka ya kele Ndinga ya Nzambi, bankundi, ya kele Kieleka. Mpe mabuundu nyonso ya Protestant kele ya kuzaba dyambu! Beno me mona?

¹²⁶ Ntangu yayi, ya vwandaka ata mbala mosi ve dikani ya Nzambi na—na kuzwa basupu ya nkokila mpe makinu na yisi ya yinzo, mpe nyonso yina kuna ba ke na kusala, samu na kufuta pasteur mpe nyonso. Kana ba vwandaka longa bantu na kufuta kikunku ya bawu ya kumi, ya zolaka vwanda nyonso yina zolaka vwanda samu na yawu. Ya kele dikani ya Nzambi. Kasi Nzambi kele na dikani, kasi muntu zola kusala dikani ya yandi mosi, na kuvukisaka dikani ya Nzambi. Mbote mingi.

¹²⁷ Ntangu yayi, na kusalaka yayi, bawu vukisaka mpe salaka ya ntete. . . salaka dibuundu ya Katolika ya ntete, na ntwala. Na yina na Lukutakanu ya nene ya Nicée. . . Ntangu mu me tanga yawu, mu vwanda me fukama kaka. Lukutakanu ya nene ya Nicée kusalamaka na mvula 325 ya ntangu ya beto, bawu nyonso kunatamaka kintwadi, ba-évêque mpe batata ya lukwikilu ya Baklisto kunatamaka kintwadi na Nicée. Ya kele samu na yina ya kele ya kubokila Lukutakanu ya Nicée, na mvula 325 ya ntangu ya beto. Mpe pene ya kumi na tanu ya bankama ya bimonikisi kwizaka na lukutakanu, to lukutakanu, pene ya kumi na tanu ya bankama ya bimonikisi, mpe misambidi vwandaka lutangu ya mingi na ba-évêque tanu na zulu ya mosi (na ba-délégation); kasi dyaka, na nzila ya ba-Nicolaïte (ya misiku ya madidi) mpe dikani ya politiki ya Constantin, bawu mangaka Dibuundu ya kieleka mpe kuzwaka nungunu, mpe tulaka ba-évêque mpe lutumu ya santu ya bantu; na kukatulaka Mpeve-Santu na lukutakanu, mpe na kutulaka yawu na zulu ya ba-évêque, ba-cardinale, mpe ba-pape, mpe nyonso yankaka yina.

¹²⁸ Ya kele dyambu mosi ya yimbi yina parti Démocrate bulaka na kima yayi ya nsuka! Ntangu yayi, ya kele kieleka. Ntangu yayi, beto kele ve. . . mu ke. . . Mpe ba-Républicain ke vwanda kaka na yisi. Kasi mu ke na kuzonzila kima mosi yina bawu talisaka (Edgar Hoover) na Californie, mpe bisika mingi yankaka: ba vwandaka na bamasini yango ya bavote ya kutula kisika beno ke sala vote samu na Tata Nixon, beno zolaka sala vote samu—samu na Kennedy na ntangu kaka mosi. Yandi kuzwaka ve siansi. Mbote, ntangu yayi yina bawu me talisa ti ya kele “yimbi,” na yina samu na yinki bawu ke sala ve kima samu na yawu? Beto ke na kuzingaka na ngunga yango, kaka yina, beto kele na nsuka ya ntangu. Bawu zaba yawu, ba me talisa ti ba me sala yimbi, mpe ntangu yayi ba zola ve kusala kima mosi samu na yawu.

¹²⁹ Ya vwandaka kisalulu ya yimbi ntama kuna, mpe beno tala kubutuka ya yawu dyaka: samu na kukotisa muntu mosi, samu na kulutisa malongi mosi; malongi ya ba-Nicolaïte, yina

vwandaka kaka mbala mosi *bisalu*, ntangu yayi ya me kuma “malongi.” Na bilumbu ya Al Smith ya vwandaka *bisalu*, kasi nytangu yayi ya kele “malongi.” Uh-huh, uh-huh. Ntangu yayi ya kele awa, ya kele na zulu ya beto. “Oh, yandi ke sala mfumu ya luyalu ya mbote,” ya kele ve na ntembe samu na yawu na dibanza ya munu; kieleka, na mandat yina ke landa, tii yandi ke lenda kukangimisa, kuzwa mimpani mpe Baklisto yayi ya misiku kukangama kintwadi.

¹³⁰ Bawu ke na kusalaka na Babiblia, samu na kumeka kunata yawu kintwadi, bapaapa, ba-cardinale. Archibishop ya Angleterre, archibishop ya Cantorbéry, mu kutanaka na yandi, kupesanaka mbote na yandi, zonzaka na yandi, munu mosi, ntangu mu vwandaka na Angleterre; yandi vwandaka na ba-jambière yina vwandaka luta luketo ya yandi, mpe (Oh!) muntu ya kulwata na mutindu ya kusekisa. Kasi yandi kwendaka samu na kutala pape, mbala ya ntete bawu kutalana na kati ya bankama ya bamvula. Yinki ya kele? Beto kele na ngunga ya nsuka!

¹³¹ Ya kele samu na yina mu kele ya kutelama awa na nkokila yayi na kisika ya kuvwanda na ngaanda awa na estrade kisika mosi yankaka na kumekaka na kulonga mpe kusambila samu na bambevo. Mpe mu lenda kutana bawu nyonso ve na ba-estrade (bansangu yayi bambala na bambala), mpe ya kele samu na yina beto ke na kubakaka Yawu na bande mpe ke fidisa Yawu na yinza, samu bawu kuzwa malongi mpe bawu kuvutuka na Lukwikilu.

¹³² Mpe na nsuka ya nsungi ya Baklisto, Jude, na ntuala Buku ya Apocalypse kusonama; Santu Jude, yina zolaka vwandaka mpangi ya bakala (mpangi ya bakala yina ba ndimaka) ya Yesu, tubaka, “Mu zola beno kunwana samu na Lukwikilu yina vwandaka mbala mosi ya kupesa na basantu.” Ba bandaka na kukwenda ntama na yawu kuna, na manima ya lufwa ya Mfumu Yeu. Mpe ntangu yayi wapi mutindu ntama ya kele na nkokila yayi? Beno me mona.

¹³³ Ntangu yayi, Lukutakanu yayi ya ntete ya Nicée, mpe ya vwandaka na mvula 330 . . . mvula 325 ya ntangu ya beto. Pene ya kumi ya bankama ya bimonikisi mpe ba-évêque vwandaka na lukutakanu, kasi bawu yalaka na zulu ya bawu, na lukutakanu mosi ya poto-poto, ya mupepe ya ngolo ya vwandaka. Mpe ba yalaka na zulu ya bawu, mpe bawu salaka vote ti ba-Nicolaïte kuyala, mpe ya vwandaka samu na kubaka . . . dibuundu nyonso, mpe kutula yawu na yisi ya kutala ya ba-pape to-to ba-évêque, to kima mosi; na kukatulaka ngolo ya Dibuundu mpe na kutulaka yawu na zulu ya ba-évêque, ti ba-évêque fwana twadisa Dibuundu mpe kaka yandi yina vwandaka na kima ya kutuba samu na Yawu.

134 Beno me tala na dibuundu ya Katolika bubu yayi? “Benolenda tanga ve Biblia yina, ya kele samu na beno na kutendula. Ya kele évêque.” Beno me mona kisika ya me katuka? Ntangu yayi beno lenda mona yinki kieleka vwandaka ba-Nicolaïte ntete ya banda na kudila mpe kutambula. Ya butukaka kaka kuna. Ya kele kieleka. Mpe ya vwandaka mutindu ya Buklisto; ya kele dyaka!

135 Mpe kuna ba-Protestant me baka kaka yawu mutindu kifwanusu. Biblia, na Apocalypse 17, ke tuba, “Mama mpe bana ya bakento.” Beto ke baka yawu na ntangu fyoti, kana Mfumu zola. Ntangu yayi beno tala ya kele mutindu mosi bubu yayi, bawu me yala. Ntangu yayi, Constantin sadilaka mutindu ya Balaam.

136 Ntangu yayi, mu zola beno kumeka na kuwa mbote mutindu beno lenda. Ntangu yayi, Yandi ke tuba awa, na Biblia awa, “Kangama na lukwikilu ya Munu.” Ntangu yayi:

. . . ke na bima fyoti ya kutelemina nge, samu ti nge ke . . . nge . . . samu ti nge ke . . . kuna bawu (ve bayayi awa, kasi kuna; ba kele na bawu, “beno kele na bawu na—na dibuundu ya Pergame,” beno me mona) . . . kangamaka na malongi—na malongi ya Balaam, yandi longaka Balak na kutula ditadi ya kubwisa na ntwala ya bana ya Israël, samu na kudya bima ba pesaka na munkayulu na biteki, mpe samu na kusala bindumba.

137 Ntangu yayi, Constantin sadila mutindu mosi yina Balaam salaka. Ba kuzwaka lukutakanu na manima ya lukutakanu yayi awa ti ba tulaka ba-évêque na zulu ya mabuundu, mpe nyonso yankaka, samu na kutwadisa yawu, mpe kukatula ngolo nyonso ya misambidi, “Mpe bawu vwandaka ve na mbanzulu ya bawu mosi, to dyaka ti bawu kuzwaka muswa mosi ya kutendula Masonuku.” Mpe yina ya vwandaka nyonso na banganga-Nzambi, yina zolaka sala ntendulu ya Masonuku.

138 Na nsuka, na manima ya ntangu fyoti, ba salaka *mfumu* nganga-Nzambi, mpe bawu . . . vicaire, yina vwandaka pape. Kasi ntangu yayi bawu me kuma na kisika bawu me tula yawu, “luzabu nyonso kele na nganga-Nzambi, mpe dibuundu fwana tanga ve Biblia, ba fwana sala kima mosi ve;” mpe, kieleka, bawu . . . Biblia vwandaka ya kubumbama na bawu. Mpe ntangu yayi bawu—bawu me baka yawu nyonso na zulu ya bawu mosi mpe bawu salaka vote ya yawu samu na beto samu ti ya talanaka mbote.

139 Ya talanaka mbote samu bawu vwandaka na bimvwama, mpe nyonso, mpe yandi pesaka . . . Na lukutakanu ya nene yayi, ntangu yandi bokilaka kintwadi, Constantin pesaka ba-évêque bayinzo ya nene ya mbote; yandi vwandaka na mwa mbongo mpe—mpe bisika nyonso yayi ya nene ya . . . mutindu bayinzo ya nene, yandi pesaka bayayi na dibuundu, ti ba zolaka sadila

yawu mutindu—mutindu bayinzo ya dibuundu. Oh, ya vwandaka bayinzo ya nene ya mbote, nyonso ya kubongisa, mpe nyonso, na yawu yandi pesaka yawu na dibuundu.

¹⁴⁰ Na ngaanda ya yawu, yandi lwatisaka ba-évêque yayi na mazwela ya nene, mpe masanya mpe bima nyonso na yisi ya yawu. Mpe na ngaanda ya yina, yandi tulaka bawu na zulu na . . . to tungaka kisika ya zulu mutindu yayi, mpe tulaka bawu na zulu kuna mutindu kiteki. Mpe na yisi ya bawu yandi salaka ba-autel ya marbre, na yisi ya bawu. Mpe yandi salaka kundimisa nyonso yayi, ya dibanza ya mimpani, kuna, mpe na kunataka Buklisto na kati ya yawu na kubakaka évêque ya bawu. Beno me mona, ba katulaka kaka kiteki mpe tulaka évêque. Beno me mona, na kusalaka yandi autel, kima mutindu mosi, mpe na kusalaka yandi nzambi. Yandi me zangula évêque, mpe yandi vwandaka na lutumu nyonso, yandi lwatisaka yandi mbote mpe salaka yandi kutalana mutindu nzambi. Na kisika ya kutula yandi mutindu banzambi ya bawu ya mimpani, ba lwatisaka yandi robe mutindu Yesu lwataka. Beno me mona? Mpe ba salaka yandi kutalana kaka mutindu kiteki ya kuvwanda kuna.

¹⁴¹ Oh, beno lendaka banza mutindu mumpani vwandaka tuba, “Mbote, mu lendaka kwenda samu na yawu, ya kele na muntu yina lendaka vutula beto ndinga. Beto vwanda zonza na kiteki, kasi muntu yayi lenda vutula beto ndinga.”

¹⁴² Wapi mutindu Baklisto vwandaka banza, “Mbote, ya kele kaka mbote. Ntangu yayi beto lenda sala nyonso beto zola samu ti ya kele na nzambi ya beto. Beto lenda kaka . . . Beto lenda zonza na yandi, yandi lenda vutula beto yinki ya kusala. Kana beto sumuka, beto ke tubila yandi yawu, ke pesa yandi mwa kima, mpe mwa . . . kusala mwa ba-neuvaine yiya to kima mosi; mpe kima ya ntete beno zaba, beto nyonso kele mbote, mpe beto ke vutuka na ngaanda mpe ke tala dyaka kimpwanza. Beto ke vwanda ve na boma ya kima mosi.”

¹⁴³ “Oh, ya ke talana mbote.” Kieleka! Ya ke sala na dibanza ya nsuni, kasi beno ata mbala mosi ve ke minisa yawu na mwana ya Nzambi yina me butama dyaka. Bawu ata mbala mosi ve kele na kiyeka ya kusala yawu. Samu ti yandi zabaka Nani yandi me kwikila mpe yandi kele ya kundima ti Yandi kele na lenda ya kubumba yawu yina kele ya kupesa na Yandi na ntwala ya kilumbu yina. Mpe ke zimbana bima yina lutaka, beto ke na kukima mbangu na mantwala ya lukanu ya lubokilu ya mazulu na Klisto. Amen! Oh, wapi mutindu mu ke vutula matondo!

¹⁴⁴ Autel ya marbre na yisi ya yandi, yandi ya kuvwanda na zulu awa, ya kulwata kieleka, dibuundu ya mbote. Oh, la la, ba vwandaka nyonso ya kubonga. Mbote mingi. Mpe autel yayi vwandaka ya kufuka, autel yayi ya marbre, kitoko. Beno fwana mona yawu dyaka, kima mutindu mosi. Ya kufuka na wolo, mpe ya kubongisa na matadi ya ntalu, misanga na autel yayi. Kitoko!

Ya vwandaka lunga kaka na ba-Nicolaïte mpe na mimpani. Beno me mona yina yandi salaka? Yandi bakaka bankinzi ya mimpani, mabanza ya mimpani; mpe bakaka Buklisto, bantu ya madidi ya kukangama na misiku yina zabaka ve ya kulutila, yina vwandaka ve na Mpeve-Santu samu na kutwadisa bawu na mutindu yankaka; mpe salaka bawu nzambi awa na ntoto, mpe salaka autel samu na bawu, mpe nzambi ya kuvwanda kuna samu na kulemvokila masumu ya bawu. Beno kele ya kimpeve? Beno ke bakula yina mu zola kutuba? Beno me mona yina ya kele? Lemvo ya mpamba ya masumu na ntoto.

¹⁴⁵ Mu ke na kutubaka yawu ve landila dibanza ya munu, ya kele disolo. Mu ke pesa beno page mpe numelo ya disolo ya santu, kaka mutindu mosi mutindu mu lendaka tubila beno na George Washington, mpe Abraham Lincoln, mpe Mvita ya Gettysburg, mpe nyonso yankaka. Kieleka, bima nyonso yango kele disolo mu ke na kutubilaka awa.

¹⁴⁶ Ntangu yayi, kuna ya vwandaka lunga kaka na . . . ve na Dibuundu yayi yina me butuka dyaka. Ve, tata! Mbote, ntangu bawu tulaka muntu na zulu kuna awa, samu na kuvwanda mfumu évêque, samu na kutanga bankinzi, kieleka yina basisaka Nsangu ya mbote ya Kulunga na yawu. Ya ke salaka dyaka bubu yayi. Bansungi yango me tandama kaka, me sabuka kaka, beno me mona; mutindu yankaka, kilumbu yankaka. Oh, ntangu bawu tulaka muntu ya kivumi na zulu kuna mutindu nzambi, mpe yandi zolaka kuzwa mwa bankinzi ya kutuba.

¹⁴⁷ Mpe beno tala ti mimpani vwandaka sambila bankooko ya bawu ya kufwa. Mpe dibuundu ya ba-Protestant yina ke telama mpe ke tuba, “Mu ke kwikikila na Dibuundu ya Santu ya Katolika ya Rome mpe kominyo ya basantu.” Beno ba-Méthodiste beno bumbisa kizizi ya beno, ba-Presbytérien, mpe ba-Lutherien. Kima nyonso yina ke kotisa bantu ya kufwa kele malongi ya kuzonza na bantu ya kufwa! Kieleka. Kasi, ntangu yayi, ba-Protestant lenda seka ve Bakatolika, yandi ke salaka kima mosi, ke salaka funguna nyonso yayi ke kulunga yina yandi ke kwikilaka kima mutindu mosi; ke botama kaka na dibuundu ya Katolika na mbotika ya maza ya yandi, na kumangaka mpe kusekaka bantu yina ke meka na kuzinga yawu mbote; ke kwenda na dibuundu mosi mpe ke mona bantu kulooka na yisi ya ngolo ya Nzambi, mpe ke telama na ngaanda mpe ke seka Yawu. Nyonso yina.

¹⁴⁸ Beno me mona, bampeve ke kufwaka ve; bantu ke kufwaka, kasi bampeve ve. Beno me mona? Mpeve-Santu, Yawu lenda kufwa ve. Yawu vwandaka na Yesu, ntangu yayi Yawu kele na kati ya Dibuundu ya Yandi; ntangu nyonso ke vwanda tii ntangu Yandi ke kwiza *samu* na Dibuundu ya Yandi, samu ti Yandi kele ndambu ya Yandi. Beno me mona? Na nzila ya mizombi, bawu—bawu vwandaka seka bawu ntama kuna na kilumbu yina, bawu ke zinga dyaka awa bubu yayi. Nzambi ke bakaka muntu ya

Yandi kasi ke katulaka ve Mpeve ya Yandi na ntoto. Dyabulu ke bakaka muntu ya yandi kasi ata mbala mosi ve mpeve na ngaanda ya ntoto.

¹⁴⁹ Banganga-Nzambi yango yina ndimaka lufwa ya Yesu, bayina tubaka ti Yandi vwandaka “nganga-nkisi,” to “dyabulu,” bantu yango vwandaka misambidi mutindu misambidi nyonso zolaka vwanda. Ya kele kieleka. Ba zabaka Masonuku yina mpova na mpova, kasi ba zabaka ve kieleka ya ntendulu ya Yawu. Ba vwandaka na dibanza ya bawu mosi, mpe ba vwanda zola kuwa kima yankaka ve. Mpe kuna bawu monaka Yandi mpe zabaka. . . Wapi mutindu bawu kondwaka na kumona ti Yesu vwandaka pesa mvutu na nyonso kieleka baprofete tubaka na zulu ya Yandi? Kasi bawu vwandaka mpofu. Mpe Nzambi tubaka ti Yandi kufwaka bawu meso samu na lukanu mosi, ti beto zolaka kuzwa siansi samu na mpulusu.

¹⁵⁰ Ntangu yayi Biblia ke tuba na ntwala dyaka ti Yandi ke. . . ti beto kele na Nsungi yayi ya Pantekote, kele “kinkonga, mpasi, mpofu, mpe zaba yawu ve.” Ya kele mutindu kele dibuundu, na Philadelphie. Oh, beno ba-Baptiste, ba-Presbytérien, mpe ba-Pentecotiste ya misiku! Beno me mona, beno bawu yayi. Bantangu yankaka mu ke zolaka ve kutuba yawu samu na beno ya kuvwanda awa; Mu ke na bande, beno me mona, mpe mu zaba kisika ya ke kwenda. Beno me mona? Beno balula ntima! Beno vutuka na Biblia! Beno vutuka na Klisto!

¹⁵¹ Mbote mingi, kasi ya kele yina salamaka, ba tulaka Nsangu ya mbote ya Kulunga na ngaanda. Ba zimbisaka bidimbu mpe mambu ya ngitukulu na dibuundu, mpe ntangu ba basisaka nkonga ya Mpeve-Santu na kati-kati ya bampangi, kuna bawu mangaka ti ya vwandaka na kilumbu ya mutindu. Mpe ya vwandaka na yina. . . Mpe bawu ke salaka kima mutindu mosi bubu yayi! Ya kele kieleka. Beno lenda mona ve mpeve ya yawu? Mutindu mu vwandaka me zonza na beno; na ntonono, beno lwata mbanzulu ya kimpeve, ti Nzambi fungula ntima ya beno. Beno tala yimbi ve, beno vwanda mpe beno kuwa; beno tuba, “Mpeve-Santu, monikisa munu. Mu ke mona yawu, ya kele yawu.”

¹⁵² Bankinzi. Wapi kisika? Na ba-Baptiste, ba-Presbytérien, mpe ba-Pentecotiste, ya me kuma kaka nkinzi ya nsambulu. Kima kaka bawu ke salaka kele kubula piano, *kima mosi to yankaka*, kudumuka mpe kukulumuka bantangu yankaka; mpe ntangu kaka piano ke kanga: *Brrrrr!* Ke basika, ke sala mayuya, ke yiba, ke vuna, nyonso yankaka. Kasi ya kieleka. . . Mpe nkele ya kulunga samu na kunwanisa scie, kuzonzila na nkumbu ya muntu nyonso mpe nyonso. Beno me mona? Beno bawu yayi. Kaka ve ba-Méthodiste, ba-Baptiste, ba-Presbytérien, Bakatolika, kasi na dibuundu ya Pantekote na Nsungi ya Laodicée awa.

153 Oh, samu na yinki beno ke vutuka ve na yina batata ya beno ya ntete kuzwaka? Samu na yinki beto ke vutuka ve na pantekote ya kieleka yina ke santisaka mpe ke fulusaka na Mpeve-Santu, yina ke nataka Klisto na beto? Ya kele yina beto kele na nsatu. Mbote mingi. Ntangu yayi, mutindu mosi bubu yayi!

154 Ntangu yayi, mpova *Pergame* zola kutuba “ya kukwela.” Mpova ya kieleka *Pergame* zola kutuba “ya kukwela.” Buklisto, yina kele lweka ya ba-Nicolaïte, lweka ya misiku, me kwelana na luyalu, na bankinzi ya mimpani. Bankinzi ya mimpani! Mpe ya vwandaka kubutuka ya dibuundu ya Katolika na kilumbu yina.

155 Ntangu yayi, muntu nyonso zaba ti ba nataka na luzingu dibuundu ya Katolika na Concil ya Nicée. Ntete kuna, ya vwandaka ya kubokila *Nicolaïte* na Nzambi, yina zola kutuba “nikao,” *Nikao*, “kununga,” kuyala, to kubebisa misambidi. Mpe ntangu bawu salaka yawu, bawu vwandaka zola ve Mpeve na kati-kati ya bantu, mpe *ba-pasteur*, yina zola kutuba “bamvungi,” samu na kubika Mpeve-Santu. . .

156 Beno ke tuba, “Samu na yinki, nganga-Nzambi lenda vwanza ve mvungi?” Wapi mutindu ya madya yandi ke na kudikisaka beno? Beno ke kuzwa bandandu mosi bawu kuzwaka, na Kilumbu ya Pantekote? Kieleka ve! “Mu ke pesa nge mbote Marie,” nani monaka yawu na Pantekote? Ba-neuvaine yiya, mwa kumwangisa nyonso yayi ya maza, mwa kutsyamuna ya maza, na kusadilaka butatu Nzambi (“Tata, Mwana, Mpeve-Santu”), wapi kisika kieleka beno ke kuzwa yawu na Pantekote? Yesu tubaka, “Ti yinzo ya Israël kuzaba kukondwa ntembe, Nzambi me sala Yesu mosi yayi, yina beno komaka na kulunsi, Mfumumu mpe Klisto.” Ya kele kieleka. Wapi kisika beto ke kuzwa bima yango? Ya kele Nicolaïsme na kubanda, me baka nzutu mpe me pesa mutindu ya Katolika.

157 Ntangu yayi beno ke tuba, “Mbote, mu kieleka kele na nsayi ti mu kele ve na kati-kati ya bawu.” Ntangu beno vwanza kieleka mingi ve. Beno me mona? Ntangu yayi beno bambuka moyo: Buklisto, Nicolaïsme. Ntangu yayi beno ke na kubakula disolo? Beno kuwa mbote ntete beto kwenda na ntuala. Mu zola beno kubakula yawu kana beto vwanza awa tii kati-kati ya mpimpa. Na yawu, uh-hum. . . na yawu. . . samu ti mpangi, ya kele moyo ya beno! Beno lenda tuba, “Mbote, mu kele ya. . .” Ya kele ve—ya kele yawu ve. Kana beno me kuzwa ve Mpeve-Santu, mpangi, mu ke kipe ve lutangu ya mabuundu beno ke kwendaka, beno kele ya kuzimbana. Kana beno kele ve ya kubutama dyaka na Mpeve ya Nzambi, na nzila ya mbotika ya Mpeve-Santu, beno kele ya kuzimbana; samu ti beno kele ve na Luzingu ya Kukonda nsuka, mpe Luzingu ya Kukonda nsuka kele kima kaka yina Nzambi ke vumbula, samu ti Yawu kele luzingu kaka yina me bikana.

158 Kana mbuma ya disangu. . . mutindu mu tubaka awa, Ngunga ya Bilanga. Bantu yikwa ke bambuka moyo na Mpangi

ya bakala ya kiboba Spurgeon, mulongi ya Méthodiste na Henryville? Nkadulu mosi ya kiboba ya mbote. Beto vwandaka ya kuvwanda na distributeur ya crème glacée ya Red Furnish, kilumbu mosi, vwanda kudya crème glacée; mpe beto vwanaka zonzila na lukutakanu yina mu kuzwaka kuna, mpe Ngunga ya Bilanga vwanaka luta. Mpe Red vwanaka na ma haut-parleur ya kunamisa, mpe ya . . . ya ladyo ya yandi yina vwanaka na ngaanda kuna. Mpe kisika mosi bawu vwanaka zonzila . . . samu ti nsangu vwanda katuka na Louisville. Kasi 4-H Club vwanaka—vwandaka na masini yina lendaka basisa mbuma ya disangu yina ba lendaka kutula calcium, mpe pitiloyi, mpe nyonso na kati ya disangu, mpe salaka kaka yawu kutalana kieleka mutindu ti ya vwanaka ya kusala na . . .

¹⁵⁹ 4-H kuzwaka yawu, science kumisaka yawu ya kulunga ti disangu talaka mingi kieleka ti beno lendaka baka ndambu na saki yina menaka na bilanga, ndambu na saki yina masini me sala, mpe yayi na lweka awa (yina masini salaka) ya ke sala mutindu mosi ya ba-cornflakes, ya dimpa ya disangu. Mpe kieleka beno lenda baka yawu na laboratoire mpe kuzenga yawu na bitini, bambuma, mpe beno lendaka tuba ve luswaswanu na mosi na yankaka. Ya vwanaka na lutangu mosi ya pitiloyi, lutangu mosi—mosi ya calcium, mpe—mpe madidi; nyonso yina vwanaka na mbuma mosi, ya vwanaka na yankaka.

¹⁶⁰ Yandi tubaka, “Mutindu ya kieleka kaka na kuzaba yina menaka na bilanga, mpe yina masini salaka: ya kele kukunda bandambu zole. Mpe bawu zole ke bola, mpe mosi yina ba salaka na masini ke mena dyaka ve; kasi mosi yina Nzambi menisaka, ke zinga dyaka.” Samu na yinki? Samu ya vwanaka ve na nkuna.

¹⁶¹ Mpe beno lendaka talana mutindu Muklisto, kusala mutindu Muklisto, mpe kusala bisalu nyonso ya mbote yina beno lenda sala, mpe kuzinga ya kukwikama na dibuundu ya beno; kasi kana beno kele na nkuna ya Mpeve-Santu, Luzingu ya Nzambi, Luzingu ya Kukonda nsuka kukwiza na beno; ve na funguna, kasi na *dikabu* ya Mpeve-Santu. Wapi mutindu beno ke kuzwa Yawu? Dokotolo tubaka, na Kilumbu ya Pantekote, yandi yina pesaka lutumu, “Beni fungula masumu, mpe beno botama mosi na mosi ya beno na Nkumbu ya Yesu Klisto, mpe beno ke kuzwa dikabu ya Mpeve-Santu.” Dikabu ya Mpeve-Santu, yina kele Luzingu ya Kukonda nsuka. Ya kele kima kaka yina Nzambi ke vumbula. Yawu kele kima kaka yina kele na Luzingu yina Yandi lenda vumbula. Beno me mona? Ya kele kaka kima yina lenda kwenda. Mu banza ti ya kele mpwelele. Nzambi sala ti yawu vwanda pwelele.

¹⁶² Ntangu yayi, ba-Nicolaïte kuzwaka kuna lweka ya misiku, mpe bawu kwelanaka na dibuundu ya mimpani; na kunataka ba-autel ya mimpani, na kusalaka ba-autel ya Baklisto; nataka nzambi ya mimpani, mpe salaka yawu kuzonza mpe kusolola, na nzutu ya évêque. Ba tulaka yandi na zulu kuna, lwatisaka

yandi robe mpe salaka yandi kotalana mutindu nzambi. Beno me mona? Ya kele ve yina kele na ngaanda, ya kele yina kele na kati. Bambuma nyonso zole ya disangu vwandaka talana mutindu mosi; ya vwandaka yina vwandaka na kati. Beno me mona, kati, Luzingu. Mbote, ya vwandaka ya kusala kuna, mpe ya vwandaka kisika ya mbutukulu ya dibuundu ya Katolika, yawu vwandaka mama ya dibuundu nyonso ya ba-dénomination.

¹⁶³ Ntangu yayi beno ke tuba, “Mbote, munu...Mpangi Branham, kuna ntangu nyonso yina mu kele ve Katolika.”

¹⁶⁴ Ntangu yayi, kaka minuti mosi, beto telama kaka awa sekonde mosi, samu na kuluta. Mpe ti—beto baka ntangu yayi Apocalypse, kapu ya 17, kaka minuti. Beno baka kaka yawu na mbala mosi. Ntangu yayi, yayi kele luzayikisu ya yinki? Yesu Klisto, na mabuundu ya Yandi. Na yina mu ke tanga, beno kuwa mbote:

Mpe kuna kwizaka mosi ya bawanzio sambwadi yina vwandaka na bambungu sambwadi, mpe zonzaka na munu, na kutubaka . . . Kwiza awa; mpe mu ke talisa . . . nge lufundusu ya ndumba ya nene ya kento yina vwandaka na zulu ya bamaza mingi:

¹⁶⁵ Ntangu yayi, na yawu mu lenda kuzwa mbangi, bantu yikwa zaba ti kento na Biblia, konso ntangu yina ya kele na symbole, ya zola kutuba “kento”? Mbote mingi. Bantu yikwa zaba ti “ndumba ya kento” ya nene, kaka awa na kapu mosi yayi, kele “mbanza yina kele na zulu ya myongo sambwadi”? Mbote mingi.

¹⁶⁶ Mpe ntangu yayi bantu yikwa zaba ti Biblia ke tuba na “bamaza”? Awa kento kele ya kuvwanda na zulu ya “bamaza mingi”; *maza mosi ve*, kasi “bamaza.” Mpe *bamaza* zola kutuba “bantu.” Mbote, beno baka kapu ya 15, beno lenda mona awa, beno me mona, nzila ya 15, beno mona:

Mpe yandi tubaka na munu, Bamaza yina nge me mona, kisika ndumba ya kento vwandaka, kele bantu, . . . bantu mingi, . . . bayinsi, mpe bandinga. (beno me mona? Beno me mona?)

¹⁶⁷ Ntangu yayi, kento yayi vwandaka kumanga lukwikilu. Yandi vwandaka ve? Ntangu yayi yayi kele malongi, na yawu beno fwana tula konsiansi ya beno na manima ya beno ntangu yayi. Beno me mona? Nani kele kento ya yimbi yina ba ke bokila “ndumba”? Ya kele kento yina kele kieleka ve na ndefi ya yandi ya makwela. Ntangu yayi dibuundu, dibuundu ya Katolika, ke tubaka na kuvwanda Kento ya makwela mpe Kento ya Klisto. Mpe bamasoeur ke zengaka nsuki ya bawu, mpe kele na ata kuzola, “kuzola ya bawu nyonso kele na Klisto.” Ya kele kieleka? Kieleka. To muntu nyonso . . .

¹⁶⁸ Mu me kele na lufulu ya Katolika. beno me mona. Mu kele na *Mambu Ya Lukwikilu Ya Beto*, mpe babuku ya bawu; mpe ya beno ba-Protestant, mpe ba-Baptiste, mpe nyonso yina beno

ke kwikila; kuna na kulongoka ya munu. Na yawu, mu ke longokaka yawu samu kana muntu tuba kima. “Ho!” Mu lenda vutula beno kaka na kutuba ya beno mosi. Beno me mona? Na yawu, ngunga me kwiza samu Yayi kubasika.

¹⁶⁹ Ntangu yayi, kima ya ntete, Nzambi zolaka kwenda bisika nyonso na yinsi, kutalisa bidimbu, mambu ya ngitukulu, mpe bimangu, samu na bantu na kuzaba. Mameme ya Nzambi zaba Ndinga ya Yandi, bawu zaba, kieleka bawu zaba. Beno fwana tala ntete. . . Beno ke basika kukondwa kuzabana, kuna beno kaka. . . Yinki beno ke sala? Beno ke sala yimbi mingi kulutila. Beno bika. . . beno bika Nzambi kukipe yawu. Beno me mona?

¹⁷⁰ “Mu ke talisa nge lufundusu ya ndumba ya kento ya nene.” Ntangu yayi, kana yandi wandaka yawu, na yina yandi wandaka kento wandaka tuba ti wandaka kima yina. . . Yandi wandaka sala pité! Ya kele kieleka? Mbote, na yina, kana ya wandaka dibundu, yandi wandaka sala pité kontre Nzambi. Ya kele kieleka? Na yinza pité, ke vwanda bindumba, bindumba ya *kimpeve*: yandi ke na kulongoka kima na bantu yina kele ve Ndinga ya Nzambi. Ya kele kieleka? Yandi ke na kulongoka kima yina kele kieleka ve. Ya kele Nicolaïsme. Beno ke mona yawu kukwiza awa? Yandi ke kipe kutula bapaapa, mpe banganga-Nzambi, mpe ke katula Mpeve-Santu, “Bilumbu ya bimangu me luta”; mpe Biblia ke tuba, “Yesu Klisto mutindu mosi mazono mpe kukonda nsuka.” Biblia ke tuba, “Beni balula ntima, mpe beno botama mosi na mosi ya beno na Nkumbu ya Yesu Klisto samu na mulemvo ya masumu ya beno”; kento ke tuba, “Tata, Mwana, mpe Mpeve-Santu,” na mwa kumwangisa maza, na mwa kutsyamuna maza. Oh, la la! Beno me mona?

¹⁷¹ Mbote mingi, beno tala mbote yina kento yayi wandaka sala:

. . . yandi bantinu ya ntoto salaka bindumba, mpe bantu ya. . . ntoto kumaka ya kukola na vinu ya bindumba ya yandi.

¹⁷² “Ya kukola!” Ke kufwa beno, ke tula beno na lufwa, ke kubula beno, to kima yankaka, mpangi. Kieleka ba kele ya kukola na kima yina. Beno me mona?

¹⁷³ “Vinu.” Ya kele yina yandi ke na kupesaka, beno me mona, vinu ya yandi ya bindumba ya yandi. “Bika mu tuba na beno kima! Mama ya munu wandaka ya Katolika, mpe mu ke. . .” Mbote mingi.

¹⁷⁴ Ntangu yayi beno ke tuba, “Ya kele ya boma.” Ntangu yayi beno vingila kaka minuti, ba-Protestant. Huh! (Mu ke na kuzonzila na bayayi na babande, beno me mona.)

Kuna yandi nataka munu na kimpeve na ntoto ya kuyuma: mpe mu monaka—mu monaka kento ya kuwanda na zulu ya kibulu ya ntinta ya mbwaki, . . .

175 Ntangu yayi, yinki ke talisa mpova *mbwaki*? Ya ke talisa “kintinu.” Ke zola kutuba . . . Mu zola kutuba, zola kutuba, “ya ntinu, ya kieleka, ya ntinu,” beno me mona, mutindu bantinu mpe nyonso.

. . . *ya kifuluka na bankumbu ya kuvwenza, vwandaka na bayintu sambwadi mpe bibongo kumi.*

176 Ntangu yayi, *bayintu* sambwadi kele “myongo” sambwadi na zulu ya yina mbanza kele ya kuvwanda. Mpe kento yayi kele mbanza, beto zaba.

Mpe kento vwandaka ya kulwata bilele ya kitoko ya ntinta ya violet . . .

177 “Kento.” Kibulu vwandaka *mbwadi*, kasi kento vwandaka ya kulwata bilele ya kitoko ya ntinta ya *violet*. Ntangu yayi, mu pesaka beno ve malongi kilumbu yankaka yina, ya kele na balele tatu ya nela? Mu zaba ve bilumbu yikwa mu ke zinga, kasi beno bambuka moyo na yayi. Mutindu mu tubaka na beno bamvula mingi me luta, “beno tala mbote Russie.” Ya kele na balele tatu ya nela, beno bambuka moyo na yayi. Ya kele na lele ya nela ya *kisengo*. Ya kele na lele ya nela ya *bambou* (Chine ya *mbwaki* mpe *nyonso*). Mpe ya kele na lele ya nela ya *violet*, beno tala mbote lele ya nela *yina, ya kele* kivuni. Mingi ya . . .

. . . *kento vwandaka ya kulwata bilele ya kitoko ya ntinta ya violet . . . mbwaki bantinta, . . . ya kubongisa na wolo . . . matadi ya ntalu mpe misanga*, (Beno ke bambuka moyo mu vwandaka vutukila na kuzonza awa na yina vwandaka autel ya ntete ya ba-Nicolaïte? Beno me mona? *Kento* na kuvwandaka “dibuundu.” *vwandaka na mbungu ya wolo na diboko ya yandi* (Beno me bambuka moyo? Wolo ya kufika autel, mbungu yandi vwandaka pesa bantu.) *ya kifuluka* na busafu mpe *busafu ya bindumba ya yandi*:

178 Ya kele yina yandi ke na kupesaka na bantu; bawu vwandaka mina yawu. Kieleka. Ya kulawuka na yawu! Kaka ya kulawuka! Nkonga nyonso yina ya ba-Irlandais, mpe ba-Francais, mpe nyonso yankaka, ke zenga beno laka kana beno tuba kima mosi na kuteleminaka dibuundu yina. Kieleka, bawu ke sala. Beno me mona?

Mpe na zulu ya mbunzu ya yandi vwandaka na nkumbu ya kusunika, DINSWEKI, BABYLONE . . .

179 Ntangu yayi, wapi kisika Babylone kwendaka? Katuka Babylone na Pergame, mpe kumaka . . . Satana na kusobaka kiti ya yandi. Oh, mu zola kana beto lenda baka Apocalypse nyonso, samu beno mona yawu.

. . . *BABYLONE YA NENE, MAMA YA BAKENTO YA KINDUMBA . . . MAMA YA BAKENTO YA KINDUMBA MPE BUSAFU YA NTOTO.*

180 Nani kento vwandaka? Mama ya bakento ya kindumba. Ya vwandaka ve bana ya babakala. Ba vwandaka?

181 [Kisika ya mpamba na bande—Mu.] . . .dibuundu ya bawu. Yinga, tata. Ba ke tubaka, “Dibuundu kele ve ya kubokila, na Biblia, ‘Babylone?’” Beno me mona, na buku ya bawu mosi. Mbote mingi.

182 Ntangu yayi, kana yandi vwandaka ndumbu ya kento, mama ya bandumba ya bakento ya kindumba, yandi zolaka vwanda na bana ya bakento. Mpe kana bawu vwandaka bana ya bakento, bawu vwandaka bana ya bakento, ba vwandaka mabuundu. Ntangu yayi wapi kisika dibuundu ya ba-Protestant katukaka? Ya kele kieleka? Wapi luswaswanu kele na kati-kati ya ndumba mpe mama ya bandumbu? Kima mosi.

183 Martin Luther telamaka, samu na kusukisa yawu, samu na kupesa siansi na Dibuundu ya kieleka; Wesley; ya me landila tii Pantekote; mpe mosi na mosi ya bawu vutukaka kaka na dibanza yango ya kubongisa ya ba-Nicolaïte, na bakuluntu ya nene, mpe nyonso yankaka, mpe vutukaka kaka na mbotika mosi yina bawu kubotamaka, mutindu mosi ya mutindu, mutindu mosi ya bankinzi, mpe mingi ya bawu na bakatekisima mpe ‘*mu ke pesa nge mbote Marie.*’ Ve *Mu me pesa nge mbote Marie*, kasi. . . Yinki kele yayi yina kele pene ya kima mutindu mosi? *Credo ya Bantumwa* yina. Beno talisa munu Credo ya Bantumwa na kati ya Biblia, mpangi. Kana—kana ba vwandaka na credo, ya kele Acte 2:38, ya kele yina bawu tumaka muntu nyonso na kusala. Kieleka wapi kisika beno kuwaka ntumwa kusala credo, na kutubaka, “Mu ke kwikila na Dibuundu ya Santu ya Katolika ya Rome. Mu ke kwikilaka na kubundana ya basantu?”

184 Ntangu. . . Pierre, yandi yina vwandaka na bafungula, tubaka, “Ya kele ve na muvukisi yankaka na kati-kati ya Nzambi mpe bantu, kasi Klisto Yesu.”

185 Kasi beno tala mabuundu ya ba-Protestant. Yinki bawu salaka? Ba lendaka ve na kuvwanda ya kusepela. Mosi na mosi ya bawu yina basikaka, kubasikaka na Lusakumunu mosi ya Pantekote. Ya kele kaka kieleka. Mpe Martin Luther zonzaka na bandinga. Ya kele kaka kieleka. Lombaka lemvo na yandi mosi, na kutubaka, “Nzambi, bampova ya boma yayi yina mu ke na kubokuta, mpe mu zaba ve yina mu ke na kutubaka.” Beno me mona? Kieleka, yandi kwikilaka na Yawu. Kieleka, yandi salaka.

186 Ntangu yayi, nzila nyonso ya bansungi bawu vwandaka—vwandaka na Mpeve, kasi bawu ntangu nyonso vwandaka kwenda ntama mpe vwandaka sala ba-organisation na manima me kwenda ba-fondateur. Kana beno bikaka dibuundu ya ba-Luthérien kulandila, mpe kubongisa yawu ve, ya zolaka vwanda ya Pantekote. Yinki kele dibuundu ya Pantekote? Mu zola kutuba ya pantekote ya kieleka. Ve dénomination, awa,

ya kele kaka mutindu “nzungu mpe kikalungu” dyaka. Beno me mona? Kasi bawu salaka kima mutindu mosi, mpe yina vutuulaka kaka bawu na Nicolaïsme kaka mutindu bawu salaka na ntonono. Bantu yikwa ke na kumonaka yawu? beno tuba “Amen.” [Dibuundu me tuba, “Amen!”—Mu.] Ya kele kieleka. Ntangu yayi, kaka samu mu kuzwa ndinga ya beno ti beno kele. . .

187 Beno me mona, mama ya “bandumba.” Kana bawu kele bandumba, wapi mutindu bawu me kuma bandumba? Na kusalaka bindumba na kuteleminaka Ndinga ya Nzambi. Kana Ndinga ya Nzambi ke tuba, “Beno balula ntima mpe beno botama na Nkumbu ya Yesu Klisto,” mpe muntu nyonso na kati kuna kubotamaka na Nkumbu ya Yesu, mpe kuna beno ke baka “Tata, Mwana, mpe Mpeve-Santu.” Ya kele kindumba! Ya kele kieleka? Mpe kana kubotama na Biblia kele kukota na kati ya maza (*baptizo*, landila mpova ya Grec), na yina wapi mutindu beno ke baka mwa kumwangisa ya maza mpe mwa kutsyamuna ya maza? Wapi kisika yawu ke kwenda? Kana beno yingisa kupesana mbote, to kubaka kominyo na kikoba ya beno mpe kumina yawu, to kima yankaka ya mutindu yina, samu na Mpeve-Santu, mpe Mpeve-Santu katukaka Mazulu mutindu kitembo ya ngolo mpe fulusaka bantu, mpe salaka bawu kuzonza na bandinga, mpe kulooka, mpe kusala mutindu muntu ya kulawuka malafu, mpe kuyingisa kupesana maboko, to kutula mukanda ya beno na dibuundu, to kima mosi ya mutindu yina, kieleka wapi mutindu beno ke basika na mutindu ya kusala bindumba ya kimpeve?

188 Ntangu yayi, beno kumiyufula kaka na yawu. Beno ningisa mabanza ya beno, beno zibula ntima ya beno mpe beno vwanda ya kusungama, bankundi. Beto kele na nsuka ya nzila. Balukutakanu yayi kele kaka ve ya kutula awa ya mpamba, Nzambi kutumaka yawu. Mu ke kwikila ya kele kaka kieleka mutindu mu. . .beno ke kwikila munu kuvwanda kisadi ya Yandi. Mu ke tuba yawu na Nkumbu ya Yesu, ti Nzambi tulaka na zulu ya ntima ya munu na kukwiza awa. Mu ke kuzwaka ata mpata mosi ve na kusalaka yawu. Mu—mu—mu—mu—mu lendaka vwanda na ngaanda awa na kusambilaka samu na bambevo kisika mosi, to kima mosi ya mutindu yina. To mu lendaka vwanda na ngaanda kuna na kuloba, mpe kuzwa kaka mbongo ya munu mutindu mosi, mu ke kuzwaka difuta na dibuundu. Kasi Nzambi tulaka Yawu na zulu ya ntima ya munu; mu lendaka ve kukwenda ntama na Yawu, ke landila kaka na kulooka na munu na Yawu, mpe mu ke na kusala nyonso mu lenda. Mu kele awa na Nkumbu ya Mfumu, na kusalaka nyonso mu zaba mutindu ya kusala. Beno bika ve ti Yawu kuluta beno.

189 Ntangu yayi, ba-Protestant, beno ke mona yina mu zola kutuba na dibuundu ya Katolika mpe dibuundu ya ba-

Protestant? Kaka . . . Mosi kele kaka mutindu mosi na yankaka. Ya kele kaka kieleka.

¹⁹⁰ Ntangu yayi, ya zola kutubaka ya kukwela, *Pergame* zola kutuba “ya kukwela.”

¹⁹¹ Ntangu yayi beto baka . . . Yandi tubaka, “Nge kele na bawu yina kele na malongi ya Balaam.” Beto baka kaka yawu.

¹⁹² Beto kele na ntangu? Mu ke salaka kaka nswalu mutindu mu lenda. To beno ke zola kaka kuingila mpe kumona kana beto lendaka vutuka na suka? Bantu yikwa ke zola kaka ti beto kukwenda na ntwala, kaka mwa ntangu fyoti? Ti . . . Mbote mingi, ntangu yayi mu—mu zaba ya kele na tiya na kati awa. Mpe kana beno kele ya kuvwanda swi mpe na tiya, wapi mutindu beno ke banza na zulu awa? Beno me mona? Kasi, oh, la la, beto ke na kumeka na kukima kisika yango yina kele tiya. Beno me mona, ya—ya kele yina ya kele, samu, beto kele ya Seko.

¹⁹³ Ntangu yayi, awa kieleka ntangu bawu salaka dibuundu mutindu yina, yinki kusalamaka? Ntangu yayi beno kuwa mbote, bana ya munu. Yinki salamaka? Mbote, kieleka, yina basisaka kaka Mpeve-Santu na dibuundu. Kukondwa ntembe ata mosi ya ba-évêque ya bawu vumbulaka bantu ya kufwa to salaka bimangu. mpe bawu na kuzonzilaka na bayankaka ya basantu yayi ti vwandaka na dibuundu ya bawu! Ba teleminaka kima yango, kasi bawu ke tubila na yawu!

¹⁹⁴ Beno tala ntwenya ya kento yina, Jeanne d’Arc. Mu ke yufula beno bantu ya Katolika, to beno ba-Protestant, muntu nyonso. Na kilumbu ya yandi, Jeanne d’Arc, ya vwandaka ve na kima na France kuna, kasi dibuundu ya Katolika yina vwanda kufwa basantu. Kasi Nzambi kwizaka na zulu ya mwana ya kento yina mpe yandi kuzwaka Mpeve-Santu. Mpe yinki yandi vwanda salaka? Yandi vwandaka lenda kutuba na ntwala bima, Mfumu zolaka pesa yandi ba-vision mpe yandi vwandaka tuba na ntwala. Yandi vwanda sambilaka na bambevo. Yandi sambilaka na mwana ya bébé ya kufwa, mpe yandi vutukaka dyaka na luzingu. Yina kele ya pantekote. Beno me mona? Mpe yinki dibuundu ya Katolika salaka na yandi samu ti yandi teleminaka dibuundu ya Katolika? Ba bokilaka yandi na lusambusu, mpe ba yoka yandi na kinkuku ya bankuni mutindu “ndoki ya kento.”

¹⁹⁵ Mpe ntangu yayi beno ke tuba, “*Santu* Jeanne d’Arc.” Bankama zole ya bamvula na ntwala, pene, ntangu dibuundu talaka yina bawu salaka, ti yandi vwandaka Santu, oh, kieleka, bawu balulaka ntima samu na yawu; bawu timunaka banzutu ya banganga-Nzambi yango yina kufwaka yandi, mpe losaka yawu na nzadi. Beno ke banza ti kieleka ya ke sukula menga na maboko ya bawu? Biblia ke tuba, “Menga ya konso mbangi kutalanaka na yandi.” Ya kele yina Wanzio ya Mfumu tubaka kutalanaka na Babylone, “Konso kufwa muntu, to mbangi, mpe basantu nyonso ya Klisto yina kieleka ba kufwaka mutindu

mbangi, kutalanaka kaka awa na Nsungi ya ba-Nicolaïte tii na ya nsuka, konso mbangi.” Beno banza na yawu. (Matondo na nge, Mpangi ya bakala Ben.) Ntangu yayi, beno banza na yawu.

¹⁹⁶ Ntangu yayi, kaka ntama fyoti ntangu yayi. Dibuundu ya Baklisto ya kukwelana na—na...na Babylone. *Pergame* zola kutuba “ya kukwela.”

¹⁹⁷ Ntangu yayi, “Malongi ya Balaam. Nge kele na bawu na kati-kati ya nge bayina kele na malongi ya Balaam.”

¹⁹⁸ Oh, mu zola kaka bima yayi. Oh, kana beno lendaka vwanda ntangu fyoti kaka na zulu ya mosi, beno me mona, kasi beno kaka. . .Beto zola ti beno kumona yawu mpe na manima kulandila na kima yankaka, samu ti ya kele kaka—kaka ya kufuluka na pepite ya wolo. Mu kele prospecteur; mu ke zolaka kukwenda na yisi mpe kutimuna ba-pepite yayi mpe kusala yawu kulezima, mpe kupakula yawu mutindu yayi, mpe kutala yawu. Mpe mosi na mosi ya yawu ke talisa Yesu Klisto! Mosi na mosi ya yawu, beno me mona. Mosi na mosi ya yawu ke talisa Yesu Klisto. Yandi kele Alpha mpe Omega, konso—konso Kara ya wolo na pepite. Ya kele kieleka. Yandi kele konso kitini ya Yawu. Ya kele samu na yina, Yandi kele Bunzambi me kuma nsuni na kati-kati ya beto.

¹⁹⁹ Ntangu yayi, samu na kuzwa. . .mu—mu ke baka ve ntangu samu na yayi, samu ti mu kele. . .mu ke mona ya me kuma ngunga ya yivwa. Mpe mu—mu kele na kima yankaka yina mu zola kubaka na nkokila yayi, kana Nzambi zola. Mpe mu zola kaka ti beno kusunika yayi mpe beno tanga yawu mbasi, mpe beno sonika Nombres 22 tii na 25. Mu zola beno kutanga yawu ntangu yayi, mpe beno lenda landa na manima ya munu. Mpe ntangu yayi—mpe ntangu yayi Nombres 22 tii na 25.

²⁰⁰ Beto zaba ti Israël—Israël vwandaka bantu yina Nzambi soolaka. Ya kele kieleka? Ba vwandaka. . .Ba vwandaka ba-Pentecotiste. Ba vwandaka na Mpeve na kati-kati ya bawu. Beno ke bambuka moyo na nsangu ya mazono na nkokila? Mutindu yina Moïse ntangu yandi sabukaka Mubu ya Mbwaki, to Nzadi Mungwa, mpe talaka na manima ya yandi na kati ya Mubu ya Mbwaki, ya menga yina vwanda monisa menga. . .bamfumu nyonso ya bisalu yina kieleka vwanda bula yandi mpe bana nyonso ya Israël. Moïse telemisaka diboko ya yandi mpe yimbaka na Kimpeve. Oh, mosi na mosi ya beto lendaka vwanda Moïse ntangu beto ke tala na manima na kati ya Menga ya mbwaki ya Mfumu Yesu mpe kumona kukola nyonso ya ntama, mbwata nyonso ya ntama, kento nyonso ya ntama ya yimbi, kima nyonso ya ntama ya mvindu yina kieleka beto salaka na luzingu ya beto, nyonso ya kufwa na kati ya Menga ya Mfumu Yesu. Ya ke sala beto kuyimba na Kimpeve! Bafumu, batabaka, mpe bankadulu ya yimbi, mpe nyonso yankaka, ya kufwa, na kati ya Menga ya

Yesu; kuna beto lenda telemisa maboko ya beto mpe kuyimba na Kimpeve. Beno me mona?

²⁰¹ Beno tala yina Myriam salaka, profetese. Ntangu yayi, beno bambuka moyo, yandi vwandaka profetese. Yandi bakaka tambourin mpe bandaka na kubula tambourin mpe binaka na Kimpeve, mpe bana ya bakento ya Israël landaka yandi na yisi na simu, na kubulaka ba-tambourin yayi, mpe kubinaka na Kimpeve. Pantekote ya kieleka!

²⁰² Mpe kuna kana beno tala ntangu bawu kwizaka na Moab. Ntangu yayi beto ke na kuvutuka. . . Beto kele na Masonuku, ntangu yayi, “malongi ya Balaam.” Mpe Moab, Moab vwandaka mpangi ya bakala ya Israël. Bantu yikwa zaba kisika Moab katukaka? Mbote mingi. Moab kele yina mu lendaka bokila kuvukisa, samu ti Moab kubandaka na bana ya bakento ya Lot. Lot kuzwaka bébé na nzila ya mwana ya yandi mosi ya kento, yandi kuzwaka bana zole. Mpe Moab vwandaka mosi ya bawu, mpe yandi salaka yinsi ya Moab, dikanda. Mpe, kukondwa ntembe, Lot vwandaka mwana-nkazi ya Abraham, yina kieleka vwandaka na nzila mosi yina. Beto zaba yawu. Ntangu yayi mu zola beno kutala ti bawu vwandaka ve mimpani, mutindu bayankaka ya binsamu ya beto yina me salama ntama mingi ve ke pesa beno. . . Beno bambuka moyo, ba vwandaka mikwikidi. Ntangu yayi, ntangu awa kwizaka Israël na nzila ya bawu na yinsi ya nsilulu, na kulandilaka kaka nzila ya bawu na kusalu, mpe kaka awa vwandaka Moab na nzila. Ba fidisaka mizabisi na Moab, mpe tubaka, “Bika beto kulutila na yinsi ya nge. Beto kele mpangi ya nge ya bakala.”

²⁰³ Ntangu yayi, Moab ke monisa ba-Nicolaïte. Ntangu beno ke mona kaka na minuti. Israël ke monisa Dibuundu ya kieleka. Mpe Balaam vwandaka mosi ya ba-évêque, ba-pape. Beno tala mbote mpe beno mona ntangu yayi; Buklisto ya nsuni. Ntangu yayi beto ke tala ti ba pesaka yandi makabu, ya kele ve na ntembe samu na yawu. Mingi ya bawu kele mitubi ya mbote, badokotolo ya philosophie, mpe—mpe bantu ya nene. Beno lenda manga yawu ve. Kasi, “Na kulakisaka mutindu ya kinzambi, kasi ke manga Ngolo ya yawu.”

²⁰⁴ Beno vutuka na Pantekote ya kisina! Na yina beno kwenda ve ntama. Kana ntangu beno ke sala, beno ke zimbana. Beno vwanda na lusakumunu yina. Ya kele Yawu, Mupesi lusakumunu ya lusakumunu.

²⁰⁵ Ntangu yayi, beno tala na yina bawu vwandaka zyeta. Ba kumaka na dibuundu ya misiku ya kuvukisa yayi, mpe bawu tubaka, “Beto kele na nzila na réveil. Beto ke na kwendaka na yinsi ya nsilulu. Nge ke zola kupesa beto muswa ya kuluta? Kana bibulu ya beto kudyaka matiti ya beno, kana bawu kunwa maza ya beno, beto ke futa beno samu na yawu.”

206 Na yina yinki yandi salaka . . . ? Ntinu Balak, yandi nyonso kudasukaka, mpe yandi zolaka ve mutindu ya lukutakanu mutindu yina na dibuundu ya yandi to na yinsi ya yandi. Na yina yinki yandi salaka? Yandi fidisaka na pape, to na évêque, Balaam, profete mercenaire, yandi yina vwandaka zola mbongo kulutila na yandi kuzola Nzambi. Mpe Ntinu Balak tubaka na yandi, “Kana nge kwenda awa mpe kusinga bantu yayi, mu ke kumisa nge muntu ya nene.” Mpe Nzambi zonzaka na Balak. Mpe mu ke kumiyufula kana ya vwandaka kin- . . . mu zola tuba Balaam. Mu ke kumiyufula lutangu yikwa ya ba-Balaam keke na yinza yayi na nkokila yayi? Milongi ya ba-Méthodiste, milongi ya ba-Baptiste, banganga-Nzambi ya Katolika, (Kyadi!) yina zaba ti Nzambi. . . kana beno ke na kutanga disolo mosi yayi mpe Buku mosi yayi ti mu ke na kutangaka. “Balaam!”

207 Ntangu yayi, beno tala. Kuna yandi tubaka, “Kwenda mpe singa bantu yayi.”

Mpe Balaam tubaka, “Mu ke yufula Nzambi.”

Nzambi tubaka, “Kukwenda ve!”

208 Kasi suka yina landaka, yandi tubaka. . . yandi kwendaka mpe tubaka na nganga-Nzambi, to ntinu.

Mpe yandi vutukaka, tubaka, “Oh, mu ke—mu ke kumisa nge muntu ya nene.”

Na yawu Balaam landilaka; Nzambi tubaka, “Na yina kwenda, kwenda.”

209 Beno me mona, kana beno zola ve kulanda Kieleka . . . Beno ke banza, ba-Nicolaïte, ti samu Nzambi ke na kusalaka samu na beno yina beno ke na kusalaka mutindu ti . . . Ya keke na Kieleka ya kisina! Beno ke na kubakaka kaka luzolo ya kubika ya Nzambi. Beno ke tuba, “Nzambi pesaka beto Mpeve-Santu,” to “Yandi sakumunaka beto, mpe beto keke ya kubotama na nkumbu ya ‘Tata, Mwana, mpe Mpeve-Santu.’” Beno ba-Balaamite! Beno me mona, malongi ya Balaam. Nzambi tubaka na yandi, na manima yandi me vwanda ya mapeka mingi, Yandi bikaka kaka yandi kukwenda na ntwala, kulelama yandi mosi. Beno fwana vutuka na Kieleka, na lufulu ya Kieleka. Kuvutuka na Biblia. “Oh, mbote, Yandi me sakumuna beto! Mpe pe- . . .” Oh, mu zaba yawu. Yandi salaka, tubaka na Balaam, tubaka, “Kwenda na ntwala. Kana nge zola kukwenda, kana ya keke . . . Nge keke ya kukangama na kukwenda nzila yina, mpe nge zola nzila ya organisation; baka yawu, kwenda na ntwala.”

210 Kuna Balaam kwendaka, mpe dumukaka na mulet ya yandi, to, mulet ya yandi ve, na mbuluku ya yandi, kuna yandi kwendaka. Mpe kima ya ntete, beno zaba, Wanzio ya Mfumu telamaka na nzila. Mpe, beno zaba, profete yango, paapa yango, évêque yango, cardinale yango, nyonso yina yandi vwandaka, vwandaka mpofu mingi na bima ya kimpeve, dibanza yina vwandaka na yandi vwandaka ba ke zangula yandi, samu yandi

vwanda zinga na Nzadi ya Euphrate. Mu banza yandi banzaka ti ya vwandaka difwa mosi, mutindu “Na zulu ya ditati yayi Mu ke tunga Dibuundu ya Munu, Pierre,” to na zulu ya ditati mosi yina vwandaka na Rome, to kima mosi. Kasi ntangu yandi kumaka na kisika, kuna telamaka Wanzio na mbele ya kinkonga, mpe yandi vwandaka mingi mpofu ti yandi lendaka ve kumona yawu. Mpe mulet byetaka yandi dikulu na kibaka. Mpe kuna yandi landilaka na kukwenda, mpe Wanzio telamaka dyaka na nzila. Nzambi ke kanga konso mwelo! Mpe mulet yayi balukaka dyaka. Mpe yandi dumukaka, mpe bakaka yinti yipi mpe bandaka na kubula yawu na yawu. Mwa mbuluku yayi, ya kulala kuna, kuzwaka fimbu na zulu ya yintu.

211 Mpe munu, kieleka yina salaka yandi kusoba, yina salaka yandi kubakula, to yina tubaka na yandi kisika yandi vwandaka na foti, Yandi bikaka mulet yina kuzonza na bandinga. Mulet ve, yandi vwandaka mbuluku! Kutuba ve ti yandi vwandaka “mulet;” yandi zolaka bakula yawu ve, yandi vwandaka kima ba vukisaka. Beno me mona? Yandi vwandaka nkuna ya kisina.

212 Moab vwandaka, “Bidimbu me luta, bima nyonso kele yina lutaka.” Bidimbu vwandaka landa Israël.

213 Kasi mwa mbuluku yayi balukaka mpe tubaka, “Mu vwandaka ve mbuluku ya nge? Mu me salaka ntete. . .” Mpe évêque yango—yango ya mpofu vwandaka ya kuvwanda na zulu kuna, vwanda bula dyaka mulet yango; mpe mulet bandaka na kuzonza na yandi, na bandinga ya kuzabana na mulet.

Mpe yandi tubaka, “Yinga, nge kele—nge kele mbuluku ya munu.”

“Mpe mu me—mu me nataka nge ntete ve, to mu me lembaka nge ntete?”

“Ve, nge me salaka yawu ve. Kasi kana mu vwandaka na mbele, mu zola kufwa nge, mu zolaka kukanga lukutakanu yayi. Mu kele na nzila ya munu kuna samu na kukanga nkonga yina ya ba-exalté na kukwizaka na yinsi yayi. Mu ke—mu ke tula yawu na zulu ya nge.” Beno me mona?

214 Mpe kima ya ntete beno zaba, yandi bandaka na kutala na ziunga, yandi banzaka, “Mbote, yayi ke sekisa. Mu lenda kuwa mulet yango kuzonza.”

215 Oh, Balaam! Hmm! Beno me mona, Nzambi ntangu nyonso ke zonzaka na bantu na bandinga ya kuzabana ve. Yandi salaka na bilumbu ya . . . Beno me mona, “Ya kele kaka na Pantekote.” Oh, ve. Ve, ve. Na feti ya Belschatsar Yandi zonzaka na bandinga, sonikaka Yawu na kibaka. Ba vwandaka na muntu kuna yina vwandaka na dikabu ya ntendulu, na yawu yandi tendulaka yawu samu na bawu, tubaka na bawu yinki ya vwandaka. Kima mosi mutindu bubu yayi.

216 Na yawu, kuna na kuvwandaka ve na mutendudi samu na Yawu, Nzambi salaka kaka ti Balaam ya mawa yayi kuvumbuka (cardinal yayi) mpe kubakula yina Yawu vwandaka. Mpe beno zaba muntu ya mpofo yina landilaka kaka na kukwenda na ntwala na mutindu mosi? Kieleka. Ya kele mutindu bawu ke salaka yawu bubu yayi, kima mutindu mosi; ba-Moabite, ba-Nicolaïte, ke landila kaka kukwenda na ntwala. Mpe bawu landilaka kaka na kukwenda kuna, mpe yandi kwendaka. . . . Ntangu yayi beno tala mbote, kana Nzambi zolaka tala na kukangama na misiku, Yandi zolaka vwanza ya kukangama na kusakumuna Moab; samu ti, beno tala, Balaam tungaka ba-autel sambwadi. Ya kele kieleka.

217 Lutangu sambwadi: bansungi sambwadi ya dibuundu. Beno ke mona nsalulu ya kimpeve? Ntangu yayi, beno simba yawu ntangu yayi: nsalulu ya kimpeve. Mu ke baka yawu na minuti, ya kele kisika ya mpasi. Beno me mona, nsalulu ya kimpeve. Ba-autel sambwadi, bangombe sambwadi ya babakala (bibulu ya kutsyema), mpe bankombo sambwadi ya babakala; na kuzonzilaka na nkwizulu ya Klisto, bankama ya bamvula ntete Yandi kwiza.

218 Kasi, bawu vwandaka kwikila. Yinki bawu vwandaka kwikila? Bawu vwandaka kwikila na Jéhovah Nzambi. Yinki dyaka yankaka bawu kwikilaka? Bawu kwikilaka ti munkayulu ya kutsyema zolaka vwanza yina ya kupesa na munkayulu. Ya kele kieleka. Mpe bawu vwandaka tuba ti bawu vwandaka kwikila ti Mesiya vwandaka kwiza, samu bawu vwandaka pesa dimeme ya bakala, yina vwandaka nkombo ya bakala. Ya kele kieleka?

219 Ntangu yayi, beno kangama kaka ntangu mosi na Baptiste; beno tala kana bawu ke salaka kima mosi ve. Ya kele kieleka kaka.

220 Mbote, ntangu yayi wapi kisika kele luswaswanu? Beno tala Israël na yisi ya mongo, kupesa mutindu mosi ya munkayulu yina bawu vwandaka pesa na zulu awa, na kusambilaka na Nzambi mosi. Beno lenda mona ve Nicolaïsme? Yina ba me vukisa! Beno me mona yawu? Beno ke mona ve kimpeve ya kieleka? Yinki vwandaka luswaswanu na bawu? Mosi ya bawu bidimbu vwandaka landa yandi! Mosi yankaka vwandaka na *mutindu*, mosi yankaka *bidimbu vwandaka landa yandi*.

221 Ya kele kima mosi yina salamaka awa, Concil ya Nicée; ba-Nicolaïte, Buklisto ya misiku. Mpe Mpeve-Santu vutukaka mpe tubaka, “Nge kele na malongi ya Balaam na kati-kati ya nge.” Beno me mona? “Mpe nge. . . Mu yina bisalu ya ba-Nicolaïte, malongi ya bawu yina kele na bawu, samu ti ya kele malongi ya Balaam yina tubaka na bana ya Israël na kusala yimbi.” Wapi mutindu yandi salaka yawu?

222 Na yina ntangu yandi kwendaka samu na kusinga bantu yango, Nzambi tubaka, “Mu ke kanga ludima ya nge; nge ke tuba dyaka ve kana yina Mu ke tuba na nge. Nge lenda singa ve yina mu me sakumuna.” Na yawu yandi talaka na yisi kuna.

223 Mpe beno tala muntu ya luvunu yayi! Oh, beto lendaka kaka kulandila na yawu, beno me mona. Beno tala na Ntinu ya mawa yayi Balac, mfumu ya nyonso yayi, kutuba na profete ya luvunu yayi awa, tubaka, “Kulumuka kuna mpe tala kaka lweka ya bawu ya yimbi.”

224 Ya kele mutindu mabuundu ya nene ke zolaka kutuba na mwa lutangu ya fyoti ya Nzambi. “Beni zaba yinki? Mu zabaka mosi ya bawu. Bakala! Beni zaba yinki yandi salaka? Yandi—yandi salaka *yayi*, mpe yandi salaka *yina*. Ba kele ba-Pentecotiste. Kieleka.” Oh, kasi kana beni zabaka kaka kieleka na zulu ya bawu, kasi bazulunale mpe nyonso ke bumba yawu swi. Kasi beni bika mwa Pentecotiste kubasika na kieleka ntangu mosi, mpe beni tala mbote yinsi ya muvimba kutubila na yawu. Kieleka. Yinga, tata.

225 Kasi, ntangu yayi beni tala, yandi tubaka, “Tala kaka lweka ya yimbi, na lweka ya yimbi, lweka ya yandi ya yimbi.” Balaam tubaka, “Yinga, mu ke tala kaka na lweka ya yimbi, lweka ya bawu ya yimbi yina bawu ke salaka. Ya kele yina mu ke sala, mu ke tala kaka na bayimbi ya bawu—ya bawu, lweka ya bawu ya yimbi.” Samu ti kana beni vwandaka tala na yimbi, ba vwandaka ve. Ya kele kieleka. Ba vwandaka me sala disumu nyonso landila manaka. Kasi yinki yandi kondwaka na kumona, yandi kubwaka na kumona Ditadi yango ya kubulamaka, Nyoka ya Kisengo, kyese yina ya Ntinu na kati-kati ya bawu, kubeluka, bidimbu, mambu ya ngitukulu, mpe Dikunzi ya Tiya na zulu ya bawu.

226 Profete yango ya mpofo lendaka ve kumona Yawu. Ve, tata. Kasi yandi vwandaka talisa lweka ya bawu ya mvindu, “Mbote, mu zaba mosi yina ke basikaka na kento ya bakala yankaka. Mu—mu zaba yayi, yandi me yiba mwa ya mbongo.” Ya kele kieleka. Ya kele kieleka. Mu ke ndima yawu; kasi bawu kele na kima mutindu mosi na lweka kuna, kasi bawu tubaka kima mosi ve samu na yawu. Beni me mona? Na yawu yandi ke na kutalisaka kaka lweka ya yimbi.

227 Kasi Yandi tubaka, Nzambi tubaka, “Nge fwana tuba kaka yina Mu ke tuba.” Mpe Balaam kotaka na Kimpeve, kotaka na transe; mpe na kisika ya kusinga Israël, yandi sakumunaka yandi. Amen! Kuna yandi vwandaka.

228 Ntangu yayi, kana Nzambi futaka . . . to ke zitisa kukangama na misiku, balukolo ya zole, mpe baseminere ya nene mpe lukolo ya nene, mpe ba-Doctorat ya Philosophie mpe ba-Doctorat ya droit mpe, mitindu nyonso ya ba-Doctorat ya Théologie. . . Mbote, yinki kana Yandi vwandaka zitisa yawu,

mbote, kuna, beno lenda. . . Yandi zolaka zitisa bawu. Beno me mona? Kasi Yandi zitisaka mpe sakumunaka yimeni bantu yayi na lusakumunu, samu Mpeve, Ntinu. . . Ba tubaka, “Ya vwandaka na kuboka ya Ntinu na camp.” Yinki? Yinki? “*Ntinu ya basantu.*” Makelele mpe kyese! Samu na yinki? Kimfumu yankaka.

²²⁹ Mu ke talisa na beno ti ba vwandaka ve ba-dénomination. Beno zola munu kusala yawu? Mu banza ti mu notikaka Masonuku awa samu na yawu. Inga, tata. Beno bika munu kutalisa beno ti Israël vwandaka ve. . . Beto vutuka na Nombres, kaka kuna ti beno ke mona ti bawu vwandaka ve. Bawu. . . Ntangu yayi, Moab vwandaka dénomination ya nene. Beto ke baka Nombres 23:9, mu ke baka mpe nzila ya 8:

Mpe. . . Wapi mutindu mu lendaka—wapi mutindu mu lendaka singa, (tubaka Balaam), yina Nzambi me singa ve? to wapi mutindu mu ke dasukila, yina MFUMU me dasukila ve? (Uh-huh.)

²³⁰ Ntangu yayi beno kuwa yina. . . yina Yandi tubaka:

Samu ti—samu ti na zulu ya matadi mu ke monaka yandi, . . . (Ya kele Nzambi. Na yisi ya kiwanda ve, kasi na zulu ya matadi. Oh! “Disu ya Yandi kele na zulu ya nswini mpe mu zaba ti Yandi ke na kutalaka mbote na munu.”) . . . na zulu ya matadi mu ke monaka yandi, . . . (Amen! Ve na . . . kuna na manima ya kiwanda mosi samu beno kumona lweka ya bawu ya yimbi; “Mu monaka kima ya muvimba,” Nzambi tubaka.) . . . na zulu ya matadi mu ke monaka yandi, mpe na myongo mu ke talaka yandi: beno tala, bantu yango ke zinga na lweka, mpe kele ve ya kutanga na kati-kati ya bayinsi.

²³¹ Yina ke sukisa dyambu? Ba vwandaka ve dénomination, “bayinsi.” Oh, ba vwanda yenga-yenga, na batenta, na babala-bala, kuna na bala-bala na nsongi, kosalu ya fyoti. Kana ba sala bilumbu kufuta ve, yinzo ya kufuta, ba ke basisa bawu; Nzambi vwandaka zola bawu kukwenda kisika mosi yankaka. Beno me mona? Bantu ke yenga-yenga! Kieleka!

²³² Kuna na Jamaïque, bilumbu fyoti me luta, ya vwandaka na dokotolo mosi ya Pentecotiste ya mbote ya théologie yina vwandaka kuna. Mpe mu tubaka, “Oh, wapi mutindu Mfumu sakumunaka Dibuundu ya pantekote ya ntete: ba vwandaka na kima mosi ve.” Mu tubaka, “Ba vwandaka kaka bantu ke yenga-yenga, bisika nyonso.”

Yandi tubaka, “Uh, Mpangi Branham?”

Mu tubaka, “Yinga, mpangi ya bakala.” Mu zolaka yandi; mpangi ya bakala ya mbote.

Mpe yandi tubaka, “Mu—mu ke zola kaka kutalisa nge kisika nge kele na foti.”

Mu tubaka, “Oh, mu kele na nsayi mingi na yawu. Mu—mu ntangu nyonso ke zolaka kuzaba kisika mu kele na foti, samu ti Nzambi zaba yawu; mu—mu zola ve kuvwanda na foti.” Mu tubaka, “Mbote, kana mu kele na kifu, kieleka mu zola kubaza yawu, mpangi ya bakala. Matondo na nge.”

Yandi tubaka, “Nge ke landila na kupesa lukumu na bantu yango ya pantekote.”

Mu tubaka, “Yinga!”

Yandi tubaka, “Ba salaka foti ya kulutila yimbi yina ba salaka ntete, ntangu ba tekisaka lupangu ya bawu.” Yandi tubaka, “Ntangu kutalisa mpasi kutelamaka, ba vwandaka mpe ve na yinzo ya kukwenda. Ba vwandaka ve na kisika ya kukwenda, mpe bawu vwandaka yenga-yenga bisika nyonso.”

Mu tubaka, “Kaka luzolo ya kieleka ya Nzambi.”

Yandi tubaka, “Wapi mutindu?”

²³³ Mu tubaka, “Kana bawu kuzwaka yinzo bawu zolaka vutuka, kasi bawu zolaka kwenda katuka awa na kuna, na kumwangisa nsangu, bisika nyonso, ti Mpeve-Santu me kwiza. Beno tuba ve na munu ti Nzambi ke salaka foti. Ata mbala mosi ve ti Yandi me salaka foti. Yandi zaba wapi mutindu ya kusala yawu. Ba tekaka balupangu ya bawu mpe kumaka bantu ke yenga-yenga, na kumwangisaka nsangu bisika nyonso.” Mpe ya kele ya kutuba, “Nsangu kumwanganaka na bisika nyonso ya muvimba ya yinza ya kuzabana kuna, na nzila ya bantu yango yina vwandaka yenga-yenga bayina bikaka nyonso samu na kuzwa Mpeve-Santu.” Bantu yango vwandaka ve ya dénomination mosi. Beno me mona?

²³⁴ Ntangu yayi, beno bambuka moyo, dénomination kele yina Nzambi ke na kubokilaka, “Kukota na malongi ya Balaam.” Mbote, kuna, ntangu yandi lendaka ve na kukotisa bawu na dénomination yayi, beno zaba yinki Balaam salaka? Ntangu yayi, beno kuwa mbote ntangu yayi, beto ke na kubelamaka na kusukisa. Ntangu yayi yina Balaam salaka, yandi salaka kima kaka mosi bawu salaka awa na Concil ya Nicée. Ya kele samu na yina Yandi tubaka, “Nge kele na malongi ya Balaam mpe ba-Nicolaïte yango.”

²³⁵ Ntangu yayi, ba-Nicolaïte vwandaka bantu yina basikaka mpe zolaka kusala ba-organisation mpe—mpe nyonso yankaka. Yina, na nsuka. . . Bantu yikwa zaba ti ya kele kieleka ntangu mu ke tuba, “organisation”? Ya kele kieleka Kieleka ya Nzambi. Mpe bawu na nsuka bongisaka organisation ya kulutila nene na yinza. Mpe samu na yinki bawu salaka yawu? Katolika. Mpe yinki zola kutuba mpova ya *katolika*? “Ya bantu nyonso.” Organisation, yinza ya muvimba, ya kubongisa, “Bima nyonso ya fyoti yayi fwana kota na dibuundu mosi.” Ntangu yayi, kana beno ke tala. Oh, mu. . . beno landila kaka na kukwenda.

236 Beno tala! Yinki vwandaka Babylone? Nani salaka Babylone? Nimrod. Yinki yandi salaka? Yandi salaka yinzo mosi ya nene na mbanza mosi ya nene, mpe salaka bambanza nyonso yankaka kufuta mpaku na mbanza yayi. Organisation! Beno tala lufulu ya yawu. Kieleka. Ya me kwiza kaka awa na nsungi ya dibuundu mpe me bongama dyaka, mpe me nata bayinsi nyonso na kati ya yawu. Mpe kaka awa Yawu ke tuba, “Ndumba yina salaka bayinsi nyonso kunwa ya vinu ya yandi ya bindumba.” Pité ya yandi yina yandi vwandaka salaka, na kutubaka ti kele “Muklisto” mpe vwandaka kabula bima ya mutindu yina: katekisima, babuku ya bisambu, mpe nyonso yankaka. Mpe ba-Protestant me kwiza kaka, na kima mutindu mosi, na kulandaka kaka banzila ya yandi.

237 Mbote mingi, beto kwenda kaka mwa fyoti na ntwala ntangu yayi. Mbote mingi. Mbote mingi. Yandi tubaka ntangu yayi, ti, “Bayayi vandaka malongi ya Balaam.”

238 Ntangu yayi, yinki Balaam salaka ntangu yandi talaka ti yandi zolaka lenda ve—ti yandi zolaka lenda ve kusinga Israël? Yandi tubaka na Balak ti ya ke vwanda dibanza ya mbote, kuna, samu na yandi na kubokila bantu yayi na feti ya nzambi ya bawu. Bawu kuzwaka—bawu kuzwaka feti mosi—mosi ya nene kuna, bawu vwandaka . . . kisika bawu zolaka kuzwa yawu. Mpe bawu. . . Feti yango vwandaka ya kubokila “Feti ya Baal p-e-o-r, Baal-peor.” Mu banza p- . . . peor, Baal-peor. Ya vwandaka feti, samu na kusambila.

239 Mpe Balaam tubaka, “Ntangu yayi, mu ke tuba na nge, Balak, mu ke pesa nge dibanza ya mbote. Kana kaka nge ke . . . kana nge . . . Nzambi ke singa bawu ve, ya kele kaka nyonso yina ya kele na yawu, na yawu mu ke tuba na nge yina nge ke sala. Beto lenda ve kukatukila bawu; kasi kana nge ke bokila kaka bawu kuna, nge ke nata dyambu nyonso na lweka ya nge.”

240 Beno me mona, kieleka, kieleka yina Constantin salaka. Na mutindu ya kulunga! Ya kele samu na yina ya kele na “malongi ya Balaam.”

241 Yinki bawu salaka? Bawu kuna . . . Malongi ya Balak kutsyamukaka na kati-kati ya Israël. Mpe ba bokilaka ba-Israelite nyonso na feti yayi ya nene, na mukembo ya nene yina bawu vwanda kuzwa. Oh, feti mosi ya nene, mukembo mosi ya nene kuna bawu vwanda kuzwa. Mpe ntangu bawu kwendaka kuna, mbote, bantu ya Israël yayi bandaka na kumona bakento yayi ya kitoko ya ba-Moabite, ya kulwata sexy. Inga, ba vwandaka ve mutindu bana ya bawu ya bakento ya ntangu nyonso kuna. “Oh, ba vwanda talana kitoko mingi. Oh! Mutindu bawu vwandaka ya kusala mpe, oh, mutindu bawu zolaka talisa bawu mosi.” Mpe bawu kubwaka samu na yawu, mpe bandaka na kusala pité. Mpe Balaam zabaka kana Nzambi zolaka singa bawu ve, yandi zolaka nata bawu na lweka ya ba-dénomination

yayi mpe kunata nkele ya Nzambi na kufwa bawu na mutindu nyonso; ti Nzambi Yandi mosi kufwa bawu, kana yandi lendaka kieleka kubasisa bawu na nzila ya Kieleka.

²⁴² Mpe ntangu nyonso yina beno ke basika mpe ke kuma ya dibuundu na kisika ya kuzwa mbotika ya Mpeve-Santu, beno me kufwa! (Samu na beno ve, kasi na *awa*, mu ke na kubika yawu kukota mbote mwa ntangu fyoti.) Ya kufwa! “Nge kele na nkumbu,” tubaka na Luther awa, na Nsungi ya Sardes. Mpova *Sardes* zola kutuba “ya kufwa.” “Nge kele na nkumbu na yina nge ke na kuzingila, kasi nge kele ya kufwa!” Ya kele yina Nzambi tubaka. Yinga. Beno me mona?

²⁴³ Mpe ntangu bawu salaka bindumba ya kimpeve kuna, dibuundu ya mbotika ya Mpeve-Santu me kwelana na dénomination, ba kumaka ya kufwa. Beno bawu yayi. Ya kele yina Biblia ke tuba, ya kele yina Nzambi tubaka, na kuzonzaka na mabuundu.

²⁴⁴ Ntangu yayi mu zola kaka kutanga kima mosi awa samu na beno, yina mu . . .

²⁴⁵ Mpe Nzambi, yinki Yandi salaka? Mpe ntangu yayi ntangu bawu salaka kima ya yimbi yayi, mpe bawu vwandaka na kati ya pité, Nzambi kufwaka makumi yiya na zole ya funda ya bawu na mbala mosi; makumi yiya na zole ya funda, samu na kusalaka pité. Mpe yinki ya ke zonzila awa na dibuundu? Pité ya kimpeve, ti beno ke tuba kuvwanda “Muklisto” mpe ke zinga dyaka mutindu yinza. Oh, mpangi, beno kuzwa Mpeve-Santu! Beno kwenda ntama na ba-credo yayi ya ntama mpe bima beno . . . ya kele ya kufwa; beno tanga Credo ya Bantumwa, to mutindu mosi ya credo, mpe beno tuba fyoti bisambu ya kusonika na buku ya bisambu, to kima mutindu yina. Yesu ata mbala mosi ve tubaka na bantu ya Yandi na kutuba lusambulu mosi, Yandi tubaka, “Beno sambila!” Beno sambila! Mbote mingi.

²⁴⁶ Ntangu yayi, feti ya Constantin, kaka mutindu Balaam. Ntangu yayi beno tala mbote. Mutindu feti ya mimpani ya Balaam, Constantin kuzwaka feti ya mimpani. Mbote mingi. Ba bokilaka Pergame. Mpe ntangu yayi beno tala yayi . . .

²⁴⁷ Mu sonikaka kima awa, mu ke bika kaka yawu swi ntangu yayi. Mbote mingi. Mbote mingi. Mu vwanda meka kaka na kusimba noti yayi awa ya . . . kima yina mu sonikaka.

²⁴⁸ Ba bokilaka Pergame. Mbote mingi, ba bokilaka bawu na feti na manima ya Concil ya Nicée. Ba bokilaka bawu na feti ya *Solstice ya Hiver*; yina zola kutuba, “mwini, kusambila ya mwini,” yina vwandaka nzambi ya mimpani; yina kubwaka na Ngonda ya kumi na zole na kilumbu ya 21, kilumbu ya kulutula nkufi na mvula. Mpe bamvula . . . Ntangu yango mosi ke soba ve tii Ngonda ya kumi na zole ya kilumbu ya 25. Mimpani nyonso vwanda kembilaka yawu, mukembo ya mbutukulu ya nzambi mwini. Mukembo ya mbutukulu ya nzambi mwini vwandaka

kilumbu ya kulutila nkufi na mvula, na Ngonda ya kumi na zole na kilumbu ya 21. Mpe kuna muntu nyonso yina kieleka me tangaka disolo ya mabuundu zaba ti mimpani ke sambilaka na kilumbu yina. Ya vwandaka mukembo.

²⁴⁹ Mbote, ba-Romain vwandaka . . . ba vwandaka na bansaka ya nene, nsaka ya cirque ya ba-Romain. Bantu yikwa me mona yayi awa, nyonso yina ya vwandaka, awa ntama mingi ve, yina ba basisaka? Ben Hur! Beno me mona? Ntangu yayi, cirque ya ba-Romain; ya kele yina ba-Romain vwandaka na yawu na kilumbu ya mwini, na kubambuka moyo na mukembo ya mbutukulu ya nzambi mwini. Beno me mona?

²⁵⁰ Mpe ntangu yayi . . . mpe bawu salaka feti mosi ya nene kuna mpe bokilaka ba-Nicolaïte na kukwiza. Oh! Ya kele ya kulunga ve? “Beno kele na kati ya beno malongi ya Balaam.” Beno me mona, na kutubaka na Pergame yina vwandaka na bawu, bansaka ya nene ya kukima mbangu. Kuna bawu banzaka ti . . . Ba-Nicolaïte yayi banzaka, “Mbote, ntangu yayi, ya kele mbote. Feti ya nene yayi ba ke kembilaka yawu konso mvula? Yinga.” Na yawu kuna na kubokilaka archibishop ya kufwanikisa, to nyonso yina yandi vwandaka kuna, mpe nyonso, ba salaka yawu kima na ntangu nyonso: samu na kukotisa bindumba, na kukotisa pité, na kusalaka dibuundu ya Katolika; yina kele konso dénomination ba-Protestant mambele ya yawu, organisation. Nzambi kele na ata organisation, mpe ke yinaka mpe nkumbu ya yawu. Biblia ke tuba yawu.

²⁵¹ Mpe ntangu ba salaka yawu, yinki salamaka? Ba—ba tubaka aswa . . . Ba zolaka kuzwa nsalulu ya kimpeve, na yawu ba sobisaka (Mfumu Yesu) mukembo ya mbutukulu ya M-w-a-n-a ya Nzambi katuka Ngonda ya yiya (Yina bizabi nyonso ya mbote zaba, mpe muntu nyonso na luzayikisu ya kimpeve, ti Yandi kubutamaka na ntangu ya bima ya yinza mutindu ntangu mameme mpe nyonso yankaka ke butukaka: na Ngonda ya yiya.) samu na kutula yawu na kilumbu ya 25 ya Ngonda kumi na zole. Mpe ke landila na kusambila Nowele, ntangu yayi ya kele Tata ya Nowele. Mpe yina . . . Oh, kyadi. Beno me mona? Ba me bwela dyaka bafeti mingi ya mimpani na yawu. Beno tala nyonso. Beno bawu yayi, bokilaka, Balaam. “Nge kele na malongi ya Balaam na kati-kati ya nge.” Yawu yayi. (O Nzambi, monikisa kaka yawu, Tata.) Beno me mona? Ba katulaka mukembo ya mbutukulu na Ngonda ya yiya na . . .

²⁵² Ntangu yayi, bantu ya masolo, ke tuba ti “Nyonso ke talisa ti Yesu kubutukaka na Ngonda ya yiya ntangu luzingu nyonso yankaka kubasikaka.” Kasi bawu me soba yawu na kuvutulaka na kilumbu ya 25 ya Ngonda ya kumi na zole, bilumbu tanu na ntwala (beno me mona?) na manima ya nzambi ya mimpani, samu bawu kuvukisa bankizi ya bawu: bumpani mpe Buklisto. Mpe Bukatolika kele kima ve na yinza kasi nkonga ya balukwikilu ya luvunu ya mimpani mpe ndambu ya banzila

ya Buklisto ba me vukisa. Ya kele kieleka. Ya kele kieleka. Mpe ba-Protestant yina me ndima yawu kele kaka kieleka mwana ya kento ya mama ya ndumba. Ya kele kieleka.

²⁵³ Ntangu yayi, ti Nzambi kusadisa beto na kuvwanda kieleka bantu ke telemina nyonso yina kele kinzambi ve. Beno me mona? Oh!

²⁵⁴ Mpe kusala nsalulu na yawu na kimpeve, beno zaba yinki évêque tubaka? Evêque tubaka, “Beto kele na muswa ya kusala yayi samu ti yandi kele ‘Mwini ya ludedomo.’” Hmm! Oh, bawu kele na nzila ya kukimina, mutindu bawu ke salaka “Tata, Mwana, mpe Mpeve-Santu;” Matthieu 28:19, mutindu mosi, kaka. Kieleka, ba kele na nzila ya kukimina, ba fwana kuzwa mutindu mosi ya nsalulu ya kimpeve, beno me mona. Kasi yawu ve. . .

²⁵⁵ Biblia ke tuba, “Na yinwa ya bambangi zole to tatu ti konso dyambu kundimama.” Nzambi tubaka yawu, Yandi tubaka yawu kuna bambala tatu. Kana Nzambi samu na tala kima, Yandi bakaka Pierre, Jacques, mpe Jean; nyonso yina Yandi salaka, Yandi kuzwaka bambangi zole to tatu samu na kutalisa nyonso yina Yandi salaka, nzila nyonso na Masonuku. Ya kele kieleka.

²⁵⁶ Kasi, beno me mona, mwa bima yango zolaka kwiza kuna samu bawu kubaka yawu na kuvwanda yawu. Nzambi zabaka yawu ntete mbandukulu ya yinza. Kuna bawu kuzwaka yawu, nsalulu ya kimpeve, “Samu ti yandi kele M-w-a-n-a ya Nzambi, beto ke baka kaka mukembo ya mbutukulu ya m-w-i-n-i ya mimpani mpe kusala yawu mukembo ya mbutukulu ya M-w-a-n-a, mpe samu yandi kele ‘Mwini ya ludedomo.’” Hmm! Hmm! Beno zaba, ba-Protestant ke kubwaka dyaka samu na yawu, na kima ya mutindu yina. Kieleka, bawu ke sala, ke katula kaka yawu na Masonuku na kisika mosi yankaka. Oh, la la! Mu. . . Bika—bika kaka ti beto kukanga minuti. Mbote mingi.

²⁵⁷ Beno tala kima mosi ya fyoti mu zola kubaka. Beto baka nsuka ya nzila yayi kaka na nswalu. Beto lenda sala yawu? Yinga. Mbote, mu ke sala kieleka mbangu, kieleka na nswalu ntangu yayi, mpe beno ke. . . beto ke baka mambu ya ngudi na Yawu. Mbote mingi. Wapi kisika beto kele ntangu yayi?

Kasi. . .mu ke. . .na bima fyoti. . .ya kutelemina nge, . . .Balaam, . . .

Ya kele kieleka, mu me kuzwa yawu.

Na yawu nge mpe. . .malongi ya ba-Nicolaïte. . .

Beno balula ntima; . . .to ve mu. . .ke kwiza. . .na nswalu na nge, mpe. . .ke nwana na kuteleminaka nge na mbele ya yinwa ya munu.

Yandi yina kele na dikutu, ti yandi kuwa yina Mpeve ke tuba na mabuundu; . . .

258 Oh! Awa ntangu Constantin salaka yayi, ya vwandaka... Ntangu bawu kubikaka feti ya nene yayi. Mu—mu kaka... Mu bandaka na kukwenda ntama na yawu; mu ke vingila ntete mu tanga yawu samu Mpeve-Santu ke na kulandila na kuvutuka, ya kele samu na yina mu salaka yina mu vwandaka me sala kuna; vwandaka tuba, “Kukanga yawu ve.” Beno me mona? Awa ya ke na kwiza! Uh-huh, uh-huh, uh-huh. Mbote mingi. Ya kele samu na yina... .

259 Ntangu bawu kubikaka kima ya nene yayi, (Mu zola kutuba na beno yina salamaka samu beno kubakula.) yina vwandaka mbutukulu ya manima ya millenium. Samu dibuundu kumaka na bimvwama; ya vwandaka na bimvwama mutindu ya lendaka vwanda. Mpe wapi mutindu ya kumaka? Ngolo. Ya vwandaka na zulu ya yinsi; yinsi mpe dibuundu vwandaka kintwadi.

260 Ntangu yayi, Nzambi na kimfumu? Mpe Yesu tubaka ve ti bawu... Mosi na mosi ya bayinsi yayi vwandaka ya yandi, tubaka na Yesu mutindu yina, yandi talisaka na Yandi bimfumu ya yinza, tubaka, “Mosi na mosi ya yawu kele ya munu. Mu ke sala na yawu nyonso mu zola.” Mpe kuna kuvukisa Nzambi mpe dyabulu kintwadi? Oh, beno lenda sala yawu ve! Kieleka, beno lenda ve. Ya kele samu na yina yinsi kele ya kubongisa. Nzambi kele ve, na ba-organisation yayi. Kieleka ve, beno lenda sala yawu ve.

261 Kasi ba vwandaka na yawu kuna, ba vwandaka na dibuundu ya bawu ya kubokila Buklisto; ba kuzwaka yawu kuvukana na yinsi, kimfumu nyonso ya Rome, nyonso ya yawu. Evêque ya nene kuna na zulu ya nyonso ya yawu, yina vwandaka Boni-... Na manima ya mwa ntangu ba bokilaka yandi pape, kasi yandi vwandaka—yandi vwandaka évêque kuna. Mpe Boniface ya III vwandaka mosi ya bayina kumaka paapa ya ntete.

262 Kuna beto talaka ti awa yandi vwandaka kuna na kieleka mutindu pape na zulu... Nzambi yina bawu kuzwaka, na mutindu ya muntu. Ba vwandaka na autel ya nene. Ba vwandaka na bimvwama ya mbote. Ba vwandaka na ba-autel ya nene, ya ngolo, ya marbre, mpe ya kubongisa na matadi ya ntalu, mpe nyonso yankaka, na zulu ya nyonso ya yawu. Mpe ba vwandaka na mabuundu ya nene. Ba vwandaka yala na yinsi. Mpe beno zaba yinki? Mpova basikaka ti “ya vwandaka Millenium,” yawu nyonso kele bansilulu ya ba-Juif yango ya mawa, ti, “Nzambi basisaka bawu” (yina Yandi tubaka Yandi zolaka ata mbala mosi ve kusala yawu), mpe mekaka na kukotisa Millenium ntete kwizulu ya Mfumu Yesu. Ntangu Yesu ke kwiza ya kele ntangu Millenium ke baka kisika.

263 Ya kele kisika ya mbutukulu ya na nima ya millenium. Mpe ya kele samu na yina Katolika ke longaka ve nkwezulu ya Yesu, tii kilumbu yayi. “Ya kele nyonso na kati ya dibuundu. Yayi kele Millenium. Dibundu kele na nyonso. Yayi kele yawu.”

Beno me mona, na nima ya millenium (Oh, la la!) kukondwa kuvutuka ya Yesu Klisto. Yayi bakaka bilumbu tii ntangu ba kufwaka Constantin yina salamaka na kati-kati ya mvula 312 mpe—mpe . . . mvula 312 ya ntangu ya beto mpe mvula 606. Kuna ba salaka Boniface ya III évêque ya yinza to pape na zulu ya dibuundu ya muvimba ya yinza.

264 Mu banza beto ke manisa nzila yayi, mpe kuna mu ke manisa na yawu. Lukumu na Nzambi. Beno me mona? Ntangu yayi, mu ke simba dyaka beno minuti. Nzila ya 17:

Yandi yina kele na dikutu, ti yandi kuwa yina Mpeve—Mpeve ke tubaka na mabuundu; Na yandi yina ke nunga mu ke pesa ya kudya . . . mana ya kubumbama, mpe ke pesa yandi ditadi ya mpembe, mpe na ditadi nkumbu ya malu-malu kele ya kusonama, yina muntu ve zaba ya kubumbama yandi yina me kuzwa yawu.

265 Beno ke zola kuingila tii mbasi na nokokila, to kutala yawu ntangu yayi? [Dibuundu me pesa mvutu, “Ntangu yayi!”—Mu.] Mbote mingi.

266 Tata ya Mazulu, mu ke sambila ti Nge ke bika bantu kubakula ntangu yayi, na Nkumbu ya Mfumu Yesu, ti bawu lendaka bakula bisika nyonso (mpe kisika babande ke kwenda), ti bawu lendaka zaba ti mu—mu me tuba yayi samu Yawu—Yawu kele Ntendulu ya Kinzambi yina Nge pesaka munu. Amen.

. . . yandi yina ke nunga . . .

267 Kima ya ntete mu zola beno kubambuka moyo: ti mosi na mosi ya bansangu yayi kele ve ya kupesa na dibuundu, kasi na wanzio ya dibuundu. Beno tala manima awa, yina ya ntete, dibuundu ya Eph- . . . Na dibuundu . . . Na . . .

Na wanzio ya dibuundu ya Ephèse . . . (Ya kele kieleka?)

268 Mbote mingi, nsungi ya dibuundu yina ke landa, nzila ya 8:

. . . na wanzio ya dibuundu ya Smyrne . . .

269 Mbote mingi, mpe nzila ya 12:

. . . na wanzio ya dibuundu ya Pergame . . . (Ya kele kieleka?)

270 Nsangu kele ya kutuba na ntwadisi ya dibuundu. Nzambi sadisa muntu yina ke kwendaka ntama na Nsangu yina! Kasi Yawu kupesamaka na wanzio, mpe wanzio vwandaka na kati ya diboko ya Yandi na yisi ya lutumu ya Yandi Mosi, na kupesaka yandi ngolo ya moyo yina me katuka na Yandi, na diboko ya Yandi ya bakala. Bawu kele na kati ya diboko ya Yandi ya bakala, ya kele, bawu kele na ngolo ya nene na yina bawu kele awa na zulu ya ntoto; samu ti bawu kele Bansemo me katuka na Yandi, na kupesaka Nsemo na nsungi ya dibuundu yina. Beno me mona? “Na wanzio ya dibuundu.” Ya kutuba na *mbwetete* (ya nsungi)

na yina kele na kizitu. Wanzio ya dibuundu kele na kizitu kana yandi longa ve Ndinga. Ya kele kieleka. Mpe wanzio yina fwana pesa mvutu na lufundusu.

271 Bantu yikwa ke bambuka moyo na vision awa ntama mingi ve me luta na yina me tala...Beno tala awa. Ntangu mu vwandaka—ntangu mu vwandaka ya kulala na zulu ya mfulu, mpe Mpeve-Santu kwizaka; mpe mu talaka na manima, kento ya munu vwandaka kuna. Mpe kuna mu vwandaka ya kulala kuna, mpe kotaka na Mvwandulu kuna, mpe mu monaka bantu nyonso yango. Mpe beno ke bambuka moyo ti mu tubuka yawu? Beno nyonso. Beno me mona?

Mpe mu tubaka, “Mbote, ba kele . . .?”

Yandi tubaka, “Ba kele ya nge.”

Mpe mu tubaka, “Bawu nyonso ba-Branham?”

Yandi tubaka, “Ve.” Ba vwandaka mafuku. Yandi tubaka, “Ya kele mindimi ya nge.”

Mpe mu tubaka, “Mindimi?”

272 “Nge ke mona kento yina yina nge vwanda zolaka mingi, kuna, ya ntwenya mpe kitoko,” tubaka, “yandi lutaka bamvula makumi yivwa ntangu nge twadisaka yandi na Klisto.”

Mpe mu tubaka, “Oh!” Mu tubaka, “Na yina mu vwandaka na boma ya yayi?”

Mpe yandi tubaka, “Beto ke na kuingilaka awa na nkwiuzulu ya Mfumu.”

Mu tubaka, “Mu zola kumona Yandi.”

273 Yandi tubaka, “Nge lenda mona Yandi ve ntangu yayi, kasi” tubaka, “ntama mingi ve Yandi ke kwiza. Beto ke na kuingilaka na Yandi, kasi ntangu Yandi ke kwiza, Yandi ke kwiza ntete na nge. Mpe ba ke fundisa nge landila Nsangu ya mbote yina nge longaka, mpe beto ke vwanda bantu ya nge.”

“Mbote,” mu tubaka, “nge zola kutuba ti mu kele na kizitu ya bantu nyonso yayi?”

“Ya beto nyonso!”

Mu tubaka, “Mbote, muntu nyonso ke . . .?”

Yandi tubaka, “Nge butamaka ntwadisi.”

Mpe mu tubaka, “Mbote, muntu nyonso ke vwanda na kizitu?”

Yandi tubaka, “Ntwadisi nyonso.”

Mu tubaka, “Wapi mutindu samu na Santu Paul?”

Yandi tubaka, “Yandi ke vwanda na kizitu ya nsungi ya yandi.”

“Mbote,” mu tubaka, “Mu me longa Nsangu mosi ya mbote yina yandi salaka.”

Mpe mafuku ya bandinga kuwakanaka, tubaka, “Beto ke na kupemaka na zulu ya yawu!” [Dibuundu me tuba, “Amen!”—Mu.] Beno me mona? Beno bawu yayi, “ke na kupemaka.”

²⁷⁴ Na yawu *wanzio* ya Nzambi, munati-nsangu na dibuundu, kele na kizitu kana yandi longa ve Ndinga. Mbote mingi.

²⁷⁵ “Mani ya kubumbama.” Bika beto pesa ntendulu na mutindu ya mbote beto lenda. Yinki “mani ya kubumbama” ke fwanikisa? Mani ya kubumbama vwandaka mani yina vwandaka ya kubumbana na kisika . . . to dimpa ya kulakisa, na kati ya Biblia, ta vwandaka kaka samu na nganga-Nzambi. Bantu yikwa na ziunga zaba yawu? Beno me mona? Ntangu yayi, ya vwandaka ve samu . . . Ba vwandaka na dimpa samu na dibuundu, kasi ya vwandaka na dimpa ya mutindu ve samu na nganga-Nzambi. Ya kele kieleka?

²⁷⁶ Yayi kele dimpa ya mutindu ve, dimpa ya mutindu ve, mani ya *kubumbama*. Yinki ya kele? Nani kele Mani ya beto? Klisto. Mbote mingi, Santu Jean, kapu ya 6, na nzila 48 tii na 50, kana beno ke na kusonikaka. Yesu tubaka ti Yandi vwandaka “Dimpa ya Luzingu yina me katuka na Mazulu,” Mani.

²⁷⁷ Mbote, yina kele “mani ya kubumbama”? Mani yina me pesama ve na dibuundu. Ba ke tsyamuna na zulu ya wanzio ya dibuundu ya luzayikisu ya Ndinga. Beno me mona? Luzayikisu ya Ndinga kele ya kupesa na wanzio ya nsungi yina, samu ti ya kele ya kubumbama bisika nyonso, mpe ke monana (mani ya kubumbama) na . . . Ya kele ya kutuba na *wanzio* ya dibuundu. Beno me mona? Beno me kuzwa yawu? Ya kele mwa luzayikisu ya kulutila nene ya yina Klisto kele, ya lendaka vwanda mwa lubokilu ya kulutila zulu.

²⁷⁸ Mu ke kumiyufula kana Luther kubakulaka yawu? Mu ke kumiyufula kana Wesley salaka na kilumbu ya yandi? Oh! Mu ke kumiyufula kana Santu Martin kubakulaka yawu? Irénéé? Ntangu yayi, beno zaba, dibuundu sonikaka mpe ve bantu yango, ba vwandaka ve basantu samu na bawu; kasi ba vwandaka bayina bidimbu vwandaka landa. Ba bakaka ba-*évêque* ya bawu—ya bawu mosi, mpe nyonso yina, samu na kunotika.

²⁷⁹ Mbote, awa ntama mingi ve me luta, kento mosi kwendaka kuzwa *Luzingu ya Santu Martin* na yinzo mosi ya babuku ya Kingelesi. Mpe ntangu . . . Kento tubaka, “Santu Martin.”

²⁸⁰ Mpe muntu ya babuku bakaka catalogue, yandi tubaka, “Yandi kele ve ya kuzabana mingi na disolo, ba sonikaka yandi ve.” Beno me mona? Tii dyaka kilumbu yayi; kasi Nzambi kele na nkumbu ya yandi, Nzambi zaba nani yandi kele.

²⁸¹ Beno me mona, ya kele yina kele luswaswanu. Muntu mosi ke zola ti nkumbu ya yandi kuvwanda na kima mosi ya nene, kasi bantu ya Nzambi ke zolaka kukima mutindu ya kima yina. Bawu zola ve bima ya nene nene, mpe bima ya nene nene; ba zola kuvwanda ya kulemvuka, kuvwanda ya kulemvuka. Nzila—nzila

samu na kuzanguka kele kukulumuka. “Yandi yina yandi mosi kele ya kulemvuka ba ke zangula yandi; yandi yina ke zanguka yandi mosi ba ke kulula yandi.” Me lemvuka yandi mosi. Beno meka ve na kuvwanda kima ya nene; beno meka na kuvwanda kima ya fyoti, kasi beno vwanda yina beno kele. Beno me mona? Beno vwanda fyoti na meso ya Nzambi, beno vwanda fyoti na meso ya beno mosi, muntu nyonso yankaka na zulu ya beno. “Ti yandi yina kele ya kulutila nene na kati-kati ya beno kuvwanda kisadi ya bantu nyonso.”

²⁸² Nani lenda vwanda ya kulutila nene na Yesu Klisto yina kangaka Yandi mosi lele na luketo mpe sukulaka makulu ya bilandi? Kisadi kisukudi-makulu, Yandi kumaka. Nzambi ya Mazulu, Kiyidiki ya mazulu mpe ntoto, na kusukulaka makulu ya mvindu ya bilobi (Oh!) na mvindu mpe bima yankaka, mpe fundu-fundu ya banzila, kisika bilele ya bawu kukombaka yawu, mpe sukulaka yawu; Kisadi kisukudi-makulu, ya kele yina Yandi vwandaka. Mpe kuna beto ke banza, “Beto kele muntu. Beto fwana vwanda Dokotolo, na Doctorat ya Philosophie, *Yayi-mpe-yayi*.” Oh, la la! Ya kele Klisto ve. Yina ke talisa ve luzolo . . . Yesu Klisto ya luzolo. Yandi kumaka Kisadi ya bantu nyonso. Ya kele kieleka. Yandi me longa beto mutindu yina beto zolaka sala na mosi na yankaka mutindu Yandi salaka na beto. Oh, yina kele—yina kele Mfumu ya munu. Yinki salaka Yandi nene, samu Yandi kumaka Yandi mosi fyoti. Beno me mona, ya kele yina salaka Yandi nene.

²⁸³ Mu kuzwaka bweso ya kukutana bantu yankaka ya nene na luzingu ya munu, mpe mu kuzwaka mwa bweso ya kukutana na bantu yina *banzaka* ti bawu vwandaka nene. Muntu ya nene ya kieleka ke mekaka na kusala beno kubanza ti beno kele nene mpe ti yandi kele kima ve. Beno me mona? Na kukutanaka na bantinu, mpe nyonso yankaka, mpe bantu yina kele kieleka bantu ya nene. Mpe beno ke kutana na Baklisto ya kusungama ya kieleka, na bilele ba me kanga mabulu, mpe bima ya mutindu yina. Mpe bayankaka ya bawu ke kwiza na chaire mutindu boite cylindrique mpe kuna . . . Beno me mona? Oh, la la! Mbote, ya kele ntama mingi. . . Mbote mingi.

²⁸⁴ “Mani ya kubumbama,” kima mosi ya fyoti *ya mutindu ve*. Yinki kele *ya mutindu ve?* Ve kima . . . Balusakumunu ya Mpeve-Santu? Oh, ve, yina kele samu na dibuundu ya muvimba. Kasi “mani ya kubumbama” vwandaka luzayikisu ya mutindu ve samu ti yandi zolaka longa bampangi. Beno me mona? Ya vwandaka luzabusu mosi ya Masonuku ya kulutila fyoti, ti yandi zolaka longa bampangi. Yandi zolaka vwanda yawu. Ya kele kieleka? Beno ata mbala mosi ve ke zinga kulutila na pasteur ya beno. Beno bambuka kaka na yawu, beno me mona. Mpe na yawu . . . Samu ti yandi kele mvungi yina ke dikisaka beno. Kana yandi kele mvungi, yandi fwana zaba kisika mani kele, samu na kudikisa mameme. Ya kele kieleka? Ntangu yayi, mutindu ve ya

fyoti. Mpe beno tala kaka yayi mbote minuti, luzayikisu, mani ya kubumbama.

285 Ntangu yayi, “Ditadi ya mpembe, yandi ke kuzwa ditadi ya mpembe.” Wanzio yayi fwana vwanda na ditadi ya mpembe. Ya kele ditadi, mutindu yina ve? [Mpangi mosi ya bakala me tuba, “Ya kukondwa mvindu.”—Mu.] Mpe . . . Yandi me tuba kieleka, “ya kukondwa mvindu.”

286 Yandi—Yandi kutanaka kilumbu mosi na muntu mpe nkumbu ya yandi vwandaka Simon, mpe Yandi sobisaka nkummbu ya yandi na Ditadi, “Pierre.” Samu na yinki? Yandi vwandaka na bafungula. Ya kelekieleka? Yandi sobisaka nkumbu ya yandi mpe salaka yandi ditadi. Ya kele kieleka? Pierre vwandaka na bafungula samu yandi vwandaka mosi yina vwandaka na bafungula na Kimfumu.

287 “Nkumbu ya malu-malu, nkumbu ya malu-malu ya kusonama na ditadi yayi yina muntu ve zabaka kasi yandi yandi mosi.” Yandi zabaka nani yandi kele, kasi yandi lendaka ve na kutuba na bampangi. Beno me mona? Beno me mona? Muntu ve zabaka kasi yandi mosi. Beno me mona? Pierre zabaka ti yandi vwandaka na bafungula, kasi beno kuwaka yandi ve kusala lunangu samu na yawu. Beno me mona? Bantu yayi yina ke salaka lunangu samu na yina bawu kele na nene kele kima mosi ve. Uh-huh, uh-huh. “Ditadi ya mpembe, mpe na kati ya yawu nkumbu ya malu-malu.” Ve nkumbu ya yandi mosi, kasi yandi kele muntu yankaka (Beno me mona?) ti kaka yandi mosi zaba; yandi yina kele na ditadi, nkumbu. Beno me mona, mani ya mutindu ve samu na kudikisa dibuundu, beno bambuka moyo.

288 Beno bambuka moyo ntangu Yayi kusalamaka na dibuundu yayi, ya vwandaka nsungi mosi (ntangu mosi yina Yayi kumonanaka) ti ba-Nicolaïte kutulaka bawu mosi na zulu ya dibuundu *ya bawu* mfumu, pape, mpe pesaka yandi autel ya ditadi ya mpembe na yisi, na yisi ya yandi, autel ya marbre. Ya kele kieleka? Mpe bongisaka yawu na bansonso, mpe bima ya mutindu yina, yina vwandaka ntalu samu na *yandi*.

289 Kasi wanzio ya Mfumu yayi kuzabaka nani *yandi* vwandaka, mwana ya Nzambi, na nzila—na nzila ya luzayikisu ya Yesu Klisto.

290 Mpe ntangu—ntangu ba-Nicolaïte tulaka ntwadisi *ya bawu* mpe tulaka ditadi ya marbre na makulu ya yandi (Beno me mona?), Nzambi tulaka ntwadisi ya Yandi ya kifuluka na Mpeve samu na nkonga ya bantu ya Yandi ya kifuluka na Mpeve; wanzio ya Yandi; mpe Yandi ke tula na zulu ya yandi kidimbu ya nkumbu, kasi yandi fwana monikisa yawu ve. Yandi fwana bumba yawu samu na yandi mosi, beno me mona. “Muntu ve zaba kasi yandi mosi.”

291 “Mani ya kubumbama, ditadi, nkumbu ya malu-malu yina muntu ve zaba kasi yandi yandi mosi,” mpe ya vwandaka ya kutuba na wanzio ya dibuundu. Mu ke kumiyufula kana Luther zabaka yawu? Mu ke kumiyufula kana Wesley zabaka yawu? Mu ke kumiyufula kana—kana bawanzio yankaka ya nene?

292 Mpe mu ke kumiyufula bubu yayi, kana na . . . Ke na kwiza ntama mingi ve na yinza, wanzio ya nene ya Nsemo yina ke kwiza na beto, yina ke kwiza basisa beto, Mpeve-Santu ya nene, ke kwiza na ngolo, mpe ke twadisa beto na Mfumu Yesu Klisto. Yandi na kutala ke zaba ve yawu, kasi yandi ke vwanda awa mosi ya bilumbu yayi. Yandi ke sala . . . Nzambi ke sala yandi kuzabana. Yandi ke sala ve yandi mosi kuzabana, Nzambi ke sala yandi kuzabana. Nzambi ke talisa Yandi Mosi. Ya kele yina Yandi tubaka ntangu Yesu vwandaka awa mpe ba zabaka Yandi ve, beno me mona. Yandi tubaka, “Kana Mu ke sala ve bisalu ya Tata ya Munu, na yina beno kwikila Munu ve; kasi kana Mu ke sala bisalu ya Tata ya Munu, mpe beno ke kwikila Munu ve, na yina beno kwikila bisalu.” Ya kele kieleka?

293 Oh, Yandi kele mbote ve! Buku ya Apocalypse. Ntangu yayi, beno me mona kisika mabuundu kele? Beno ke mona mutindu bawu ke basika na lutangu ya mingi? Beno ke mona mutindu dibuundu basikaka awa? Ntangu yayi, *yayi* kele nsungi beto ke baka mbasi na nkokila, kana Mfumu zola.

294 Ntangu yayi, mulemvo samu ti mu me bumba beno ngunga ya yinda, kasi mu—mu—mu banza ti beno—beno ke longoka kima. Mpe na kubakaka banoti yayi, ti ntangu . . . Mu kele na ndambu dyaka awa, pene ya ba-page tatu to yiya dyaka, kasi mu kele kaka ve na ntangu ya kubaka yawu, mpe, samu ngunga ke na kukuma ntama, mpe mu me luta ngunga pene ya baminuti kumi na sambwadi ntangu yayi tii . . . Kasi beto ke tula yawu na buku, na mutindu nyonso, mpe kuna beto ke—beto ke—beto ke kuzwa yawu.

295 Ntangu yayi, bantu yikwa ke zolaka Yandi na ntima ya beno nyonso? Bantu yikwa ke kwikila na Yandi na ntima ya beno nyonso? Oh! Ntangu yayi, beno ke banza ti mu zolaka telama awa kaka samu ti beto kele ve na kati ya ba-organisation— ti beto kele ve na kati ya ba-organisation mpe ke tuba bima yango? Beno ke bakula ntangu yayi, bankundi, samu na yinki mu—mu (luzingu ya munu nyonso) mu me nwanisa na kuteleminaka kima yina? Beno me mona, Yawu vwandaka Mpeve-Santu. Mu vwanda lenda ve kubakula yawu munu mosi, mu vwanda zaba yawu ve tii kaka bilumbu fyoti me luta. Beno me mona? Mu zabaka ve yina salaka munu kusala yawu; mu vwanda zabaka ve samu na yinki mu ntangu nyonso vwanda lookaka na kuteleminaka bakento yina ke zingaka yimbi, mpe nyonso; mu zabaka yawu ve, mu zaba ntangu yayi. Beno me mona?

²⁹⁶ Ntangu yayi, Mfumu zaba ti bima yayi kele yimbi. Beno tala ya kele ya kubaka na disolo, mpe me kwiza . . . Biblia ke tuba . . . Ntangu yayi beno tala awa, Biblia tubaka (tubaka na ntwala) ti bima yayi ke salama. Ntangu yayi, beto zaba yawu, beto zaba ve? Kuna beto baka disolo ya wanzio yango, mpe beto ke mona ti ya salamaka kaka kieleka mutindu Biblia ke tuba. Ya kele kieleka? Mbote, na yina, ntangu beto ke baka awa nsungi *ya beto* ya dibuundu, mpe yina Yandi tubaka na ntwala samu na nsungi *ya beto* ya dibuundu, ya ke salama kaka kieleka mutindu Nzambi tubaka ya zolaka. Beno ke kwikila yawu? Oh! Beno zola ve . . .

Oh, mu zola kumona Yandi, kutala kizizi ya Yandi,
Kuna kuyimba ntangu nyonso lemvo ya Yandi ya mpulusu;
Na babala-bala ya Nkembo ti mu zangula ndinga ya munu;
Bampasi nyonso me luta, na nsuka na yinzo, kukembila ntangu nyonso.

Oh, mu zola kumona Yandi, kutala . . . (Bantu yikwa ke zola?)
Kuna kuyimba ntangu nyonso lemvo ya Yandi ya mpulusu;
Na babala-bala ya Nkembo ti mu zangula ndinga ya munu;
Bampasi nyonso me luta, na nsuka na yinzo, kukembila ntangu nyonso.

Ntangu yayi na yina beno ke pesana maboko mosi na yankaka, na mantwala, na manima, mpe bisika nyonso, na ba-Méthodiste, ba-Baptiste, ba-Presbytérien, nyonso yina ya kele:

Na yina mu ke zyeta na yinsi yayi, na kuyimba na yina mu ke na kukwenda,
Oh, mu ke twadisa myoyo na Calvaire (Na dibuundu ve, na Calvaire.), na kubasika ya mingi ya mbwaki,
Makongo mingi me tobula moyo ya munu, na ngaanda, na kati;
Kasi Mfumu ya munu ke twadisa munu, na Yandi mu fwana kukangama.

Beto telama ntangu yayi:

Oh, mu zola kumona Yandi, kutala kizizi ya Yandi,
Kuna kuyimba ntangu nyonso . . .

Beto telemisa maboko ya beto.

. . . lemvo ya mpulusu;

Na babala-bala ya Nkembo ti mu zangula
 ndinga ya munu;
 Bampasi nyonso me luta, na nsuka na yinzo,
 kukembila ntangu nyonso.

²⁹⁷ Oh, mutindu mu zola Yandi! Mutindu mu zola Yandi!
 Mbote! Mbote!

Yesu kele mbote, mbote, mbote samu na munu,
 Konseye, Ntinu ya Ngemba, Nzambi ya Ngolo
 nyonso kele Yandi;
 Oh, me vulusa munu, ke keba munu na
 masumu mpe nsoni nionso,
 Musumbi ya munu kele mbote, mu ke kumisa
 Nkumbu ya Yandi!

Mu zimbanaka, ntangu yayi mu me vuluka,
 kitumbu mosi diaka ve,
 Yesu ke pesa kimpwanza mpe mpulusu ya
 kieleka;
 Me vulusa munu, ke keba munu oh, na masumu
 mpe nsoni nionso,
 Mukudi ya munu kele mbote, mu ke kumisa
 Yandi . . .

Muntu nyonso, kieleka na ngolo:

Yesu kele mbote, mbote, mbote samu na munu,
 Konseye, Ntinu ya Ngemba, Nzambi ya Ngolo
 nyonso kele Yandi;
 Oh, me vulusa munu, ke keba munu na
 masumu mpe nsoni nionso,
 Musumbi ya munu kele mbote, mu ke kumisa
 Nkumbu ya Yandi!

Oh, mutindu ya kele mbote!

Oh, mbote, mbote, Yesu kele samu na munu,
 Yandi kele Konseye, Ntinu ya Ngemba, Nzambi
 ya Ngolo nyonso kele Yandi;
 Yandi me vulusa munu, ke keba munu na
 masumu mpe nsoni nionso,
 Musumbi ya munu kele mbote, mu ke kumisa
 Nkumbu ya Yandi!

²⁹⁸ Ti beto nyonso kutuba, “Lukumu na Nkumbu ya Yandi!”
 [Mpangi Branham mpe dibuundu ke zonga kintwadi—Mu.]:
 “Lukumu na Nkumbu ya Yandi!” Musumbi! Beno bambuka
 mbasi na nkokila, na ngunga ya sambwadi. Tii kuna, tii beno
 ke vutuka dyaka, beno sala yayi:

Baka Nkumbu ya Yesu na nge,
 Nge mwana ya mawa mpe ya kiadi;

Ya ke pesa nge kyese, ngolo... (Nsayi
na kumona nge awa mpangi, Mfumu
kusakumuna nge.)

... bisika nyonso beno ke kwenda.

Nkumbu ya ntalu (Nkumbu ya Ntalu!), Oh
Nkumbu kitoko! (Oh nkumbu kitoko!)

Kivuvu ya ntoto mpe kyese ya Mazulu;

Nkumbu ya Ntalu (Nkumbu ya Ntalu!), Oh
Nkumbu kitoko!

Kivuvu ya ntoto mpe kyese ya Mazulu.

²⁹⁹ Na yina beto ke kulumusa bayintu ya beto ntangu yayi na
kisambu, samu na nkunga ya nsuka, to, nzila ya nsuka:

Beto ke fukimina Nkumbu ya Yesu,

Beto ke fukama na . . . (Mfumu Nzambi, belusa
bayayi, Mfumu, na yina beto . . .) . . . beto ke
byadisa Yandi,

Ntangu nzietolo ya beto ke suka.



NSUNGI YA DIBUUNDU YA PERGAME KNG60-1207
(The Pergamean Church Age)

BANDANDANI YA LUZAYIKISU YA YESU KLISTO

Nsangu yayi ya Mpangi William Marrion Branham, kulongamaka na Kingelesi, na Kilumbu ya tatu na nokokila, na kilumbu ya 7 ya Ngonda ya kumi na zole, na mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org